


Les quatre premiers
liures de la Franciade de
Pierre de Ronsard .

F. 2






F. II. 151



~~will be 1943~~


F. 11, 151











LES
QVATRE PREMIERS
LIVRE DE LA FRANCIADE.

AV ROY.
TRES-CHRESTIEN, CHARLES,
NEVFIEME DE CE NOM.

PAR PIERRE DE RONSARD,
GENTILHOMME VANDOMOIS.



A PARIS,
Chez Gabriel Buon, demeurant au Cloz bruneau,
à l'enſeigne ſainct Claude.

1572.

AVEC PRIVILEGE DV ROY.




EXTRAIT DV PRIVILEGE
du Roy.

PAR Priuilege du Roy, donné à S. Germain en Laye, le xx. iour de Septembre, l'an mil cinq cens soixante, il est enioint à P. de Ronfard, gentilhomme Vandomois, de choisir & commettre tel Imprimeur, docte & diligent q^sil verra & cognoistra estre suffisant pour fidellement imprimer, ou faire imprimer les œuures ia par luy mises en lumiere, & autres qu'il composera & fera par cy apres. Inskibant (ledict Seigneur) à tous Imprimeurs, Libraires, Marchans & autres quelconques, qu'ils n'ayent à imprimer ou faire imprimer aucunes des œuures, qui par ledit Ronfard ont esté & seront cy apres faites & composees, ny en exposer aucune en vente, s'elles n'ont esté & sont imprimees par ses permission, licence & congé, ou de l'Imprimeur par luy choisi & commis à l'impression d'icelles. Et ce sur peine de confiscation des liures ia imprimez, ou à imprimer, & d'amende arbitraire, tant enuers le Roy, qu'enuers ledit Ronfard, & des interrest & dommages de l'Imprimeur, par luy choisy & esleu: Le tout pour les causes & raisons contenues, & amplement declarées audit Priuilege. Ainsi signé sur le reply, l'ar le Roy, Vous presant de Lomenie, & scellé à double queue du grand seau, de cire jaune.

Ledit Ronfard a permis à Gabriel Buon, Libraire Juré de l'université de Paris, d'imprimer ou faire imprimer, les quatre premiers liures de la Franciade, iusques au terme de six ans, finis & accomplis, à commencer du iour que ledit liure sera acheué d'imprimer.

A cheué d'imprimer le 13. de Septembre.





AV LECTEUR:



ENCORE que l'histoire
en beaucoup de sortes se
conforme à la Poësie, cō-
me en vehemēce de par-
ler, harāgues, descriptiōs
de batailles, villes, fleu-
ues, mers, montaignes,
& autres semblables cho-
ses, où le Poëte ne doit
non plus que l'Orateur

falsifier le vray, si est-ce quand à leur suiet ils sont
aussi eslongnez l'un de l'autre que le vray semblable
est eslongné de la verité. l'Histoire reçoit seulemēt
la chose comme elle est, ou fut, sans desguisure ny
fard, & le Poëte s'arreste au vray semblable, à ce qui
peut estre, & à ce qui est desia receu en la commune
opinion: Je ne veux conclure qu'on doive effacer
durang des Poëtes vn grand nombre de Grecs &
Latins, pour honnorer d'un si venerable tiltre Ho-
mere Virgile, & quelques autres pareils d'inuētion
& de suiet: i'ose seulement dire (si mon opinion a
quelque poix) que le Poëte qui escrit les choses cō-

me elle sont, ne merite tant que celuy qui les feint, & se recule le plus qu'il luy est possible de l'historiē: non toutefois pour feindre vne Poësie fantastique cōme celle de l'Arioste, de laquelle les mēbres sont aucunement beaux, mais le corps est tellement contrefaict & monstrueux qu'il ressemble mieux aux resueries d'un malade de fièvre continue qu'aux inuentions d'un homme bien sain. Il faut que l'Historien de poinct en poinct, du commencement iusqu'à la fin, deduise son œuvre, ou le Poëte s'acheminant vers la fin, & redeuidant le fuzeau au rebours de l'Histoire, porté de fureur & d'art (sans toutesfois se soucier beaucoup des reigles de Grammaire) & sur tout fauorisé d'une preuoyāce & naturel iugemēt, face que la fin de son ouurage par vne bōne liaison se raporte au cōmencement. Ie dy cecy pource que la meilleure partie des nostres pense que la Franciade soit vne histoire des Rois de France, comme si i'auois entrepris d'estre Historiographe & non Poëte: Bref ce liure est vn Roman comme l'Iliade & l'Æneïde, où par occasiō le plus breuiement que ie puis ie traite de nos Princes, d'autant que mon but est d'escrire les faits de Françon, & non de fil en fil, comme les Historiens, les gestes de nos Rois: Et si ie parle de nos Monarques plus longuement que l'art Virgilien ne le permet: Tudoi sçauoir Lecteur que Virgile (cōme en toutes autres choses) en cette-cy, est plus heureux que

moy, qui viuoit sous Auguste second Empereur, tellement que n'estant chargé que de peu de Rois & de Césars, ne deuoit beaucoup allonger le papier, où i'ay le faix de soixante & trois Rois sur les bras. Et si tu me dis que d'un si grand nombre ie ne deuois eslire que les principaux: le te responds que Charles nostre Seigneur & Roy par vne genereuse & magnanime candeur, n'a voulu permettre que ses ayeulx fussent preferez les vns aux autres, à fin que la bonté des bons, & la malice des mauuais, luy fussent comme vn exemple domestique, pour le retirer du vice, & le pousser à la vertu. Au reste, i'ay patronné mon œuvre (dont ces quatre premiers liures te seruiron d'eschantillon) plustost sur la naïue facilité d'Homere, que sur la curieuse diligence de Virgile, imitant toutesfois à mon possible de l'un & de l'autre l'artifice & l'argument plus basti sur la vraysemblance que sur la verité: Car pour ne dissimuler ce qu'il m'en semble ie ne sçauois croire qu'une armee Grecque ayé iamais combatu dix ans deuant Troye: le combat eust esté de trop longue duree, & les cheualiers y eussent perdu le courage, absents si long temps de leurs femmes enfans & maisons: aussi que la coustume de la guerre ne permet qu'on combatte si longuement deuant vne forte ville, en vn païs estranger. Et dauantage ie ne sçauois croire que Priam, Hector, Polydame, Alexandre, & mille autre tels ayent iamais esté, qui ont

tous les noms Greqs, inuentez par Homere: Car si cela estoit vray, les cheualiers Troyés eussent porté le nom de leur païs Phrygien, & est bien aisé à cognoistre par les mesmes noms, q̄ la guerre Troyenne a esté feinte par Homere, comme quelques graues auteurs ont fermement assuré: les fables qui en sont sorties depuis sont toutes puisees de la source de cest Homere, lequel comme fils d'un Dæmon, ayant l'esprit surnaturel, voulant s'insinuer en la faueur & bonne grace des Æacides, & aussi (peut estre) que le bruit de telle guerre estoit receu en la comune opinion des hōmes de ce temps là, entreprit vne si diuine & parfaite Poësie pour se rédre & ensemble les Æacides, par son labeur à iamais treshonorez. Je sçay bien que la plus grande partie des Historiés & Poëtes sont du costé d'Homere, mais quand à moy ie pense auoir dit la verité, me soumett touiours à la correctiō de la meilleure opinion. Autant en faut estimer de Virgile, lequel lisant en Homere, qu'Ænee ne deuoit mourir à la guerre Troyenne, & que sa posterité releueroit le nom Phrygien, & voyât que les vieilles Annales de son temps portoyent qu'Ænee auoit fondé la ville d'Alba, ou depuis fut Rome, pour gaigner la bonne grace des Césars, qui se vantoient estre sortis d'Ûle fils d'Ænee conceut ceste diuine Æneide qu'aucq toute reuerence nous tenons encores auiourd'huy entre les mains: Suiuant ses deux grands persona-

ges i'ay fait le semblable : car voyant que le peuple François tient pour chose tresassuree selon les Annales, que Francion fils d'Hector, suiuy d'une compagnie de Troyens, apres le sac de Troye, aborda aux palus Maëotides, & de là plus auant en Hongrie : i'ay allongé la toille, & l'ay fait venir en Franconie, à laquelle il donna le nom, puis en Gaule, fonder Pâris, en l'honneur de son oncle Pâris: Or' il est vray-semblable que Francion a fait tel voyage, d'autant qu'il le pouuoit faire, & sur ce fôdement de vray semblance, i'ay basti ma Francia de de son nom: Les esprits conçoieût aussi bien que les corps, Ayant donc vne extresme enuie d'honorer la maison de Frâce, & par sur tout le Roy Charles neufiesme mon Prince, non seulemēt digne d'estre loué de moy, mais des meilleurs escriuains du monde pour ses heroïques & diuines vertus, & dont l'esperance ne promet rien de moins aux François que les heureuses victoires de Charlemagne son ayeul, comme sçauent ceux qui ont cet honneur de le cognoistre de pres, & ensemble desirant de perpetuer mon renom à l'immortalité: fondé sur le bruit commun, & sur la vieille creance des Chroniques de France, ie n'ay sceu trouuer vn plus excellent suiet que cestui-cy. Or' comme les femmes qui sont prestes d'enfanter choisissent vn bon air, vne saine maison, vn riche parrain pour tenir leur

enfant, ainsi i'ay choisi le plus riche argument, les plus beaux vers & le plus insigne parrain de l'Europe pour honorer mô liure, & soutenir mon labeur: Et si tu me dis, Lecteur, que ie deuois cōposer mon ouurage en vers Alexandrins, pource qu'ils sont pour le iourd'huy plus fauorablement receuz de nos Seigneurs & Dames de la Court, & de toute la ieunesse Françoisse, lesquels vers i'ay remis le premier en honeur, ie te responds qu'il m'eust esté cēt fois plus aisé d'escrire mon ceuvre en vers Alexandrins qu'aux autres, d'autāt qu'ils sont plus longs, & par cōsequent moins suiets, sans la hôteuse cōsciēce que i'ay qu'ils sentēt trop leur prose, Or tout ainsi que ie ne les aprouue du tout, si ce n'est en tragedies ou versions, aussi ie ne les veux du tout cōdamner, i'en laisse à chacun son libre iugement pour en vser comme il vouldra: Ie reuiens seulement à ce qui touche mon fait: Ie ne doute qu'on ne m'accuse de peu d'artifice en ce que la harāgue de Iupiter au cōmencemēt de mô premier liure est trop lōgue, & que ie ne deuois commēcer par là, Tu dois sçauoir que trēte lignes de Latin en vallent plus de soixāte de nostre François, & aussi qu'il faillloit que ie me seruissē de l'industrie des Tragiques, ou quand le Poète ne peut desmesler son dire, & que la chose est douteuse, il fait tousiours comparoistre quelque Dieu pour esclaireir l'obscur de la matiere: les hōmes

mes ne sçauoient comme Francion auoit esté sau-
 ué du sac de Troye, vn seul Iupiter le sçauoit: Pour-
 ce i'ay esté contraint de l'introduire pour mieux
 desnouër la doute, & donner à comprendre le fait,
 & mesmes à Iunon laquelle est prinse icy comme
 presque en tous autres Poëtes pour vne maligne
 necessité qui contredit souuent aux vertueux, com-
 me elle fit à Hercule: mais la prudence humaine est
 maitresse de telle violente fatalité: Si tu vois beau-
 coup de Feintes en ce premier liure comme la de-
 scente de Mercure, l'ombre d'Hector, la venüe de
 Cybele, Mars transformé, i'ay esté forcé d'en vsar,
 pour persuader aux exilez de Troye que Francion
 estoit fils d'Hector, lesquels autrement ne l'eussent
 creu, d'autant qu'ils pensoiët que le vray fils d'He-
 ctor estoit mort, & aussi que Francion auoit touf-
 iours esté assez pauurement nourri, sans autorité
 Royale, ny aucun degré de mediocre dignité.
 Quelque autre curieux en l'œuure d'autruy mere-
 prendra dequoy ie n'ay suiuy la perfectereigle de
 Poësie, ne commenceant mon liure par la fin, com-
 me faisant embarquer Francion encore ieune, &
 mal experimenté: celuy doit entendre qu'Helenin
 son oncle l'auoit desia enuoyé en plusieurs beaux
 voyages, pratiquer les mœurs des peuples, & des
 Rois: & qu'à son retour en Cahonie où son Oncle
 & sa mere habitoient, fut pressé de partir par la cō-

trainte du destin, imitant en cecy plustost Apolloine Rhodien que Virgile, d'autant qu'il ma semblé meilleur de le faire ainsi: & si tu me dis qu'il combat trop tost, & en trop bas aage le Tyran Phouere, ie te responds qu'Achille combatit en pareil aage, & renuersa les forteresses des alliez de Troye, ayant à peine laissé la robbe de femme qu'il portoit. son fils Pyrrhe fit de mesme, & beaucoup dauâtage si nous voulons croire à Quinte Calabrois: Or Lecteur pour ne te vouloir trop vendre ma marchandise, ny aussi pour la vouloir trop mepriser, ie te dy qu'il ne se trouue point de liure parfait, & moins le miē, auquel ie pourray selon la longueur de ma vie, le iugement, & la syncere opinion de mes amis, adiouster ou diminuer, comme celuy qui ne iure en l'amour de soy mesmes, ny en l'opiniastrété de ses inuentions. Je te suppliray seulement d'une chose, lecteur, de vouloir bien prononcer mes vers & accommoder ta voix à leur passion, & non comme quelques vns les lisent, plustost à la façon d'une missiue, ou de quelques lettres Royaux que d'un Poëme bien prononcé: & te supplie encore de rechef où tu verras cette merque! vouloir un peu esleuer ta voix pour donner grâce à ce que tu liras: Bref quand tu auras acheté mon liure ie ne te pourray empescher de le lire ny d'en dire ce qu'il te plaira comme estant chose tienne, mais deuant que

me condamner, tu pourras retenir ce Quattrin par lequel i'ay fermé ce preface pour fermer la bouche à ceux qui de nature sont enuieux du bien & de l'honneur d'autrui.

*Vn list ce liure pour aprendre,
L'autre le list comme enuieux:
Il est aisé de me reprendre
Mais malaisé de faire mieux.*

Tu excuseras les fautes de l'Imprimeur: car tous les yeux d'Argus ny verroient assez clair: mesme en la premiere impression.





SONNET EN FAVEUR DE
MONSIEVR DE RONSARD,
& de sa Franciade.

QUELLE si docte main & quel papier si blanc,
Ronsard, dymoy de grace, eternise ta gloire?
Quelle plume de Cigne, & quelle ancre si noire,
De l'oubliense mort se deliure si franc?
Quelle faueur des Dieux, te retire du rang
Obscur des Ignorans! Que dis-je du rang? voire
Te fait seul & premier qui du Loir & de Loire,
Fais si haut retentir & l'un & l'autre flanc?
De quelle cire vierge as tu tiré le miel
De si douces chansons? Quelle alle iusqu'au ciel,
Hardy, s'a esleué! Et par quelle carriere?
Laisse tu vn Virgille, & vn Homere arriere?
Le premier vers, Ronsard, de ta grãd FRANCIADÉ
Vault toute l'Eneide & toute l'Iliade.

RENE BELLET ANGEVIN.



LES ARGVMENTS DES QVATRE
PREMIERS LIVRES DE LA FRANCIADE,
par Am. lamyn.

Argument premier.



N ce laborieux ouvrage de la Frâciade l'Auteur s'est proposé la façon d'escrire des Anciens, & sur tous du divin Homere: Combien qu'en ce premier liure il ait principalement imité Homere & Virgile, si est-ce que l'embarquement de Francus est à l'imitation d'Apolloine Rhodië. Il ressemble à l'Abeille

Laquelle tire son profit de toutes fleurs pour en faire son miel, aussi sans iurer en l'imitation d'un des anciens plus que des autres, il considere ce qui est en eux de meilleur, dequoy il enrichist (comme toujours il a esté heureux) nostre langue françoise. Or pour venir à ce premier liure, qui est côme le fondement & proiecç du reste du bastiment, l'argument est tel: Apres que Frâcus fut retourné du long voyage où son oncle Helenin l'auoit enuoyé en diuerses nations pour en aprêdre les meurs & façôs, & par telle cognoissance se rédire sage, ruzé & pratiq capitaine, ce qu'Helenin auoit fait, ne voulant qu'il fust reconnu pour enfant d'Hector entre les Grecs, lesquels pensoient pour certain que Pyrrhe fils d'Achile l'eust fait mourir le precipitant du feste d'une tour, Iupiter qui l'auoit sauué du sac de Troye & en lieu du corps vray auoit baillé vne feinte de luy à ses ennemis, se resouenant du destin pour lequel il l'auoit garenty de si cruelle mort, & se repentant de la destruction de Troye, enuoye Mercure messager des dieux vers Helenin oncle paternel dudit Francus, afin qu'il l'aduertisse qu'elles sont les de-

destinées de Frâncion son neveu, lequel depuis vn an laissoit rouiller sa ieunesse d'oisiueté sans soucy de reueler sus l'honneur de ses ayeulx: Helenin apres auoir ouy le commandement de Iupiter, aussi que son esprit prophetique auoir preuoyance des destins, & presagioit la grandeur de son neveu fils d'Hector, Luy feit equiper quelque nombre de nauires, dans lesquelles il s'embarque & laisse Buthrote ville d'Epire où il faisoit sa demeure avec son oncle & sa mere Andromache: Le Poëte luy donne compagnie d'hômes guerriers par vne belle & gentille inuention: car le iour du mandemēt de Iupiter, tous les Troyés banis estoient assemblez par le congé des Princes de la Grece pour choumer la feste de Cybelle leur Deesse, tous equippez d'armes telles que souloient porter les Corybâtes & Curetes, quand ils celebrent les honneurs de la mere des Dieux: Iunon se courrouce, voiat que la gloire des Phrygiés doit resflorir: Cybele & Mars fauorisent Frâncion & luy enflamēt le cœur du desir de louange & de vertu. Helenin luy enseigne sommairement quel chemin il doit tenir sur la mer pour venir de Crete à l'emboucheure du Danube.

Argument du second liure.

Neptune gardant encore son courroux contre les Troyens à raison du pariure Laomedon, employe (outre ses forces) la puissance de Iunon d'Iris & d'Aeole pour se vanger sur Francus voulant enseuelir luy & ses destins sous la mer. Frâncion tourmenté des tempestes & ayant perdu tous ses vaisseaux fut poussé cōtre des rochers de l'Isle de Crete en laquelle vn Roy nommé Dicæ le reçoit avec toute honesteté & liberalité. Ce Roy courant vn Cerf rencōtre d'auāture ces Troyés endormis sur le riuage recreus de travail & lassitude: Cybele auoit enuoyé à ce Roy le Dieu du Somne en songe pour luy donner enuie d'aller à la chasse ce mesme iour: Frâncion fait entendre à Dicæ son nom son païs & sa ville & l'occasion de son nauigage & son naufrage. Les fantosmes de ses compagnons que la tempeste auoit engloutis se presentent à luy

la nuit suiuaute ausquels il dresse des tombeaux vuides appelez en Grec *καταφύγιον* & leur fait des obseques. Apres il supplie la Deesse Venus qu'elle les vueille garder & fauoriser: Venus enuoye son enfant Amour pour bleïsser & rēdre amoureuses les deux filles du Roy nōmées l'vne Clymene, & l'autre Hyante, au mesme instāt que Françion arriueroit au chasteau. Il se fait vn festin où Terpin chantre tresexcellent chante vn bel Hymne d'Amour. Dicæe triste conte à Françion la cause de sa tristesse, & comme son fils Oræ est detenu prisonnier soubz la Tyrannie du Gean Phouere, Françion s'offre à combattre le Gean, ce qu'il fait de si magnanime courage & avec telle prouësse & dexterité qu'il le tue, & retire Oræ de sa captiuité. Dicæe bien ioyeux ambrasse le veinqueur & chante son honneur.

Argument du troisieme liure.

Ce liure contient les amours d'Hyante & de Clymene: Clymene au cōmencement par grand artifice, & par belles & cōme iustes remontrances s'efforce d'arracher l'affection amoureuse du cuer d'Hyante sa sœur afin que toute seule elle puisse iouir de l'amour du Prince Troyen. Ces deux sœurs vont au temple pour sacrifier aux Dieux afin qu'ils destournent toute mauuaïse passion de leurs esprits: Le fils d'Hector va sur le riuage de la Mer où il adresse sa priere à Apollon. Leucothoë fille de Proteé luy prophetise ses fortunes à venir & Dicæe offre au seigneur Troyen sa fille Hyante en mariage lequel le remercie s'excusant sur le destin. Oræe fils du Roy immole vne Ecatombe aux Dieux, Terpin chante vn bel Hymne à la Deesse Victoire. Venus changée en la vieille prestresse d'Hecate vient au cheuet d'Hyante & enuironne le liēt, de sa ceinture pleine d'estrange vertu. Francus celebre les funerailles d'vn grand Prince son cher amy, ie me doute que l'auteur entend icy dessous quelque grand Capitaine de nostre temps. Clymene furieuse, par le conseil de sa nourrice tasche de flechir Françion par vne lettre amoureuse: Cybele tranformée en Turnien cō-

pagnon de Francus l'admoneste de courtizer Hyante pour a-
prendre & scauoir d'elle les Rois lesquels doiuent sortir de son
sang: la mesme Deesse s'en vole apres en l'Antre de la Ialousie:
La Ialousie infecte de son venin la poitrine de Clymene. En
fin Clymene poursuiuant son faulx Dæmon tourné en la fi-
gure d'un sanglier s'eslance dedans le goufre de la mer. Les
Dieux en font vne Deesse marine.

Argument du quatriefme liure.

Dicæ se courrouce sachant la mort de sa fille Clymene, &
pense comme il doit punir Francion qu'il soupçonnoit en estre
cause. Ce Prince Phrygien fait entendre à Hyante l'amour
qu'il luy porte: Hyante & Francus vont le lendemain au
temple: vne corneille parle & aduertist Amblois de n'ac-
compagner Francion: Ce Prince supplie Hyante de luy mon-
strer les Rois qui sortiront de son estoq. Hyante discourt si elle
doit aimer ou non: Elle commande à Francion d'aprestre
vn sacrifice aux esprits des enfers, & se parfumer d'encens mas-
le & autres semblables suffumigations: Il obeit à ce comman-
dement: Le Poëte décrit vne fosse & horrible descente aux en-
fers: Apres que Francus a immolé la victime & inuqué tou-
tes les puissances de l'empire de Pluton, Hyante vient toute
trablante & folle de fureur, laquelle prophetise audit Fran-
cus son voyage es Gaules: Elle predit le songe du fantosme qui
doit aparoirre à Marcomire, & ce que fera Marcomire ayant
en son armée trois cens capitaines. Apres elle discourt comme
les Ames viennent & reuont en nouueaux corps, & de quoy
tout ce qui est viuant en ce monde prend sa naissance. Que de-
uiennent les ames le corps mourant, quelle punition elles en-
durent aux enfers pour leurs pechez, & comment elles s'en
purgent, & par quel espace de temps. Francion sacrifie de re-
chef aux Deitez infernales, & les ames sortent incôtinent pour
boire

boire du sang de la victime. Lors il demande à Hyante qui sont ceux qu'il voit, & par ce moyen apprend sommairement l'un apres l'autre les noms des Rois de France, les actes infames des vitiex : & les gestes magnanimes des vertueux. Bref ce liure est des plus beaux pour estre diuisé en quatre parties : la premiere est d'amour, la seconde de Magie, la troisieme de la philosophie pythagorique apelée par les grecs *μεταμύχνορις* : l'auteur se sert exprés de cette fausse opinion afin que cela luy soit comme vn chemin & argument plus facile pour faire venir les esprits de noz Rois en nouueaux corps; Car sans telle inuention il eust fallu se montre plustost historiographe que Poëte: La quatriesme partie consiste au narré de la premiere generation des monarques de France iusques à Charles le grand duquel commence la seconde generation.





IN FRANCIADA P. RONSAR-
DI AD CAROLVM REGEM
G. Valens Guellius.

G Reco igni Troie populandâ que mœnia ferro
Fatidico cæcus dum canit ore senex,
Ne sic posse quidem deleri certior auctor
Troiam omnem spondet, Dardaniûmque genus,
Priamidis vir Phabi orbis promittit habenas,
Pergama Neptuni vel rediuiua fide:
Hectoris hoc manes responsum ulciscitur, inde
Cæpit & Aurora letior esse torus,
Hanc reor & pridem voluens sub pectore sortem,
Carole, te & fratres indigitare tuos,
Augurii que fide tantò maiore teneri,
Quò magis Atridis Græca camæna fauet,
Scilicet expressit inimico à vate Sacratius
Æneadûm Danaïs fata timenda furor,
Fors & Mæonides possit te rege renatus
Corpore Ronsardi nube latere noua,
Sera sua ut tandem præsens oracula firmet,
Et pandat fato debita regna tibi,
Possit & interdicto aliis superesse labori,
Qualis Alexandro Coa dicata manus,

*Solius ut solus tua cūm cantauerit aëta,
Suspendat Phæbo dona reposita tubam,
Vt cūque est, seu Mæonius, seu musa reuixit
Vt tu à Pelide cura secunda fores,
Non posthac patria incerta iactabitur aura,
Natales tantos prodidit ipsa dies,
Vindocinum, ut Delos Phabi, si vindicat ortus
Ronsardi, cur non possit Homere tuos?*

AV SEIGNEUR DE RONSARD.

IL ne te faut, Ronsard, ny louer, ny chanter,
En chantant noz ayeulx, tu te chantes comm'eux,
Du chant du rosignol, & sons harmonieux
Du grand cigne François nul ne pourroit doubter:
Mais si quelque Zoile à ta muse attenter
Vouloit, qui ta logè si auant dans les ciens,
Luy souuienne comment Bacchus pour vn des dieux
Des Pirates cogneu se faisoit redouter
Le Lierre & la vigne à sa marche naissoit,
Le vin deffous ses pieds la carene emplissoit:
Ou, Ronsard, que ton chef honneste se manie,
Sourd corymbe, & Laurier, de ton pied l'hippocrene,
Les Corsaires poissons deuindrent pour leur peine,
Plus muette qu'eux tous tu rendras ton enuie.

P P.



IN P. RONSARDI FRANCIADA.

AB Ioue qui stirpis ducis cunabula nostræ,
Celticæque in Phrygios nomina condis auos,
Ronsarde, est tibi cum nostra communis origo
Hæc gente, at proprium das tibi musa decus.
Hæc duce de Danaò statuis victore trophæum,
Vestæ ignes Troiam, Palladiûmque refers,
Pergama & argutis fidibus congesta reponis,
Qualis sub magno Laïmedonte deus,
Procuras temerata tuæ delubra Minerva,
Numinibus Phæbi vindicis vltus auos,
Insultat, nec inulta, feris Cassandra Mycenis,
Confatalis amor vatibus atque Deo,
Versis ut fatis miserabile lugeat Argos,
Inuideat sub humo Mæonidèsque tibi.

P P.

*France tuo frueris rediniuus sole soloque,
Ronsardi Francis te tuba restituit.*

I. DE LAVARDIN.



IN PETRI RONSARDI FRAN-

CIADA IO. AVRATVS

Poëta Regius.

Iuppiter è Phrygia seruauit turre cadentem
Fictò dissimulans Astyanacta dolo.
Scilicet ut Francos mutato nomine Reges
Conderet, unde suos Francia iactat auos.
A Ioue seruata periisset tempore rursus
Astyanactæ gloria tota domus.
Ni Iouis exemplum tu nunc Ronsarde secutus
Fictis seruasses Astyanacta modis.

IN P. RONSARDI FRANCIADA.

AEmula Smyrneo contendens Mantua ciui
Liquerat incertis nutantia præmia Musis.
At nunc, Virgilius magno ne pugnet Homero,
Sustulit ambigua tandem certamina palma
Francias, & veterem litem interiecta diremit.
Sic medius, Ronsarde, sedes, tanta arbiter artis
Vt neuter primus, sed sit tibi uterque secundus.

I. PASSERATIUS.



SONNET.

Autant que la trompette ame du belliqueur
Passe d'un son hardi la musette rurale,
Autant Ronsard ta Muse à qui rien ne s'égalle
Des vieux & des nouveaux te chante le vainqueur.
Pan quitteroit sa flute & du Thebain sonneur
L'ode tant rechantee en ses monts de Menale
Pour escouter l'accord de ta chanson royale,
Et ton vers de Francus & de Charles l'honneur.
Qui dira maintenant, si par toute l'Europe
Florist le chœur diuin des sœurs de Calliope
Que l'auteur de leur estre est le grand Iupiter?
Hé qui n'entend crier les Muses par la France?
Iupiter ne se doibt nostre pere vanter,
Le cerueau de Ronsard nous a donné naissance.

AMADIS IAMIN.



SONNET.

Qui m'ozera nier la vieille opinion
De naistre en nouveaux corps, si docte il cõsidere
Reuiure en cet auteur Virgile aueq Homere
Qui semblables ne font qu'une entiere union?
Trois unitez en tout font la perfection
Et pour la Poësie en ces trois un, parfaire,
Il failloit ce troisieme au nombre satisfaire
Egal à la romaine & greque nation.
Celuy qui veut peindre au vis toutes les Muses
Et les saintes fureurs par Apollon infuses
Et le dieu Delien qui les poëtes fait,
Bref qui veut en tableau montrer la Poësie,
Deesse qui du ciel tombe en la fantasie,
Qu'il tire de Ronsard seulement le portrait.

AMADIS IAMIN.



P *VIS* que tu es le premier de ton art,
On ne te doit de fueilles couronner:
Mais bien il faut que les roses Ronsard
Puissest tousiours ton front enuironner.

SI. NICOLAS
segretaire du Roy.





SONNET.

A P. DE RONSARD.

RONSARD tu dois l'honneur de ce di-
 uin ouvrage,
 Aux gestes de Fræcus tige de tant d'ayeulx
 Noꝝ Rois, de qui le bras aux armes glo-
 rieux

A conquis par le fer des Gaules l'heritage.
 Ta gloire doit encore à Charles dauantage
 Qui leue par ses faits ton esprit iusqu'aux tieux,
 Vn fertille suiect nous rend ingenieux
 Et plus qu'un Apollon nous enfle le courage.
 Homere sans les faits d'un Achille & d'Hector
 Fust aujourdhuy sans nom: mille anciens encor
 En faisant viure autrui viuent en leur memoire:
 Vn sçauant Escrinain n'est rien que le miroir
 Qui la morte vertu viue nous fait renoir,
 Et de l'auteur des faits il enfante sa gloire:

DE TROVSSILH.





*Tel fut Ronsard, auteur de cét ouvrage,
Tel fut son œil, sa bouche & son visage,
Portrait au vis de deux crayons diuers:
Icy le Corps, & l'Esprit en ses vers.*



SONNET.

A P. DE RONSARD.



ES beaux vers animez de la sainte
fureur
Qui roule de Permesse, au ciel ont fait
querelle:
Amour se dit seigneur de la source im-
mortelle

Dont premier tu puisois vne si douce humeur.

Mars armé de ta main, & de la viue ardeur

Qui fait viure les Rois malgré l'onde cruelle,

Iure l'œuvre estre sien, comme la troupe belle

Des vierges d'Helicon, ne t'en iuge l'auteur.

Quant le Dieu Delien, le pere de ta lyre,

Et pere de tes vers, humain, apaise l'ire

De ces Dieux mutinez: C'est bien & vous & moy.

Dist-il, qui luy donnons cette aleine diuine,

Mais autre Dieu là bas n'échauffe sa poitrine,

Que la sainte faueur de CHARLES son grand Roy.

R. BELLEAV.

6 ij





*Tu n'as, Ronfard, composé cet ouvrage,
Il est forgé d'une royalle main,
CHARLES^s scanant victorieux & sage
En est l'auteur, tu n'es que l'escriuain.*

A. I.



LE
PREMIER LIVRE DE
LA FRANCIADE,



AV ROY.
TRES-CHRESTIEN, CHARLES,
NEUVIEME DE CE NOM.

PAR PIERRE DE RONSARD,
GENTILHOMME VANDOMOYS.



VS qui tiens les sommets de
Parnasse
Guide ma langue, & me
chante la race
Des ROYS FRANCOYS
Yssuz de Franson
Enfant d'Hector troyen de
nation,
Qu'on apelloit en sa ieunesse
tendre

Astyanax, & du nom de Scamandre:
De ce Troyen raconte moy les maux,
Guerres, deffaings, & combien sur les eaux

Il a de fois (en despit de Neptune
Et de Iunon) surmonté la Fortune,
Et sur la terre eschapé de peris,
Ains que baslir les grands murs de Páris.

CHARLES MON PRINCE enflez moy le courage,
En vostre honneur i entrepren cet ouurage,
Soyez mon guide, & gardez d'abismer
Ma nef qui flotte en si profonde mer.

Desia vingt ans auoient franchi carriere,
Depuis le iour que la Grece guerriere
Auoit brulé le mur Neptunien:
Quand du haut Ciel le grand Saturnien
Iettant les yeux dessus Troye deserte,
Fut courroucé d'une si grande perte:
D'un chef despit sa perruque esbranla,
Puis au Conseil tous les Dieux apela.

Du Ciel d'airain les fondemens tramblerent
Desous le pié des Dieux qui s'assemblerent
Allant de ranc en leur siege apresté:

Lors Iupiter pompeux de maieslé
Les surmontant de puissance & de gloire,
Haut se sleva sur son trosne d'ivoire
Le sceptre au poing, puis fronsant le sourcy,
Renfrongné d'ire, aux Dieux parloit ainsi.

Je n'ay iamais telle douleur receüe
Pour les Mortels ne pour les Dieux conceue,
Que ie sy lors qu'on bruloit Ilion:
Quand le cheual enflé d'un million

D'hommes guerriers, de sa voute fermée
Versa dans Troye vne moisson armée
D'espieux d'escuz de lances & de dards,
Flambans és mains des Argives souldards:

Non seulement les Dolopes gens d'armes
Passoient les corps par le tranchant des armes,
Mais noz maisons, sacrileges, pilloient
Et de leurs Dieux les autels despoilloient,
Qui nuit & iour par la ville Troyenne
Nous honoroient d'une odeur Sabeene:

Là forcenoient deux tygres sans mercy
Le grand Atride, & le petit aussy
Ioyeux de sang: le carnacier Tydide
Et le superbe heritier d'Acacide,
Le grand Ajax seigneur du grand boucler:
Leurs morrions brilloient comme un esclair
Qui cà, qui là seclatte de la nuë:

Ces furieux pauoient toute la rue
D'un peuple au lit surpris & deuestu,
Du fer ensemble & du feu combattu.

Ainsi qu'on voit une fiere lionne
Que la fureur & la faim espoissonne
Trancher macher le debile troupeau:
Entre ses dens sanglante en est la peau
Qui pend rompue en sa machoire teinte:
Le Pasteur fuit qui se pasme de crainte!

Ainsi les Grecs detailloient & brisoient
Le peuple nu: Les feux qui reluisoient

Sur les maisons à flammes enfumées
Donnoient lumière aux Princes des armées
Au meurtre au sang: Vn si cruel effort
Montroit par tout l'image de la Mort.

Et toy Iunon dessus la porte assise
Hastois les Grecs ardans à l'entreprise
Auecq Pallas (qui sur le haut sommet
Du premier mur, horrible en son armet
Que la Gorgone asprist de meinte escaille)
De sa grand pique esbranloit la muraille
Coup dessus coup, & d'une forte voix
Comme vn tonnerre apelloit les Gregeois
Les animant à la vengeance pronte,
Dont toutes deux deuriez rougir de honte,
D'auoir destruit vn royaume si beau,
Fait qu'Ilion n'est plus qu'un grand tombeau,
Et que Priam monarque de l'Asie
Sang de sur sang a respendu sa vie
Sur ses enfans, qui auoit surmonté
Tous les mortels en iustice & bonté,

Ce Roy pleurant son estat miserable
En cheueux gris en barbe venerable
Du cruel Pyrrhe indignement pressé,
Sur mon autel me tenoit ambrassé:
Quand il receut en sa gorge frappée
De l'Achillin le reuers de l'espee,
Qui d'un grand coup le chef luy decola:
Bien loing la teste en sautellant alla!

Le corps sans nom sans chaleur & sans face
Comme vn grand tronc broncha dessus la place.

Cet arrogant qui les Dieux despitait
Qui de fureur son pere surmontoit,
Non seulement sur la troyenne place
Cœur sans mercy tranchoit la populace,
Mais outrageoit le sexe feminin
Qui de nature est courtois & benin.

Il poursuivoit au trauers de la flame,
Du preux Hector Andromache la femme
Qui gemissant pourneant son destin,
Escheuclée, auoit à son tetin
Son fils pendu, en qui le vray image
Du grand Hector estoit peint au visage:

Des bras aymez ie derobé le fils
Lors en sa place vne Feinte ie fis,
Que ie formé du vain corps d'une nuë
Pour estre vn iour en lieu de luy conneuë
Du tout semblable à l'heritier d'Hector,
Mesmes cheveux cresseluz de fin or
Les mesmes yeux le front mesme & la taille:
Puis cette Feinte à la mere ie baille
Pour la donner à Pyrrhe: & tout soudain
Enueloppant l'enfant dedans mon sein
Loing le sauuy de l'espée homicide:
Le vain sans plus fut proye d'Aeacide!

Ie l'aduerty d'aller trouuer apres
Son fils au temple, où deux cheualiers Grecs

Je ne veux plus qu'il languisse en paresse
Comme incogneu sans Sceptre & sans honneur,
Mais tout remply de force & de bonheur,
Je veux qu'il aille où son destin l'appelle
Tige futur d'une race si belle:
Sans plus en vain consommer son loisir
Parte delà : tel est nostre plaisir:

Il dist ainsi: les Dieux qui s'esleuerent,
Tous d'un accord sa parole aprouerent
En murmurant comme flots de la mer
De qui le front commence à se calmer,
Quand Aquilon assoupist son orage,
Et l'onde bruit doucement au riuage.

Les Dieux s'en vont, Iupiter ne bougea,
Puis de tels mots son épouse outragea.

Or pour t'ouurir, lunon, les destinées
Qui pour Francus au ciel sont ordonnées
Je te diray (si tu le veux sçauoir)

Que meint trauail ce Troyen doit auoir
Par ton courroux qui les meilleurs offense:

„ Tout cueur de femme est aspre à la vengeance.

Il doit souffrir meint peril sur la mer,

Tantost icy, tantost de là ramer

Pendu sur l'onde: il doit voir meint riuage,

Meinte cité, & meint peuple sauuage,

Meint Roy, meint Prince, & cennoistre leurs cueurs

Leurs volonte, leurs façons & leurs mœurs.

Doit voir la terre cù plein de vagues noüe

A gros bouillon, le cours de la Dunoüe,

Doit espouser l'heritiere d'un Roy
De Germanie: Ainsi la Parque & moy
Donnons arrest que les grands roys de France
D'un sang meslé prendront un iour naissance
Conioinct ensemble au Troyen & Germain.

De là Francus magnanime à la main
Pasteur guerrier d'une troupe infinie
Doit surmonter les champs de Françonie
Qu'il nommera de son nom redouté: ¹

Là le malheur par qui l'homme est donté,
Le ravira de sa femme espousée
Grosse de luy: l'invincible fusée
Du fier Destin ne veut que ce Troyen
Mene une femme au champ Parisien.

De là veigneur trauersant l'Alemagne
Voiira du Rhin le grand canal qui baigne
La riche Gaule (où suant de travaux
Pour rafraichir gendarmes & cheuaux)
Ce fleuve amy boira quelque iournée:

De là suiuant sa longue destinée
Tout flamboyant en l'esclair du harnois
Descampera du riuage Gaulois.

Comme un torrent qui s'enfle & renouuelle
Viendra couvrir les champs de la Mozelle,
Puis en l'honneur de son oncle Pâris
Aux bords de Seine ira fonder Pâris
Siege royal d'un sceptre si superbe.
Or ce Pâris qui maintenant n'est qu'herbe,

Isle serrée entre deux flots tortuz,
Dedans le Ciel ennuoira ses vertuz,
Et ses maisons en marbre elabourées
Voisineront les estoilles dorées.

Deuant le mur meint combat se fera,
Seine, de meurtre à bouillons senslera
Tournant sanglante à courses vagabondes
Hommes cheuaux & armes sous les ondes.

Mais ce Francus par hauteſſe de cuer
Des ennemis sera toujours veinqueur.

Incontinent que la belle victoire
L'aura couuert d'eternelle memoire,
La ſaiët des Cieux immortal citoyen:
En peu de iours le braue nom Troyen
Perdra son luſtre, & la ville deſerte
Sera de poudre & de buiſſons couuerte.

Mais auſſi toſt que les deſtins auront
Parfaits leurs cours, vn Prince Pharamond,
Prince de haute & ſuperbe penſée,
Fils d'un des fils de la Royne laiſſée
En Françonnie, eſtant Germain conceu,
Et des Troyens de droite ligne yſſu,
Suiuant l'Oracle & ma voix veritable,
Fait Capitaine aux peuples redoutable,
Par l'Alemagne vn camp amasſera
Qui les ſablons de nombre paſſera.

Le Ciel luira ſous l'eſclair de ſes armes
Et ſes ſoldats ſes pietons ſes genſ d'armes

Les uns à pié, les autres en cheuaux
Rompront la terre, & tariront les eaux.

De luy naitra le grand Roy Merouée
Par qui sera la ville releuée
Et les honneurs de son ayeul Francus.

Ayant la gaule & les gaulois vaincuz
Ores par ruse, & ores par bataille,
Rebastira de Páris la muraille
Et de rempars son mur enfermera:

La gaule apres de Francus nommera
Chef des François, qui pour la souuenance
D'un si grand prince aura le nom de France.

De Meroué des Peuples conquereur,
Viendra meint prince, & meint grand empercur
Haut esleuez en dignité supresme:
Entre lesquels vn Roy CHARLES neufiesme,
Neufiesme en nom & premier en vertu
Naitra pour voir le monde combatu
Desous ses pieds, d'où le soleil se plonge,
Et d'où ses rais sur la terre il allonge,
Et se lançant de l'humide seiour
Aporte aux Dieux & aux hommes le iour.

Iamais Hercule en tournoyant la terre,
Ny l'Indian remparé de lierre
L'un en son char & l'autre à pié, n'eut tant
Le glauiue au poing d'honneur en combatant,
Bien que l'un ayt à grand coups de massüe
Assommé l'Hydre & les fils de la Nuë,

Et l'autre armé de Thyrses menaçans,
Ayt surmonté tant de peuples puissans.
De ce grand Roy ie n'ay borné l'empire,
L'an si dispos qui se change & se vire
Cassant des Rois les sceptres & la loy,
Ne perdra point l'empire de ce Roy,
Qui florira comme vne chose ferme
En son entier, sans limite & sans terme.

Toutes grandeurs desous luy prendront fin
Maistre du monde: Ainsi le fort destin
L'a fait escrire és voutes azurées
Du plus haut Ciel en graueures ferrées,
Estant ce Roy du monde spatieux
Entier seigneur, & moy de tous les Cieux.

Et si tu veux contre nous entreprendre
Tu te verras au milieu de l'Air pendre,
Puis à tes pieds, lunon, i'attacheray
Ma grosse enclume, ou ie te chasseray
D'un tour de bras par le trauers des nuës:
Ou sous le creux des terres inconnuës
Ie t'enuoiray pour iamais ou long temps
Dans les enfers compagne des Titans,
Et te feray à ton malheur connoistre
Que ie suis seul ton espoux & ton maistre.

Disant ainsi, Mercure il apela.
Mercure adoncq legerement alla
Pront messager, qui aux Dieux obtempere
Deuant le trosne où l'apeloit son pere.

Volle, descens, où Francus est nourry
Di que ie suis ardentement marry
Contre sa mere & ceux qui le retiennent,
Et des destins promis, ne leur souuiennent.

Ie ne l'ay pas du feu gregois sauué
Pour estre ainsi de paresse agraué,
Vn fait-neant en la fleur de son age,
Mais i'esperois que d'un masse courage
Iroit vn iour des Gaules surmonter
Le peuple dur, & fascheux à donter,
Chaut à la guerre, & ardent à la proye
Pour y fonder vne nouuelle Troye.
Pource desloge, & le fais en aller :
Le temps perdu ne se peut r'apeler.

A peinceut dit que Mercure s'apreste:
Sa Capeline affubla sur sa teste,
De Talonniers ses talons afortit,
D'un Mandillon son espaule vestit,
A frange d'or ami-iambe escoulée,

Prist sa Houssine à deux serpens eslée,
Puis se plongeant de son long, en auant
Dedans la Nuë, à l'abandon du vent
Fendoit le Ciel, ores planant des asles,
Ores hachant coup sur coup des aisselles,
Ores à pointe, & ores d'un long tour
Enuironnoit le Ciel tout à l'entour.

Ainsi qu'on voit aux riués de Meandre
L'oyseau de proye entre les airs se pendre

Puis s'eslancer à pointes de roydeur
 Sur les Canards herissez de froideur,
 Tremblans de voir le Gersault qui ombrage
 D'un corps plumeux tout le haut du riuage.

Après qu'il eut de ciel en ciel volé
 Finalement de son talion aslé
 Se vint planter au bord d'une vallée,
 Où Andromache estoit ce iour allée
 Auecq son fils, pour repaistre ses yeux
 Des ieux sacrez à la mere des Dieux.

Ce iour estoit la feste solennelle
 Que tous les ans on choumoit à Cybelle
 Au mois d'Auril, saison où la rigueur
 De son Attis luy eschaufa le cuer,
 Que les Troyens auoient en reuerence,
 De fils en fils l'honorant par usance.

Or' ces captifs en Argos esbanduz,
 De tous costez aux ieux s'estoient renduz
 Par le congé des princes de la Grece,
 Pour celebrer le iour de leur Deesse.

Eux equipez de bouclers & de dards
 Contre-imittoient ces antiqués soudards
 Les Corybans, qui serrez d'une bande
 S'armoient autour de Cybelle la grande.

Les plus vieillards d'un baston secouruz,
 Les iouuenceaux y estoient acouruz,
 Femmes enfans, se souuenant encore
 D'Ide & de Troye, où la Mere on adore.

*A l'impourueu Mercure est arriué
 Qui Helenin discourant a trouué
 (Bien loing du bruit, pres le riuage humide)
 Sur les destins de Francus Hectoride.*

*Le resueillant d'un profond pensément
 Ce Dieu luy dist : Oyle commandement
 De Iupiter, qui courroucé m'enuoye
 Parler à toy par la celeste voye.*

*Va, (ma-t'il dit,) où Francus est nourry,
 Dy que ie suis ardantement marry
 Contre sa mere & ceux qui le retiennent,
 Et des destins promis ne leur souuiennent.*

*Ie n'ay Francus du feu gregeois sauué
 Pour estre ainsi de paresse agraué
 Vn fait-neant en la fleur de son age,
 Mais i'esperois que d'un masle courage
 Iroit vn iour des gaules surmonter
 Le peuple dur & facheux à donter,
 Chaut à la guerre & ardent à la proye,
 Pour y fonder vne nouuelle Troye,
 Dont la memoire en tous temps floriroit,
 Et par le feu i'amaïs ne periroit.*

*Pource Helenin, & toy mere Andromache
 N'acazancz en paresse si lasche
 L'enfant d'Hector, à qui les Cieux amis
 Ont tant d'honneurs & de sceptres promis:
 Qui doit hausser la race Priamide,
 Doit abaisser la grandeur Aexonide*

Doit veindre tout, & qui doit vne fois
Estre l'estoc de tant & tant de rois,
Et par sur tous d'un CHARLES, qui du monde
Doit en la main porter la pome ronde.

Fay luy dresser & viures & bateaux,
Fay le marcher sur l'echine des eaux
Aux lieux promis, où son destin le meine.
„ Vn grand honneur vient d'une grande peine.

Il n'auoit dit, que plustost qu'un esclair,
Haussé d'un vol s'esuanouit en l'air
Loing de la terre, ainsi qu'une fumée
Qui dans la nue en rien est consommée,
Laisant la femme & le mary peureux
De veoir un Dieu venir du ciel vers eux
Plein de menace & d'esperence estrange,
Mellant un blasme avec vne louange,
Qui de frayeur les faisoit emouuoir
Et dueil ensemble & plaisir conceuoir.

En-cependant la ieunesse Troyenne
Haut inuoquant la Bercynthienne
Toute rauie en son nom immortel
D'encens fumeux honoroit son autel:

Les vns auoient leurs perruques conuertes
D'un large pampre au grandes fucilles vertes,
Au nœuds retors des Zephyres soufflez:

Les vns frapoient les tabourins enflex,
Les vns au son de la flutte persée.
Fouloient la terre, autres s'ols de pensée

Comme agitez de fureur sauteloient,
Autres chargez de grands bouclers baloient
Un branle armé, autres de voix aiguës
Faisoient sonner les forestz cheueluës
Et retentir les rochers d'alentour:

Les crus-vieillards d'un grand & large tour
Icy dansoient à testes couronnées,

Là, la ieunesse aux plaisantes années
De pieds de mains & de voix respondoient,
Et leurs chansons aux vieillards accordoient.

Le prestre orné d'une Sotane blanche,
Ceint d'une boucle au dessus de la hanche,
Bien enmitré de pin, les deuançoit,
Et les honneurs de Cybelle dansoit.

Entends du ciel tes louanges, Cybelle,
Mere des Dieux, ieune, ancienne, & belle,
Qui as le chef de citez atourné,
Qui as ton char en triomphe tourné
Par deux lions quand toy mere honorée
Montes au Ciel à la voule dorée
Pour au meillen de tes enfans t'asseoir

Sainte qui fais une frayeur auoir
Au cuer malin qui moque tes mysteres,
Ayme-rochers, ayme-bois solitaires,
Mere, Deesse, ayme-bal, ayme-son
De ces Guerriers qui font le limaçon
Autour de toy, quand haute sur ta troupe
Des monts Troyens tu vas foulant la croupe

Pleurant Attis ton mignon tresaymé
Qui fut d'enfant en un Pin transformé.

Tu as choisi des hommes pour compagnes,
Tu as esleu les Troyennes montagnes,
Prenant plaisir au sommet Idean,
Aimant sur tous le peuple Phrygian.

Sois nous propice, ô grande & sainte mere,
Oste noz cols de seruitude amere,
Et de captifs donne nous liberté:
Assez Deesse, assez auons esté
Foulez aux pieds par ceste greque audace.

Donne qu'un iour quelcun de nostre race
Resonde troye, & qu'il repousse encor
Iusques au ciel le noble sang d'Hector,
Redonne nous un royaume, & rassemble
De toutes pars tous les Troyens ensemble:
Dessus la Grece enuoye noz honeurs,
Et nous faits d'elle, & du monde seigneurs.

Disant ces mots il redoubla la danse:
Le peuple suit le Prestre à la cadance:
Le temple en bruit : Cybelle qui ouit
Telle requeste au Ciel s'en resjouit.

En-cependant la pronte Renommée
Au front de vierge, à l'echine emplumée,
A la grand bouche, auoit ia respandu
Que Mercure est du haut Ciel descendu,
Et qu'il auoit d'une voix corroucée
Par Iupiter Andromache tansée,

Et par sus tous Helenin qui sçauoit
L'arrest de fer que le destin auoit
Escrit au ciel pour cet enfant qu'on nomme
Astyanax, qui paresseux consomme
Son âge en vain sur le bord estranger,
Sans du malheur les troyens reuanger.

Cette Deesse à bouche bien ouuerte,
D'oreilles d'yeux & de plumes couuerte
Semoit par tout qu'Astyanax estoit
Enfant d'Hector, & qu'on luy aprestoit
Meinte nauire en armes ordonnée,
Pour aller suivre ailleurs sa destinée,
Prince inuincible, & que seul il feroit
Que le Troyen du Grec triompheroit:
Et qu'il faillloit que la ieunesse active,
Qui par la Grece est maintenant captiue
Suiuist Francus futur pere des Rois,
Qui s'en alloit dedans le champ Gaulois
Replanter Troye & la race Hectorée
Pour y regner d'eternelle durée.

Ainsi disoit la Fame: cependant
Helenin fut songeant & regardant
Au mandement que Iupiter luy donne.

De cent discours en soy mesme raisonne
(Or plein de ioye ores plein de douleur)
Mais ce conseil luy sembla le meilleur:

C'est d'obeir au grand pere celeste,
Donner Francus au destin: & au reste

Faire aprestez & nauires & gens
Sur terre & mer aëtifs & diligens,
Non engourdis de paresse otieuse,
Qui rechaufez d'une ame industrieuse,
Sages pourront les perils euitier,
Et par trauail louanges meriter.

Comme il pensoit, auisa d'auanture
En l'air serain le bon heur d'un augure
Venant du ciel pour signe tresheureux.

Fut un Faucon hautain & genereux
Que deux Vautours poursuioient à outrance
De bec plus forts d'ongles, & de puissance,
Qui cà qui là le Faucon rebatoient
Tournoient viroient poursuioient tourmentoient.
Ne luy donnant ny repos ny haleine
De s'eschaper par la celeste plaine.

Luy pour-neant resistant d'un grand cueur
Trop foible estoit contre telle rigueur,
Quand Iupiter, miracle, le transforme
En une grande & belliqueuse forme
D'un Aigle noir d'audace reuestu.
Comme un rasoir luy fit le bec pointu
Aigu, courbé, & ses serres tortues
Plus que deuant fit dures & pointues.

Lors luy couurant d'un grand ombre les champs
En ses deux pieds aiguise & trenchans
Prist les Autours, les desplume & les tuë,
Et fait veinqueur s'enuola dans la nuë.

D'un œil prudent Helenin aperceut
L'augure bon que soudain il conceut,
Il preuit bien que deux grands aduersaires
Retarderoient Francus & ses affaires,
Et s'opposant à son premier honneur
A forte main empescheroient son heur.
Mais qu'il feroit combatant aparoiſtre
Que de petit deuiendroït vn grand maiſtre,
Et chasseroit ses ennemis deuant
Son camp armé, come vne poudre au vent.

Pource soudain resolu, delibere
Prenant l'aduis d'Andromache la mere,
Et des bons Dieux, & des Peres grisons
Luy aprestes des venteuses maisons,
Pour nauiguer à rames mesurées
Dessus le dos des ondes azurées
Et s'en aller au gré de Iupiter,
„ Contre le Ciel on ne peut resister.

Incontinent par toute Chaonie
Se resspandit vne tourbe infinie
De bucherons, pour renuerser à bas
Meint chesne vieil ombragé de ses bras.

Par les foreſts erre cette grand bande,
Qui or' vn Pin or' vn Sapin demande,
Guignant de l'œil les arbres les plus beaux,
Et plus d'uisans à tourner en vaisseaux.

Contre le tronc sonne meinte congée,
D'un bras nerueux à l'œuvre embesongnée,

Qui meinte playe & meinte redoublant
 Coup dessus coup contre l'arbre tramblant,
 A chef branlé d'une longue trauerse
 Le fait tomber tout plat à la renuerse,
 Auecq grand bruit: Le bois estant bronché
 Fut dextrement par le fer detranché,
 Fer bien denté bien aigu, qui par force
 A grands esclats fit enleuer l'escorce
 Du corps du pin sur la terre estandu
 En longs carreaux & limandes fendu.

Pleine de bois la charrette atelée
 Va haut & bas par mont & par vallée,
 Qui gemissant enroüe sous l'effort
 Du pesant faix, le versoit sur le bord.

Le manouurier ayant matiere prestee
 Or' son compas, ore sa ligne apreste
 Songneux de l'œuure, & congnañt à grans coups
 Dedans les aiz une suite de clous,
 D'un art maistrer les vieux sapins transforme,
 Et de vaisseaux leur fait prendre la forme
 Au ventre creux, & d'artifice pront
 D'un grand espron leur aguise le front.

Les prochains monts qui les bords enuironnent
 Sous les marteaux des charpentiers resonnent
 D'un bruit doublé, qui de loing & de pres
 Fait retentir les parlantes forests
 De Chaonie, où la syme qui tremble
 Apele l'autre & caquettent ensemble.

Ces artizans ayant le fer au poing,
 L'œil sur le bois, & en l'esprit le soing
 Tous à l'enuy fourmilloient sur l'arene.
 Icy l'un faict le fond d'une carene
 L'autre la prouë, l'autre la poupe, & ioinct
 D'un art subtil l'aiz à l'aiz bien à point.

L'autre tirant le chanure à toute force
 Pli dessus pli entorse sus entorse,
 Menant la main ores haut ores bas
 Fait le cordage, & l'autre pend au Mas
 A double ranc des asles bien-venteuses
 Pour mieux voller sur les vagues douteuses,
 Et pour passer sur l'echine de l'eau
 Plustost que l'air n'est passé d'un oiseau.

Incontinent qu'acomply fut l'ouvrage,
 Deuant la prouë on beche le riuage
 Côme un fossé large & creux : pour pousser
 Les nefs qu'on veut en la mer auancer.

Là meins rouleaus à la course glissante
 Ioinctz l'un à l'autre au meillieu de la sente
 Sont estendus, afin qu'en se suiuant
 Les grands vaisseaux glissassent en auant
 De sur leur dos, qui craquetant se vire
 En rond, frayé du faix de la nauire.

Les Matelots à la peine indontez
 Decà de là rangez des deux costez
 Entrepignant des pieds contre la place,
 De mains de bras d'espaules & de face

Poussioient les nefz pour les faire rouler.

Vne sueur ne cesse de couler

Du front fumeux: une pantoise haleine

Bat leurs poumons, tant ils auoient de peine

A toute force en hurtant d'esbranler

Si gros fardeaux pareffeux à couler.

Finalement les nauires poissées

Dedans la mer tomberent esclancées

Ademy-fault, fault qui fut retenu

De l'ancre pris sur le riuage nu.

Il estoit nuit, & le lien du Somme

Silloit par tout les paupieres de l'homme,

Charmant au lit (si doucement lié

Par le dormir) le trauail oublié.

Tous animaux, ceux qui par l'air se iouënt,

Ceux qui la mer entre-coupent & nouënt,

Ceux que les monts & les bois enfermoient

Pris du sommeil à chef baissé dormoient:

L'un sus un arbre, & l'autre desous l'onde,

L'un sous l'horreur d'une forest profonde,

L'autre és rochers un dur giste pressoit

Et de son nez le somme repoussoit:

Mais Helenin qui discourant ne cesse

De repenser, pour le somme n'abaisse

L'œil au dormir, ains veillant & resuant,

Or se couchant & ores se leuant

Mille discours discourt en sa pensée.

Du Dieu courrier la parole annoncée

Le presse tant & presse, qu'en tous lieux
Il a touiours Mercure dans les yeux,
Et dans l'esprit la belle destinée
Qui pour Francus au ciel est ordonnée.

Comme il pensoit cent pensemens diuers,
Voicy saillir du profond des enfers
L'ombre d'Hector en la mesme maniere
Qu'il estoit lors que sa dextre guerriere
Se confiant en l'ayde de ses dieux
Braguard, hautain, superbe, furieux
Haut animant la Troyenne ieunesse
Darda le feu dans les vaisseaux de Grece,
Aiant brisé en mille & mille pars
D'un grand caillou la porte des rampars.
Tel ombre estant au grand Hector pareille
Pousse Helenin, & ainsi le conseille.

Frere trescher qu'en viuuant i'aimois mieux,
Que mon enfant, que mon cueur, que mes yeux
Dont la prudence a regi mon armée,
Or qu'au tombeau ma vie est enfermée,
Et que i'ay peu mon mortel despouiller
Esprit certain, ie te veux conseiller.

Obeis, frere, au grand Dieu qui commande
En ma faueur vne chose si grande:
Les champs gaulois aux troyens sont promis,
Ainsi pour nous le destin l'a permis:
Au Ciel ira de mon enfant la race.

Pource aussi tost que la nouuelle face

Du iour poindra courriere du Soleil,
Fays assembler les peuples au conseil:

D'un œil accort par le peuple regarde,
Les hommes nez d'un age plus gaillarde,
Et par sur tous choisis en tes vaisseaux
La fleur esleuë entre les iouuenceaux,
Pronts à la guerre, & qui pour nul orage
Chauts de l'honneur ne perdront le courage.

Toy bien-heureux demoures icy Roy
Ayant ma femme Andromache chez toy,
Pour ton épouse à toy ferme liée,
Du fils d'Achille à tort repudiée:

Que ta Troye, & ton mur ia parfaict
Sur le patron d'Illion contrefaict,
A Dieu mon sang: D'une longue volée
Te m'en retourne en l'obscur valée.

A peine eut dit: soudain le frere alla
Pour l'accoller, mais l'ombre s'enuola
Loing de ses bras, comme un songe friuolle
Qui au reueil loing des hommes s'enuole
Dedans la nuë, & le voulant alors
Prendre, il ne prist que du vent pour le corps.

Incontinent que l'Aube en-saffrannée
Eut du beau iour la clarté ramenée
Pront hors du lit ce bon Prince sortit.

Premierement sa chemise vestit
Puis son sayon, puis sa cape tracée
En fil d'argent sur l'espaule . troussée,

Prist son espee qui fidelle pendoit
A son cheuet : vn couteau descendoit
Du long la gaine iuoirine, & le manche
Estoit orné de belle agathe blanche.
Le pommeau fut d'un argent cizelé.

Ainsi vestu hors la porte est allé
Le dard au poing, commandant qu'on assemble
Grands & petits au conseil tous ensemble.

Lors les Heraux clere-voix ont sonné
De toutes pars le conseil ordonné:

Le peuple oisif pour nouvelles aprendre
Droit en la place à foule se va rendre:
Luy dans son trosne, honoré se rendit,
Chacun se teut, puis en ce point a dit.

Peuple Troyen, Dardanienne race,
Ce iouuenceau qui par la populace
Vit sans honneur Astyanax nommé,
Est fils d'Heetor que tant auez aymé,
Qui magnagnime en si longues batailles
Dix ans entiers à gardé voz murailles,
Qui le rampart contre terre tua
Des Grecs tranblants, qui Patrocle tua,
Et retourna pompeux dedans la ville
Enuironné du corselet d'Achille.

Or ce grand Roy qui seul commande aux Dieux
Qui honora Heetor, & noz ayeux,
La nuit que Troye estoit un grand carnage,
Sauua l'enfant par vne feinte image:

Sans maïesté, priuë ie l'ay tenu
De peur qu'il fust des Gregeois reconnu.
Ie l'ay transmis par vne longue voye
Tantost vers Thebè & tantost deuers Troyè
Voir le tombeau de son Pere, & aussi
Les noirs enfans de Memnon, qui d'icy
Sont eslongnez, noble race Hectoree
Et de l'Aurore habite la contrée.

En meint país ie l'ay faict voyager,
Il a connu meint peuple & meint danger,
Connu les mœurs des hommes pour se faire
Guerrier pratique en toute grande affaire.

Depuis vn an ce Prince est de retour
Acazané, qui mange en vain le iour
Lent nonchalant, sans imiter la trace
De sa tresnoble & vertueuse race,
Bien qu'il soit braue heureusement bien né,
Et pour hauts faits hautement destiné:
Toujours pour luy ce grand Prince me tanse,
Prince de l'air qui les foudres esclance,
Dequoy si tard ie le retiens icy
Sans de son bien auoir autre soucy.
Encore hier (sa puissance i'atteste)
Que par le ciel en clarté manifeste,
Ie vy Mercure arriuer contre moy
Qui m'effroya du vouloir de ce Roy.

Si tu n'as soing, dit-il, de ta lignée,
Si la vertu de l'heur accompagnée

N'esmeut ton cuer à voyager plus loing,
Au moins conçois en l'esprit quelque soing
De ton nepueu, & n'estoufes perdue
Sa ieune gloire à qui la Gaule deuë,
De qui doit naistre un million de Rois
Qui l'univers tiendront desous leurs loix.

Ce foudroyant seigneur de la tempeste
Qui branle tout d'un seul clin de la teste,
M'a fait du ciel icy bas deualler,
Pour t'auertir de le laisser aller
Où son destin l'apelle & le conuoye
Bastir ailleurs une nouuelle Troye
Dont le renom ira iusques aux Cieux:
Tel est le vueil du grand maistre des Dieux.

Pource Troyens de race magnanime,
Si la vertu hautaine vous anime,
Suiuez ce Duc du destin attiré.

Voicy le iour tant de fois désiré,
Iour qui rompra le seruage si rude
Qui vostre col serre de seruitude:
Courage amis, c'est maintenant qu'il faut
(Vous dont le sang est genercux & chaut)
Accompagner cette belle entreprise
Que le destin dextrement fauorise.

Il vaut trop mieux en liberté mourir,
Et par le sang la franchise acquerir,
Que de languir en honte si vilaine:
„ Vn beau mourir orne la vie humaine.

Il dist ainsi : puis se leuant de là
 Pressé du peuple en son Palais alla,
 Mars qui aymoit Hector durant sa vie,
 De secourir Françion eut enuie,
 En sa faueur fit son Coche ateler.
 Puis fouëtant ses cheuaux parmy l'air
 Qui à bouillons souffloient de leurs narines
 Flames de feu ardantes & diuines,
 Vint s'abaisser sous le pié d'un rocher
 Pres du riuage, où faisant destacher
 Ses beaux coursiers le long d'une verdure,
 Trefle & saint-foing leur donna pour pasture.
 Puis comme un trait roidement s'eslanca
 Dedans Buthrote, où sa forme laissa,
 Et prist les yeux le front & le visage
 La voix le geste & la taille d'Arage
 Là chargé d'ans, vieil compagnon d'Hector.

Celuy portoit la grande targe d'or
 De cet Héros, quand pour garder sa terre
 Sa main estoit plus crainte qu'un tonnerre.
 Or cet Arage auoit toujours esté
 Par les Troyens en grande auctorité.

En ce vieillard le Dieu guerrier se change,
 Autour du front des cheueux blancs arange,
 Se laboura de rides tout le front,
 Marche au baston comme les vieillards font,
 Et d'une voix toute caduque & rance
 Francus aborde, & en ce point le tance.

*Vraye Troyenne, & non Troyen, as-tu
Desia d'Hector oublié la vertu?*

Qui t'engendra pour estre l'exemplaire

Comme il estoit, du labour militaire?

Futur honneur des peuples & des Rois?

As-tu couard oublié ton harnois

Pour (aleché d'ocieuses plaisances)

Vser ta vie en festins & en danses?

Faire l'amour, & tout le iour en vain

Pleines tourner les coupes en la main?

Honte & vergongne où estes vous alées!

Ne vois tu pas que les ondes salées

Pour t'en-mener se couurent de vaisseaux

Dresse l'oreille, entens les iouuenceaux

Qui foule à foule au riuage se rendent

Et tous armez, capitaine t'atendent.

Ton sang trop froid pour un ieune guerrier

Atazané, demeure le dernier

Serf de ta mere, & te fraudes toymesmes

Du haut espoir de tant de Diadêmes,

Et du destin qui t'apele aux honneurs

Pour commander aux plus braues Seigneurs.

„ *Rien n'est si laid que la froide ieunesse*

„ *D'un fils de Roy qui se rouille en paresse.*

Tel n'estoit pas Hector le pere tien,

Qui des Troyens fut iadis le soutien:

Armes, cheuaux, & toute guerre active

Furent ses ieux, & non la vie oysive.

Qui te charmant, d'un somme t'a lié
Ayant ta ville & ton pere oublié,
Que la vertu compagne de la gloire
A mis au ciel, en terre la memoire.

Montre à ce peuple au cueur morne & peureux
Que tu es fils d'un pere genereux,
L'homme ne peut seignaller sa noblesse
S'il n'a le sang eschaufé de proësse.

Disant ainsi ce grand Dieu belliqueur
De Françion enflama tout le cueur,
Luy déchira le bandeau d'ignorance
Et le remplit d'audace & de puissance.

Il luy souffla un honneur dans les yeux,
Le fit ardant, aux armes furieux,
Et tellement sa proësse ralume
Qu'il aparut plus grand que de coustume.

Si que marchant au milieu des plus forts
Haut releué, de la teste & du corps
Les surpassoit, comme ce Dieu surpasse
Sur le bord d'Hebre, ou sur les monts de Thrace
Tous les Soldas, quand d'ardeur animé
Parmy la presse aparoißt tout armé
Couuert de poudre, & se plante à l'encontre,
D'un meschant Roy, que sa lance rencontre
Pour le punir d'auoir contre equité
Vendu son peuple, ou trahy sa Cité.

Tel fut Francus: apres ce Dieu se mesle
Par les Troyens amassez pesle mesle

Qui se pressioient à foule aux carrefours,
 Luy renfrongné: de mots piquans & cours,
 En les piquant eschausfoit leur courage:

Quoy voulez vous en vergongneux seruage
 Viure tousiours, & sans langue & sans cueurs
 Touiours souffrir l'orgueil de ces veinqueurs?
 Rompez froissez d'une allegresse preste
 Le ioug cruel qui vous presse la teste,
 Sans plus seruir de passetemps icy

A ces Seigneurs qui vous brauent ainsi,
 Resentez vous par vne belle audace
 Du premier sang de vostre noble race:
 Enflez vous d'ire, & vous souuienne encor
 Des mains du cueur du courage d'Hector,
 Qui fut iadis la crainte des plus braues
 De ces Gregeois qui vous tiennent esclaués:
 Vn seul de vous en vaille vn million,
 Et par la mer emportez Ilion.

Encore Dieu qui regarde voz peines,
 Dieu qui a soing des affaires humaines,
 Comme les Grecs ne vous est outrageux:
 „ La Fortune ayde aux hommes courageux!
 Tel aiguillon. leur versa dedans l'ame,
 Vne fureur vne ardeur vne flame
 De liberté, de vaincre & de s'armer,
 Et d'emporter Ilion par la mer.

A tant vn peuple en armes effroyables
 (Comme toisons de neges inombrables

Qu'on voit du ciel espaiſſes trebucher
 Quand l'air venteux noz terres veult cacher)
 Va fremiſſant au bord de la Marine.

Deſous le pas du peuple qui chemine
 Vole une poudre, & ſous le pié qui ſuit
 Pour ſ'embarquer la terre faiſt un bruit:
 Fils ne maiſons ces hommes ne retardent:
 Tristes de loing les femmes les regardent!

Ils s'aſſembloient d'un pied ferme rangez
 De dards d'eſcus & de piques chargez,
 Sonnant bruyant pres des riuës chenues,
 Ainſi qu'on voit les-biens volantes grûës
 Faire un grand cri, quand paſſer il leur faut
 La mer pour viure en un païs plus haut.

Autant qu'on voit dans les creux mareſtages
 Du bas Poitou, oyſeaux de tous plumages,
 Maretz bourbeux, limonneux, & tramblants,
 Oyſeaux gris, vers, jaunes, rouges, & blancs,
 Qui ſ'eſgayant en leur aſles ſe iouënt:
 Les uns ſur l'eau, les autres au fond nouënt,
 Autres font bruit à l'entour de leur Ny
 D'un nombre eſpaix incroyable inſiny,
 Les uns le ciel ombragent comme nuës
 Autres plus bas ſur les riuës connuës
 Sous les rouſeaux, ou ſouz l'ombre des ioncs,
 Oyes, canars, & cygnes au cols longs
 Eſſandent l'aſle, & ſ'eſplument, & crient,
 Qui haut qui bas: Les riuages en bruient!

*Autant venoient d'un magnanime effort
Coupans les champs, d'hommes dessus le bord.
L'riuue tramble, & les flancs qui emmurent
Les flots salez, desous le piéd murmurent
De tant de gens au riuage arrestez,
Tous herissez de morions crestez.*

*Comme un Pasteur du bout de sa houlette,
Souz la clarté de vesper la brunette
Au premier soir, separe ses cheureaux
Des boucz cornuz, des beliers les aignaux.*

*Ainsi Francus d'une prompte alegresse
Des moins gaillards separoit la ieunesse
Au sang hardy, serrant d'une autre part
Vieilles vieillards, & enfans à l'escart,
Qui froids n'auoient ny teste ny poitrine
Pour suporter la guerre & la marine,
Peuple sans nerfs & sans ardeur, que Mars
N'enrosle plus au rend de ses soldars*

*Francus vestu d'armes toutes dorées
Des mains d'un maistre artizan labourees,
Comme l'esclair d'un tonnerre lui soit
Et si grand Peuple en ordre conduisoit,
Monstrant guerrier sa taille bien formée
Ainsi que Mars au meilleu d'une armée.*

*Les morions les piques des soldars,
Et les harnois fourbis de toutes pars,
Et l'emery des lames acerées
Frapez menu des flammes atherées,
Et du rebat du soleil radieux,*

Vne lumiere enuoyoient iusqu'aux Cieux,
 Qui cà qui là comme à pointtes menuës
 En tramblotant s'esclatoit dans les nuës.

Meint estandart ply sur ply se mouuant,
 De tous costez se boufoit par le vent,
 Qui d'un grand ombre ombragoit la campagne
 Et la trompette au haut de la montagne
 Enflant l'airain par enrouez accords
 Faisoit bondir les cueurs dedans les corps.

Adonq Francus qui seul prince commande,
 Pront & gaillard au millieu de la bande,
 Voulant sa main d'une lance charger,
 D'Astyanax en Francus fit changer
 Son premier nom, en signe de vaillance
 Et des soldats fut nommé Porte-lance,
 Pheré-enchos, nom, des peuples vaincus
 Mal prononcé, & dit depuis Francus.

Comme il estoit sur le front de la riue
 Tout eclatant d'une lumiere viue,
 Comme Orion de flammes esclarcy
 Voicy venir Andromache, & aussy
 L'oncle Helenin, qui augure & profette .
 Estoit des Dieux veritable interprete.

Cette Andromache à qui l'estomac fend
 D'aize & d'ennuy, accoloit son enfant
 A plis serrez, comme fait le l'hierre
 Qui bras sur bras les murailles enserre

Mon fils, disoit, que tout seul j'ay conceu
 Autres que toy concevoir ie n'ay scien

Du grand Hector, Ilithie odieuse
De meint enfant m'a esté enuieuse.

Pource le soing que mere ie deuoïs
Mettre en plusieurs, seul en toy ie l'auoïs
Iete pendoy petit à ma memelle,
Ie t'ourdissoy quelque robbe nouuelle,
Seul tu estois mon plaisir & ma peur,
Enfant, mary, seul mon frere, & ma seur,
Scul pere & mere, & voyant la semence
De tous les mieux germer en ton enfance
Me consolais de t'auoir enfanté
Me restant seul de toute parenté:
Du grand Achil les armes & l'audace
Desous la terre ont enuoyé ma race.

Pour toy le iour seulement me plaisoit:
Si quelque ennuy lamenteur me faisoit
Te regardant i'alegeois ma tristesse
Comme soutien de ma foible vieillesse:
Las! ie pensoy qu'au iour de mon trespass
Quand l'esprit vole, & le corps va là bas,
Que tu ferois mes obseques funebres
Clouant mes yeux enfermez de tenebres,
Me lauerois le corps froid de tiede eau,
Et de gazons me ferois vn tombeau
Comme bannie au bord de ce riuage
Car aux bannis ils n'en faut d'auantage.
Serrant ensemble en vn mesme repos
De mon mary les cendres & les os,

Haut inuoquant noz noms, & ce qui reste
De nous apres l'heure extrefme & funeste.

Las! ie voy bien, mon fils, que tu t'en-uois
Bien loing de moy, & que ma triste voix
Comme ta voile au vent sera portée
Demeurans seule icy desconfortée,
Mais pour mon corps qui n'atend que sa fin
Ne laisse fils à suiure ton destin.

O Iupiter si la pitié demeure
La haut au ciel, ne permets que ie meure
Ains qu'il se face en armes vn grand Roy
Et que le bruit en vole iusqu'à moy!

Donne grand Dieu, qu'au milieu de la guerre
Puisse ruer ses ennemis par terre
Mordants la poudre à chef bas renuersez
D'une grand playe en l'estomac persez.

Que des citez la puissante muraille
Trebusche à bas en quelque part qu'il aille
Soit à cheual soit à pié guerroyant,
Et que quelcun s'escrie en le voyant
(Fauorisé de fortune prospere)

Le fils vaut mieux aux armes que le pere.

Disant ainfi, pour present luy donna
Vn riche habit que sa main façonna,
Où fut portraite au vis la grande Troye
En filez d'or ioincts aux filets de soye,
Auec ses murs: ses rampars & ses Forts,
Xanthe trainoit à l'enuiron des bords.

Pour passément sa riuiere azuree:
Là se fleuoit la montagne sacrée
Ide neigeuse, où d'argent sautelloit
Meint vif ruisseau qui en la mer couloit.

Au pié du mont fut en riche peinture
Le beau Troyen, qui chassoit d'auanture
Vn Cerf au bois, où Iupiter le vit
Qui par son aigle en proye le rait.

Ce Ieune enfant emporté par les nuës
Tendoit en vain vers Troye les mains nuës:
En l'air rauy ses chiens qui le voyoient
L'ombre de l'Aigle & les vents aboyoient!

Hector auoit cette robe portée
Le iour qu'Helene en triomphe abordée
Entra dans Troye, & depuis ne l'auoit
Mise: sans plus de parade seruoit
Au cabinet, où les plus cheres choses
De ce grand Prince estoient toutes encloses.

La luy donnant, prenez dit-el, mon filz
Ce beau present que de mes mains ie fiz,
Pour gage seur d'amitié maternelle,
Ayant de moy souuenance eternelle.

Ainsi pleurant, Francus elle acola,
Puis esasmée au logis s'en alla,
Où de son corps l'ame estant destachée
Dessus vn lit ses seruans l'ont couchée,
Pour la donner au sommeil adoucy
Qui des mortels arrache le soucy.

En cependant Helenin prend la corne
 D'un grand toreau au col pesant & morne
 Au large front, & de fleurs couronné
 L'a d'une main au riuage amené
 Puis vn grand coup de maillet luy defferre
 Dessus le front: Le toreau tombe à terre
 Sur les genoux à chef bas estandu!
 Il l'egorgea: le sang s'est respandu
 A longs filetz au fond d'une grand' tasse:
 Dedans le sang qu'à bouillons il amasse
 Mesla du vin, par trois fois l'escula
 Dessus la mer, puis Neptune apela.

Pere Neptun', saturnien lignage,
 A qui la mer est venue en partage,
 Pere vieillard, escumeux, & chenu,
 Grand nourrisier de ce monde tenu
 Entre tes bras, de qui la viue course
 Coule touiours d'une eternelle source,
 Que le Soleil n'a peu iamais tarir
 Pour te laisser toutes choses nourrir.

Enten ma voix: donne que la nauire
 De ce Troyen sillonne ton empire
 Sans nul danger, & cesse le courroux
 Que dés long temps tu gardes contre nous.

Des meilleurs Dieux la benine nature
 Tend à sauuer l'humaine creature:
 Aux pleurs humains ne donner point de lieu
 Sans pardonner, ce n'est pas estre Dieu,

Neptune ouit la troyenne priere
 Poussant le chef sur l'onde marinere,
 Et se plaignant encore d'Ilion,
 Vne partie ottroye, & l'autre non.

Il ottroya que la flotte troyenne
 Pourroit aller dessus l'onde ageenne,
 Mais ne voulut l'autre part ottroyer
 D'y seiourner long temps sans la noyer.

Lors Helenin adresse sa parolle
 A son nepueu, & ainsi le consolle.

Courage Prince, il te faut endurer:
 Tu dois long temps meint sillon mesurer
 De la grand mer, auant que tu paruiennes
 Sur la Dunouë, & tes barques troyennes.
 Tous n'irez pas sans perir: mais afin
 De t'enseigner escoute ton chemin
 Non tout du long: Il te le faut apprendre
 D'un Dieu qui peult parfaitement l'entendre.

Sortant du port, gangne moy la grand Mer,
 Fay ta galere à tour de bras ramer
 (Ta main ne soit du labeur affoiblie)
 Entre Coryce & l'Isle Aegialie.

Quand tu seras au flot Laconiën
 Pren à main dextre, & sage auise bien
 De ne hurter au rocher de Malée
 Où l'onde en l'onde est asprement meslée.
 Là meint serpent, & meint grand chien marin
 Mange les Nefs, & d'un gosier malin

Hume la mer & glouton la reiette
Plus roide au ciel qu'une viste sagette:
Par tourbillons la vague qui se suit
Contre les bords abaye d'un grand bruit.

De là poussant tes nauires armées
Outre la mer des Cyclades semées
Reuoirras Troye & les funebres lieux
Pleins des tombeaux de tes nobles ayeux.

De là singlant à rames vagabondes
Par le destroit des homicides ondes,
Voirras le Pas où se noya la Sœur
Pendue aux crins de son Belier mal seur.

Tu feras voile au Thracian Bosphore
Où l'Inachide estant vestue encore
D'un poil de beuf, à coups d'ongles passa
En lieu de rame, & son nom luy laissa.

Puis aprochant du grand Danube large
Qui par sept huiז en la mer se descharge
Aborderas à l'isle qui des pins
Porte le nom: Là scauras tes destins
L'un apres l'autre, hoste de la riuiera
De qui la corne est si braue & si fiere.

Ce fleuue ayant sur la teste un rouzeau,
Et dans la main un vase tout plain d'eau
Et du menton versant une fontaine,
Te dira tout d'une bouche certaine.

A tant se teut: Iunon qui descendit
En le tençant la voix luy defendit.

Tandis la troupe au travail non oisive
 Le toreau mort renuersa sur la riue:
 Ilz ont le cuir en tirant escorché,
 Puis estripé, puis menu debaché
 A morceaux crus: ilz ont d'une partie
 Sur les charbons fait de la chair rotie,
 Embroché l'autre, & cuite peu à peu
 (Blanche de sel) à la chaleur du feu,
 L'ont retirée, en des paniers l'ont mise
 Puis sur la table en des plats l'ont assise,
 Ont pris leur siege, ont destranché le pain,
 Ont fait tourner le vin de main en main,
 Boiuant de rang à tasses couronnées
 D'un cœur ioyeux l'un à l'autre données.

A pres qu'ilz ont du boire & du manger
 Osté la faim, ilz s'allèrent loger
 Au premier front de la riue mouillée
 Sur des lits faits d'herbes & de fucillée,
 Où toute nuit iouirent du repos
 Ronflant le somme au murmure des flots.

Au descoucher de l'Aurore nouvelle
 Le vieil Vandois du sifflet les appelle
 (Qui seul estoit le Pilote ordonné)
 Voyant le vent heureusement tourné,
 L'Auton couuert de nuageux plumages
 Qui va soufflant deuant luy les orages.

Francus premier le sifflet entendit
 Qui tout armé sa main dextre estandit

Dessus la terre, & ses yeux vers la nuë,
 Estant debout dessus la riue nuë
 Prioit ainsi: ô grand Patarean,
 A l'arc d'argent, Tire-loing, Thymbrean.
 Garde Apollon entiere cette troupe,
 Dieu d'ambarcage, & permets que ie coupe
 Soubs heureux sort la Commande qui tient
 Ma nef au bord: A peine eut dit qu'il vient
 Hors du four eau tirer sa large espée:
 Du coup la corde en deux pars fut coupée
 Qui la nauire au riuage arestoit
 Ferme atachée a vn tronq qui estoit
 D'un viel ormeau foudroyé du tonnerre
 De quatre pieds esléué sur la terre:
 Puis vers le vent adressa son parler.

Vent, le balay des ondes & de l'Air,
 Qui de la nuë en cent sortes te iouës,
 Qui ce grand tout euantes & secouës,
 Qui peux cent bras & cent bouches armer,
 Vien-t'en heureux ton halaine enfermer
 Dedans ma voile, afin que soubs ta guide
 L'aille tenter ce grand royaume humide,
 Et si iamais le destin ou le sort
 Conduit ma flotte heureusement à bord,
 De marbre blanc ie te vouë une Image
 Au naturel de ton moiteux visage,
 Et de ton chef d'orages obscurcy.

Grand Iupiter qui du monde as soucy

Entends ma voix: Donne pere celeste
En ma faueur un signe manifeste
Tu le peux faire: on dit que quelquefois
Tu fis voler deux pigeons par ces bois:
L'un fut donné à l'azon pour escorte.

Donne moy l'autre, afin qu'heureux ie porte
De mon salut le signe trespertain,
Estant couuert du secours de ta main:

Comme il prioit, des Dieux le pere & maistre
Fit par trois fois tonner à main senestre.

Et cependant les rudes matelots
Peuple farouche ennemy du repos,
D'un cry naual hors du riuage proche
Demaroiert l'Ancre à la machoire croche,
Guindoient le Mast à cordes bien tendu.

Chaque soldat en son banc s'est randu
Tiré par sort: De bras & de poitrine
Ils sefforçoient: la nauire chemine!

Les cris les pleurs dedans le ciel voloient
Desous l'adien de ceux qui sen alloient.

A tant Francus sembarque en son nauire,
Les auirons à double rang on tire:

Le vent poupier qui fortement soufla
Dedans la voile à plein ventre l'enfla,
Faisant siffler antennes & cordage:
La nef bien loing s'escarte du riuage,
L'eau sous la poupe aboyant fait vn bruit,
Vn train d'escume en tournoyant la suit

D'un blanc chemin fendant la vague perse,
 Comme un sentier de neige qui traaverse
 L'herbe d'un pré: un long trac blanchissant
 Est au pasteur de loing aparoiſſant.

Qui a pointé veu la brigade en la danſe
 Fraper des pieds la terre à la cadance
 D'un ordre egal, d'un pas iuſte & conté,
 Sans point faillir d'un ny d'autre coſté,
 Quand la ieuneſſe aux danſes bien aprise
 D'un puiſſant Dieu la feſte ſolennize.

Il a peu veoir les auirons egaux
 Fraper d'accord la campagne des eaux.
 Cette Nauire egalemeſt tirée,
 S'alloit trainant deſſus l'onde azurée
 A dos rompu, ainſi que par les bois
 Sur le printemps au retour des beaux mois
 Va la Chenille errante à toute force
 Auecq cent pieds ſur les plis d'une eſcorce.

Ainſi qu'on voit vers le ſoir meint cheureau
 De pas gaillards ſuiure le paſtoreau
 Qui va deuant entonnant la muſette:
 Les autres Neſs d'une aſſez longue traite
 Suinoient la Neſ de Francus qui deuant
 Alloit bien loing ſoubs la faueur du vent
 A large voile à my-cercle entonnée,
 Portant de fleurs la poupe couronnée.

L'eau faiſt un bruit ſoubs le fort auiron:
 L'onde tortue ondoie à l'enuiron

De la Carene, & autour de la prouë
Meint tourbillon en escumant se rouë.
La terre fuit, seulement à leurs yeux
Paroist la mer & la vouste des Cieux.

FIN DV PREMIER LIVRE
DE LA FRANCIADÉ.



THE UNIVERSITY OF CHICAGO
PRESS







LE

SECOND LIVRE DE LA FRANCIADE,



*ES puissants Dieux la plus
gaillarde troupe
Estoit plantée au sommet de
la croupe
Du môt Olympe, où Vulcan
à l'ecart
Fit de chacun le beau palais
à parti
Qui contemploient la troyen-
ne ieunesse*

*Fendre la mer d'une prompte alegresse:
Flot dessus flot la Nauire voloit,
Vn trac d'escume à bouillons se rouloit
Soubs l'auiron qui les vagues entame:
L'eau fait un bruit luitant contre la rame!*

G

Le cueur sacré des Nymphes aux yeux pers
Menant le bal dessus les fillons verds
A chef dressé regardoient estonnées
Les pins sauter sur les vagues tournées:
Un seul Neptun' couuoit au fons du cueur
Contre Ilion une amere rancueur
Gros de dépit, du iour que mercenaire
(Dieu fait maçon) demanda son salaire
A Laomedon prince de nulle foy:
Il demandoit iustement à ce Roy
L'argent promis d'auoir de sa truelle
Fait des Troiens la muraille nouuelle,
Quand se rouloient d'eulx mesmes les cailloux
Soubs son marteau: le Roy plein de courroux
Luy denia sa promesse, & pariure
En le frapant, le paia d'une iniure.

Pource Neptun' en rage se tournoit
D'ire bouffi quand il sen souuenoit:
Or voiant Troye en ses eaux élancée
Disoit ces mots furieux de pensée.

Ha pauvre Dieu! vaincu par les mortels
Dequoy me sert la pompe des autels
Frere à lupin, race Saturnienne,
Si malgré moy la cendre Phrygienne,
Le demourant d'Achille, est triomphant
Et qui plus est conduit par un enfant?
Qui me deffie, & sans craindre mon ire
De ses bateaux outrage mon empire?

De quoy me sert le Trident en la main,
 Avoir l'Égide, armure de mon sein,
 Dieu redoutable, avoir pour heritage
 La grande Mer du Tout second partage:
 Si ie ne puis d'un mortel me venger,
 Mortel fuitif qui ose m'outrager .
 En mon palais, sans craindre ma puissance?
 Il faut punir ceste ieune arrogance.

Le ciel vengeur a banny sur mes eaux
 Ces Phrygiens coupables des trauaux,
 Que ie receu quand au port de Sigée
 Les Grecs pressoient leur muraille assiegée,
 Et qu'Ilion par le cours de dix ans
 Fournit de meurtre aux freres Atreans.

Ie m'efforcay d'une brigue contraire
 De fond en comble à les vouloir defaire,
 Mais le Destin ne le voulut souffrir,
 Qui maintenant changé, les vient offrir
 A ma puissance, & les offrant me tente
 A n'épargner l'occasion presente.

Disant ainsi, fit son char atteler
 Que deux Dauphins sur la mer font rouler
 A dos courbé, à queuës tortillées,
 Fandant du sein les vagues émaillées,
 Luy dessus l'onde en son siege porté
 Comme un grand Prince enflé de maïesté
 Lacha la bride, & le Char qui s'élance
 Portant son Roy sur les vagues sauançe,

Puis en cernant d'un grand & large tour
Toute la Flotte & les eaux d'alentour
De ce Troien atrapa la Nauire:
Le vent appelle, & ainsi luy va dire.

Vent, la terreur des cieux & de la mer,
Ce n'est pas moy qui vous fiz enfermer
En voz rochers, où tourmentez de crainte
Dessous un Roy languissez par contrainte.
Un seul Iupin le fit contre mon sceu,
A son pouuoir resister ie n'ay peu,
Car c'est un Dieu de puissance inuincible:
Ainsi que luy ie ne vous suis terrible
Vous caressant & prestant ma maison
Quand déchenez, sortez hors de prison,
Non à un seul, mais à tous quatre ensemble
La renuersant ainsi que bon vous semble.

Pource Aquilon ne souffre plus parmy
Mon flot salé ce bagage ennemy,
Mais d'un grand vol retourne vers Eole
Dy luy qu'il tienne auiourd'huy sa parole,
Et le serment qu'en la dextre me fit
Quand par mon aide Hercule il déconfit.

Que de son sceptre il face vne ouuerture
Aux vents enclos en leur cauerne obscure:
Qu'il les détache, & portez d'un grand bruit
Chargez d'esclairs de tempeste & de nuis
Par tourbillons enflent la mer de rage,
Et ces Troyens acablent d'un orage.

Dy luy qu'il rompe aux trauers des rochers
Pour me venger nauires & nochers:
Digne n'est pas telle gent pariurée
De voir long temps la lumiere atherée,
Assez & trop malgré nous a vècu
Ce sang maudit par tant de fois vaincu.

A peine eut diët qu'il vit la messagiere
Iris voler d'une plume legiere
Haulte sur leau, qui painte reuenoit
De voir Tethys, & au ciel retournoit,
Pleine d'humeurs: Ce Dieu s'approcha d'elle,
Luy tend la main la careffe & l'appelle.

Honneur de l'air, va conter à l'unon
Que les Troiens ennemis de son nom,
Gaillards & plains de gloire ambitieuse
Frapent la mer d'une rame ioyeuse:
Si le courroux boult encor' en son cueur,
Si l'ancienne opiniaitre ardeur.

Son estomac encores époiçonne,
C'est maintenant que le Destin luy donne
De se venger le temps & le moyen
Perdant Francus & tout le nom troien:

Dy que soudain mette la main à l'œuure,
Que sa puissance en l'air elle descœuure
Brassant contre eux un amas pluuieux.
A tant se teut: Iris remonte aux cieux,
Tirant un arc deffus les ondes perfes
Tout bigarré de cent couleurs diuerses,

Plus sous les pieds l'un se planta,
Et de Neptun^{de} le courroux luy conta:

Incontinent un grand nombre de nuës
Sont pêle-mêle à son trône venuës,
Comme troupeaux qui viennent à l'entour
De leur pasteur, quand la pointe du iour,
Et la rosée aux herbes les conuie,

D'une grand troupe une troupe est suivie,
Pié contre pié: & l'un qui les prent
Leur forme un corps moien petit & grand,
Comme il luy plait: les unes sont cornuës,
Les autres sont ou grosses ou menuës.

Ainsi qu'on voit le bon Haquebutier
(Qui sur l'hiver prepare son métier)
Verser du plomb en son moule, pour faire
De la dragée: il la forme au contraire,
D'un corps diuers, comme le plomb se fond
L'une est quarrée, & l'autre à le corps rond,
L'autre la long: ainsi l'un la grande
En cens façons forma l'humide bande
Filles de l'air: en l'une elle soufloit
Neges & grêle, & de l'autre elle enflait
Tout l'estomac d'orages & de pluye,
De foudres pers de scintille & de fuye,
L'une en bruiant sur l'autre se rouloit,
L'autre blasarde & noiratre couloit
Aiant d'azur la robe entre-semée,
Et l'autre estoit de feu toute allumée.

Tandis les vents auoient gaigné la mer,
Flot dessus flot la faisoient écumer,
La ranuersant du fond iusques au feste,
Vne importune outrageuse tempeste
Siflant bruiant grondant & s'éleuant
A grands monceaux, sous la gorge du vent
Branle sur branle, & onde dessus onde,
Entre-ouuroit l'eau d'une abisme profonde,
Coup dessus coup dans le ciel la pouffoit,
Coup dessus coup aux enfers l'abaissoit,
Et forcenant d'une mutine rage

De gros bouillons couuroit tout le riuage:
Un siflement de cordes, & un bruit
D'hommes s'éleue: Vne effroyable nuit
Cachant la mer d'une poisseuse robe
Et ciel & iour aux matelots dérobe:

L'air se creua de foudres & d'éclairs
A longue pointe estincelants & clairs
Drus & menus, & les pluies tortuës
Par cent pertuis se creuerent des nuës:
Meint gros tonnerre ensoufré s'éclattoit:
De tous costez la mort se presentoit
A ces Troiens: Lors d'une froide crainte
En tel danger Francus eut l'ame atteinte,
De larges pleurs arroza ses beaux yeux,
Et gemissant tendit les mains aux cieux.

S'il te souuient de nos humains seruiues,
Grand Iupiter, n'obly les sacrifices

Du pere mien, qui sus tous les mortels
 De boucs sanglants a chargé tes autels:
 Ha! tu deuois en la Troyenne guerre
 Faire couler mon cerueau contre terre,
 Sans me sauuer par vne feinte ainfi
 Pour me trahir à ce cruel soucy:
 l'eusse honoré les tombeaux de mes peres,
 Ou ie n'aten que ces vagues ameres
 Pour mon sepulcre, abuzé de l'esperoir
 Que tes destins me firent conceuoir.

Comme il disoit: Les tempestes troublées:
 Ont contre luy leurs forces redoublées
 Plus que deuant, & le foudre grondant,
 Avec la pluie en tortis descendant,
 Suivy d'éclairs, d'opiniatre presse
 Léchoit la mer d'une lumiere épaisse
 A feu menu qui sur l'eau s'élançoit,
 Et des Troienes les yeux éblouissoit.

Des vieux Patrons la parole épandue
 Sans estre ouye en l'air estoit perdue
 Tant la fureur de Boré qui donnoit
 Par le cordage horrible s'entonnoit:

L'un du nauire étoupe les creuasses,
 L'autre s'oppose aux humides menaces,
 Et fait la mer en la mer retourner,
 L'un tient la voile, & ne la veult donner.
 Si large au vent, & l'autre a toute peine
 Cale du mast & clicquet & anteine:

L'un

L'un court icy l'autre court d'autrepart,
Mais pour neant: le mal surmonte l'art:
Si éperdus qu'ils n'ont pour toutes armes
Que les sanglots les soupirs & les larmes.
Tantost pendus ils voysinent les cieux,
Tantost ils sont aux enfers stygieux,
Pirouettez au plaisir d'une vague:
Ainsi qu'on voit en la campagne vague
Au mois de May les effis éuentez
Qui bas qui haults tournez & tourmentez:

Aucune fois vne bourasse fiere
Heurte la proüe, & la repousse arriere,
L'autre la pouppe, & bruiante de vent
Se herissant, la reiette en auant,
Rompt la carene, ou de forte secousse
En la heurtant à costé la repousse
Auec grand bruit: le ceur tombe du sain
Du vieil Pilot' qui se lamente en vain.

Entre les feux le tonnerre & la pluie,
La nuit la gresle, vne ardante furie
De vents emporte à l'abandon de leau
Six grands vaisseaux élongnez du troupeau.
Mais à la fin la bonasse fortune
(Tousiours ne vit l'orage de Neptune)
Loin les chassa au riuage inconnu
De la Prouence, où le Rosne cornu
Entre rochers roulant sa vifte charge
Pres Aigue-morte en la mer se décharge.

Là ces Troyens sur le sable arrivez
Furent long temps d'hotelage priez
Sans éleuer quelque muraille neuue:
Puis alechez de la beauté du fleuve
Forçant son eau planterent à Tournon
De leurs ayeux les armes & le nom,
Qui courageux à Francion servirent,
Et aux combats des Gaulles le suivirent.

Sept autres nef's surprises par l'effort
D'Est, de Surest, de Nordoest, & du Nord,
Rouant' tournant' dessus la vague perse
Du haut en bas sentent à la renuerse
Tomber le mast: l'Antenne qui le suit
Broncha dessus: Les cordes font un bruit
Comme un Pin fait entier en ses racines,
Quand un torrent des montaignes voisines
Le fait verser, fracassant & courbant
Tous les buissons qu'il rencontre en tombant.

Deux tourbillons en ont deux aualees
A gorge ouuerte en leurs ondes salées,
Atte piteux: Pallas branlant es mains
Ses feux de creinte & d'homicide plains!
Iette un esclair dedans l'autre nauires:
Le feu mangeard qui se tourne & se vire
Luisant ardent passant de part en part,
De Banc en Banc, de Rampart en Rampart,
Prit le Pilot', le massacre & le tue,
Et my-brulé sur les vagues le rue.

Des autres trois orfelins de leurs masts.
Les deux vaincus entre-ouuers par embas.
De cent pertuis sentent creuer leur ventre,
Le flot meurtrier vague sur vague y entre
A meint bouillon qui les Costes creua,
Et les humant sous l'eau les aggraua.

L'autre au malheur opposant l'artifice,
De la tempeste éuitoit la malice
De toutes parts en doubte résistant:
Ainsi qu'on voit vn hardy combatant
Dessus le mur de la ville assiegée
Se planter ferme en sa place rangée
Pour l'ennemy du rampart décrocher:
Luy mesme en fin est contraint de broncher,
De ses genoux les forces luy defaillent,
Car entre mille & mille qui l'assaillent,
Vn par sur tous le plus brusque & gaillard
Tout armé saute au dessus du rampart
L'enseigne au poing, & en donnant passage
A ses soldats, leur donne aussi courage:

Ainsi de mille & mille flots voutez
Qui assailloient la nef de tous costez
Vn le plus haut & le plus fort sauance
Et d'un grand heurt sur le Tillac s'élance.
Victorieux, puis les autres espais
Qui çà qui là l'entre-suiuant de prés,
Rompent les Bords, les Bances, & la Carene,
Et la Nauire enfondrent sous l'arene.

L'un vers le ciel pour secours de son mal
Tendoit les mains, l'autre comme à cheual
Flotoit dessus vne antenne cassée:

Là des Troiens la richesse amassée
Par tant de Roys, sur les ondes rouoit,
Servant aux vents & aux flots de iouet,
Armes bouclairs, robes de riche ouurage
Nageoient sur l'eau, la proie du naufrage.

Trois fois la Lune, & trois fois le Soleil
S'estoient couchez, que l'huiuer n'ompareil
Armé d'éclairs & de vagues profondes
N'auoit cessé de tourmenter les ondes:
Sans plus la nef de Francus resistoit
Haulte sur l'eau, qui encores s'estoit
Seulle sauuée & des eaux & des flames,
Ayant perdu ses voiles & ses rames.

Quand vn fort vent suiu de tourbillons,
Et de l'horreur des humides fillons
En la singlant d'une bien longue traitte
La chasse au bord du riuage de Crète:

Vn Banc estoit de sablon enfoncé
Voisin du bord où Francus fut poussé
Plain de falaize & de bourbe atrainée:
Là pour mourir la fiere destinée
L'auoit conduit: de tous costez le bord,
Le vent la mer luy presentoient la Mort.

Comme il pleuroit sur le hault de la pouppe
Il saduisa d'élire de sa troupe

Cent cheualiers qui de puis ont eslé
 (Ainsi estoit dans le ciel aresté)
 Tiges & chefs des familles de France:
 Les choisissant tout le dernier sélance
 Dedans l'Esquis, aymant trop mieux perir
 Au bord, qu'en mer vilainement mourir.

Leurs pieds n'estoient à peine en la nacelle
 Que le courroux d'une vague cruelle
 Les fit par force au riuage approcher,
 Et leur bateau froissa contre un rocher,
 Rocher qui dur espineux & sauuage
 De son grand dos remparoit le riuage,
 Ayant du vent tousiours le chef batu,
 Les pieds du flot aboiant & tortu.

Là le Demon qui preside à la vie
 En tel dangier leur fit naitre vne enuie
 De s'attacher à ces rochers bossus,
 Et d'essayer à gagner le dessus.

Comme ils vouloient avecques la main croche
 D'ongles aigus grimper contre la roche,
 Le premier flot qui les auoit presse
 (S'en retournant) en arriere pouesse
 Les recula: la mer qui se courrouce
 D'un flot second encores les repousse
 Contre les bords raboteux & trenchans.

Là ces Troyens au rocher sacrochans
 D'ongles d'orteils se blessent & affollent
 Et les rochers en regrimpant accollent,

Se dechirans les longues peaux des doigts,
L'un s'attachoit aux racines d'un bois
Et l'autre en vain egrasignoit l'escorfe:
Puis pas à pas d'une penible force
Cherchant la cyme, & haletants d'effort,
Par les cailloux montent au haut du bord.

L'eau de la mer des cheueux goute à goute
Depuis le front iusq' au pié leur dégoute
Blanche d'écume, & leurs membres soufflez
De tant de vents, se bouffirent enflex:
Les flots salez de la gorge vomirent,
Euanouis leurs esprits se perdirent
De tant de maux debiles & lachez
Comme corps morts sur la riue couchez
Sans respirer, sans parler: Mais à l'heure
Que le torreau qui tout le iour labeure
Franc du colier retourne à la maison
Ces corps sortis de longue pamaison
Baisent la terre & la riue venteuse.

Quiconque sois, Terre, sois nous heureuse
(Ce disoient ils) & loing de tous dangers
Sauue en ton sein ces pauvres estrangers,
Qui ont souffert mainte dure fortune
Par le courroux des vents & de Neptune.

Comme ils prioient: Le dormir ocieux
Chasse-soucy leur vint siller les yeux
Et l'une à l'autre attachant la paupiere
Leur deroba le soing & la lumiere.

Tandis Cybele en son courage ardoit
Dequoy Neptun' son Francus retardoit:
Car elle aimoit (comme estant Phrygienne)
L'enfant d'Hector & la race Troyenne:
Pource soudain son char elle attela
Bat ses Lyons, & vers le Somne alla:

Le Dieu vieillard qui aux songes preside
Morne habitoit dans une Grotte humide:
Deuant son huis maint pauot fleurissoit,
Mainte herbe à laiët que la nuit choïssoit
Pour en verser le ius dessus la terre
Quand de ses bras tout le monde elle enferre:
Du haut d'un Roc un ruisseau s'écouloit
Obliuieux, qui rompu se rouloit
Par les cailloux, inuitant d'un murmure
A sommeiller en la cauerne obscure.

Le coq qui aime à saluer le iour
L'oye le chien n'y auoyent leur seiour,
Sans plus la Nuit l'horreur & le silence
En tel logis faisoient leur demeure:

Somme, dit ell, le repos de noz yeux,
Le bien aimé des hommes & des Dieux
Par qui le mal tant soit mordant s'oublie,
Par qui l'esprit loing du corps se delie,

Va, ie le veux, en ceste isle où souloient
Iadis sauter les hommes qui baloient
Au son du Cistre, & de cliquantes armes
S'entre-choquant, auantureux gendarmes,

D'œil vigilant en l'autre Dictæen
Gardoient le Bers du grand Saturnien,
Terre fertile, anciennes retraites
Des Corybans, Dactyles, & Curètes:

Là de leur race est encor auioird huy
Vn Corybant, le soutien & l'appuy
De tout honneur, de science semblable
Au vieil Chiron Centaure venerable:

Quand il auoit le sang plus genereux,
En sa leunesse il deuint amoureux,
Si qu'en pressant à sa chere poitrine
Par amitié vne Nyphe marine
D'elle conceut deux filles & vn fils:
Les filles sont ainsi que deux beaux lis,
En la maison de leur Pere croissantes,
En age en grace en beauté florissantes:

Le fils captif languit depuis vn an
En la prison d'un barbare gean
Qui les corps vifs à son Dieu sacrifie
Et d'un maillet leur dérobe la vie
Dedans vn temple en sang humain laué
De bras de iambe & de testes paué:

Luy plain d'honneur, de biens, & de richesse,
Tient sa maison ouuerte de largesse
Aux estrangers, tant il a grand desir
Entre vn millier d'en pouuoir vn choisir
Qui le reuanche, & son fils luy redonne
Seul heriter de sa noble couronne:

*Va-ten vers luy, & en te transformant
Presente luy quand il sera dormant
Autour du liēt cent formes épandues
Piqueurs, veneurs, trompes au col pendues,
Lesses, & chiens, bocages, & forests,
Larges épieux, cordages, & filets:
Limiers ardans, cerfs suiuis à la trace,
Et tout le meuble ordonné pour la chasse:
Presente luy des hommes inconnus
En longs habits à la riue venus,
Soubs qui son fils les armes doit apprendre,
Et par leurs mains sa liberté reprendre.*

*D'un mesme vol affublé de la nuit,
Fantaume vain, porte toy sur le liēt
Où va dormant l'une & l'autre pucelle,
Fay leur sembler qu'une estoile nouvelle
Vue d'éclairs, d'un voiage lointain
Passant la mer vient loger en leur sein,
Et raisonnée en flames bien éprises
Baize leur chair sans ardre leurs chemises.*

*Va-ten apres au bord où les Troyens
Dorment recreus des flots neptuniens,
Dessus la teste arreste sa volée,
Leur ame soit en songeant consolée
Sans auoir peur des habitans du lieu,
Car ia Mercure enuoyé du grand Dieu,
Des citoiens à flechu le courage
Pour en bonheur convertir leur dommage*

A tant se teut: & le roy du sommeil
 Tout chassieux, ennemy du reueil,
 D'un chef panché qui lentement se cline
 Et du menton resfrapant sa poitrine,
 Se rescoue, & sorty de son liēt
 Le mandement de Cybele accomplit.

Incontinent que l'Aube aux doigts de roses
 Eut du grand ciel les barrières decloses,
 Versant les fleurs sur les yeux du Soleil,
 Rouge tantost, tantost iaune & vermeil,
 Se bigarrant en autant de manieres
 Qu'on voit fleurir les riuies printanieres:

Le Roy Dicæ (ainsi se surnommoit)
 Ce Corybant qui la iustice aimoit,
 Grand terrien, d'honneur riche, & de race,
 Dresse l'aprest d'une aboyante chasse,
 Son palefroy à gros bouillons fumeux
 Mâchant le frein fierement écumeux
 Est à la porte, où à foule se rendent
 Jeunes piqueurs qui deuisant l'attendent
 Maint chien courant couple à couple les suit,
 De tous costez la meute fait vn bruit!

Par bois fueillus, par monts, & par vallée,
 Pleine de cris ceste chasse est allée:
 Maint gros sanglier de dents croches armé,
 Maint cerf craintif au large front ramé
 Estoit ia mort, Quand au vueil de Cybele
 Vn cerf pouffé par ambusche nouuelle

Tournant, virant, haletant, & mourant
De soif pantoise, alla viste courant
Vers le riuage: & le pere Dic.ee
Suiuant ses pas par la poudre tracée
Comme le cerf à la riue aborda
Où ces grands corps inconnus regarda.

Lors les Troyens en surfaulx s'éueillèrent
Qui de le voir au cueur se merueillerent:
Luy plain d'effroy en pamaison deuint:
Et de son songe à l'heure luy souuint.

D'où estes vous (dit il,) de quelle place,
Quels sant voz noms, & quelle est vostre race,
Quelle fortune, ou quelle mer sans foy
Vous a trahis? hostes repondez moy:
Car à vous voir (bien que plains de miseres)
N'esles méchants, ny nez de méchants peres.

Alors Francus baignant ses yeux de pleurs,
Et soupirant aigrement ses douleurs
Luy respondit: Si iamais les merueilles
Des Phrygiens ont frapé tes oreilles,
La longue guerre, & les dix ans d'assauts,
Le fier Achille auteur de tant de maux,
Le sac, la prise, & la flamme funeste
Du brazier grec, nous en sommes le reste:

Pour soutenir leurs villes & leurs forts
Femmes enfans, noz aieux y sont morts,
L'un sur le mur, l'autre par les alarmes:
Hector l'honneur des hommes & des armes,

Le pere mien, aiant cent mille fois
Trempe le sable au meurtre des gregeois
Gardant le sien, & sa mere, & sa ville,
Y fut tué par la traison d'Achille.

Comme vn sapin par le fer abatu
Hector tomba de ses armes vestu
Faisant vn bruit sur la poudre Troienne.
Où du vainqueur la rouë Amonienne
(Acte vilain & plain d'impieté)
Trois fois le traine autour de sa Cité:
Je fus sauué de la flamme cruelle
(Acte diuin) pendant à la mammelle,
Je fus des Grecs en seruage amené,
Nourry sans nom, bien que hautement né:
Ceux que tu vois d'un visage si blefme
Couchés icy, ont eu fortune mesme,
De mesme ville, issus de mesme part,
Mes alliez de sang & de hazard.

Quand sans honneur sans grandeur sans enuie,
De plus hant bien, i'allois trainant ma vie
En Caonie aux pieds de mes parens,
Voicy d'en haut des signes apparens,
Voicy Mercure enuoyé du grand pere
Tancer mon oncle & menacer ma mere,
Dequoy forçant le ciel & la saison
Ils enfermoient ma gloire en la maison,
Et que des Dieux les grandes destinées
Auoient pour moy les Gaules ordonnées,

Estant au ciel pere des Roys receu:
 Mais le Deslin, & les Dieux m'ont deceu,
 Croiant en vain leur promesse menteuse
 Prompt ieme donne à la vague venteuse,
 Armant en mer quatorze grands vaisseaux
 De viures pleins & de forts iouuenceaux,
 Dont i'esperois d'une haute entreprise
 Donter sous moy ceste Gaulle promise:
 „ Malheureux est qui dedaigne le sien
 „ Pour l'estrangier: en lieu de tant de bien,
 Couronne, Sceptre, & royal mariage,
 L'ay eu la mer, & les vents en partage,
 Qui d'esperance & de biens m'ont cassé,
 Et de quatorze un vaisseau m'ont laissé
 Qui pres ce bord saut à toute peine
 Penche rompu enuironné d'arene,
 Où tout mon bien i'auois faict enfermer
 „ Si cest du bien ce qui flotte en la mer.
 „ Du bout du haure on doit voir la marine,
 „ Malheureux est qui sur elle chemine:
 Apres auoir trois iours entiers erré
 D'astres certains & de voie égaré,
 Tousiours pendu sur la vague meurdriere
 Vn bon Demon esmeu de ma priere
 Me secourant (d'hommes & d'armes nu,)
 Ma faict grimper à ce bord inconnu,
 Proie des loups, & des bestes sauvages:
 Nous ignorons des hommes les courages

De ce país: si apres les dangiers
Ils ont le cuer piteux aux estrangers,
S'ils craignent Dieu, s'ils aiment la iustice,
Ou s'ils sont pleins de sang & de malice:
Pource, benin aie pitié de nous,
Sois homme ou Dieu, i'embrasse tes genoux:
Si tu es Dieu, tu scais bien nostre peine,
Si tu es homme, vne douceur humaine
Doit émuouoir ton cuer à passion,
Aiant horreur de nostre affliction.

Il dist ainsi: le vertueux Diçæ
Contre-respond: ceste terre embrassée
Des flots marins comme tu vois icy
Porte un bon peuple & un mauuais ausy,
Mais à ce coup ta fortune meilleure
T'a fait surgir où la vertu demeure:
Pource tu sois hoste le bien venu.

Qui est celluy qui viuant n'a connu
L'honneur troyen, & pour garder sa terre
Les faits d'Hector un foudre de la guerre?

Il me souuient qu'un iour Idomené
Me discouroit, de nouueau retourné,
(Il retournoit nouuellement de Troie
Chargé d'honneur de renom & de proie)
Qu'apres qu'Hector les greques nauis brula,
Que vers Priam ambassadeur alla
Traitter la paix, mais il ne la peut faire
Ayant Pâris capital aduersaire

Par courtoisie il logea chez Hector
Qui l'honnora d'une grand' coupe d'or
Au departir, où vînoit entaillée
Soubs le burin la Balaine écaillée
Ouvrant la gueule, & saignant un semblant
De deuorer le pauvre corps tremblant
De la pucelle Hésione attachée
Contre un rocher: la mer estoit couchée,
Au pié du roc, qui de flots repliez,
De la pucelle alloit baignant les piez
Idomené me donna ceste coupe

Que ie tien chere entre une riche troupe
D'autres vaisseaux dont ie cheris mes yeux
Et boy dedans aux festes de noz Dieux:
Il estoit d'Hector la courtoisie,
Les vaillans faicts, les vertus, & la vie,
Et ennemy son honneur n'abaissoit
Ains iusq' au ciel ses louanges poussoit.

Vous ne pressez une terre estrangere.
C'est ô Troyens vostre ancienne mere
Crete, dont Teucre autrefois est issu
De qui le nom pour tiltre auez receu:
Encore Ida la montagne troyenne
S'esleue icy, la demeure ancienne
De voz aieuz, & pource ostez du cuer
Comme assurez le soupçon & la peur,
Et desormais rapellez l'esperance
Surgis au lieu qui fut vostre naissance.

Disant ainsi: ce Prince retourna:
En son palais long temps ne seiourna
Sans liberal enuoyer au riuage
Trente moutons, six beufs de grand corsage
Gras bien charnus, quinze barreaux de vin,
Coupes, habits, & chemises de lin,
Pour festoyer, & couvrir ceste bande
A qui la faim outrageuse commande
„ Rien n'est meilleur pour l'homme soulager,
„ Apres le mal que le boire & manger.

Eux affamez ces viandes rauirent
Qui d'une autre ame au besoin leur seruirent
Réionissant la force de leurs corps,
„ Car le manger rend les hommes plus forts
Tandis la nuit à la robe étoillée
Auoit la terre en toute part voilée
D'un manteau noir ombreux & paresseux,
Lors que voicy les Fantaumes de ceux
Dont la grand mer en vagues departie
Auoit les corps & la vie engloutie,
Enflez, bouffis, écumeux, & ondeux,
Au nez mangiez, au visage hideux,
Qui pepians d'une voix longue & lente
(Comme poulets cherchans leur mere absente)
De mains de pieds figurans leur mechef,
De Francion enuironnoient le chef.

Enfant d'Hector (disoient ils) nous ne sommes
Plus ces corps vifs, mais sainte de ces hommes,

Que

Que bien armez, courageux, & bragards,
En tes vaisseaux amenois pour soldards,
Sur qui les vents au fort de la tempeste
Ont renuersé cent gouffres sur la teste:
Noz corps flotans apaisent les poissons,
Noz esprits (las) en cent mille façons
Déprisonnez de l'humaine clôtüre
Dessus les flots errent à l'auanture:

Fay nous aumoins sur le bord de ces eaux
Le triste aprest de quelques vains tombeaux,
Et par trois fois de noz ames appelle
L'ombre au repos d'une tombe nouuelle,
Bien qu'elles soient loin de leur corps: ainsi
Pourront porter doucement le souci,
En attendant que les eaux poissonneuses
Pourront ietter aux riuës sablonneuses
Las! de noz corps le viel moule deffait
Pour leur bastir un sepulcrhe parfait.

A tant senfuit la troupe naufragiere
Ainsi qu'on voit vne poudre legere
S'éuanouir, tournoiant & suiuant
Les tourbillons qui anoncent le vent

Incontinent que l'Aurore rosine
Eut le Soleil tiré de l'eau marine,
Francus s'esleue, & des premiers gazons
Fit des tombeaux, funerales maisons,
Puis repandant vne grand' coupe plaine
De sang sacré en leur demeure vaine,

*Haut appelloit les ames qui venoient,
Et sur l'obseques espesses se tenoient,
Faisant tel bruit, que font en leur nichée
Les arondeaux attendans la béchée:
Et tels qu'on voit au milieu de l'esté
Soubs la plus vire & brulante clarté
Errer espais d'un gros monceau qui tremble
Les moucherons qui volent tous ensemble,
Gresles menus, tournans de lieux en lieux,
Et si petits qu'ils nous trompent les yeux.*

*Bien que voz corps (disoit Francus, aux ames)
Ne soient enclos soubs ces herbeuses lames
En attendant un repos plus certain
Contentez vous de cest office vain,
Et frequentez en longue patience
Ces logis plains de Nuiët & de silence.*

*Esprits malins ne nous suivez jamais,
Ou soit en guerre, ou soit en temps de paix,
Et en dormant n'épouventez noz songes
D'effroy, de peur, ny d'horribles mensonges
Qui au reueil rendent l'homme transi,
Et sans nous suiure arrestez vous icy.*

*Disant ces mots, plein d'un soin qui le presse
Seul sur la riue éloigné de la Presse,
Se tourmentant d'un long soupir amer
Prioit ainsi la fille de la mer.*

*Enten ma voix paphienne erycine
Si tu naquis de l'écume marine,*

Ne souffre plus que tes flots maternels
 Me soient auteurs de tourments eternels:
 Alme Venus, mets en ta fantasie
 Le souuenir de ceste courtoisie
 Dont l'oncle mien te preferant, vsa
 Lors que la pomme à Pallas refusa,
 Et à Iunon, qui encores dolente
 D'un tel refus en tous lieux nous tormenté:
 Et si il est vray qu'autrefois as laissé
 Le ciel vouté du pié des Dieux pressé,
 Et les citez soubz ton pouuoir gardées
 Pour habiter les montaignes Idées
 Prise d'amour d'un pasteur Phrygien
 Aie pitié du mesme sang Troyen:

Tu gardas bien & Iason & Thesee
 Entrepreneurs d'affaire mal aisee,
 Et fils n'auoient (les sauuant de perils)
 Tant fait pour toy que mon oncle Pâris:
 Comme eux ie trace vne affaire bien haute
 Et si ie faux, au destin soit la faute,
 Et non à moy de rien ambitieux.
 Qui n'ay suiuy que l'oracle des Dieux.

Priant ainsi, Venus la marinier
 Size en son throne entendit la priere:
 Elle vestit ses sumptueux habits
 Orna son chef flamboiant de rubis,
 Entre-mellez de grosses perles rondes,
 En cent façons friza ses tresses blondes,

*Amignota de ses yeux les regards
Regards ie faux, ains homicides dards,
Prit ses aneaux de superbe engraueure,
Haussa le front, composa son alleure,
Se parfuma, soignit, & se lava,
Puis vers Amour son cher mignon sen-va*

*L'enfant Amour écarté de la presse
Des autres Dieux, sous vne treille épesse
Dans le iardin de Iupiter esloit
Où Ganymede aux eschers combattoit,
Venus de loin commence à luy sou-rire,
Flata sa ioüe, & ainsi luy va dire.*

*Mon fils, ma vie, Amour mon petit Roy,
Tu es mon tout, ie ne puis riens sans toy,
Ny toy sans moy, mais sous nous deux ensemble
Il n'y a Dieu si puissant qui ne tremble:
Laisse tout seul iouer ton compaignon,
Embrasse moy, baize moy mon mignon,
Pends à mon col, Mon fils ie te pardonne
Tous les torments que ta fleche me donne,
Tous les enuis les soucis infinis
Pour les amours d'Anchise & d'Adonis,
Si de ton trait tu blesses la pensée
En Francion, des filles de Dicae:
Aide au Troyen, il est digne d'auoir
Pour sa beauté faueur de ton pouuoir:
Ie te donray pour te seruir de page
Le Ieu mignard qui te ressemble d'age,*

Fin comme toy, de qui les petits doigts
Tous enfantins porteront ton carquois,
Et ton bel arc qui les hommes conquiesle:
Il sera tien si tu fais ma requeste.

Adoncq' Venus le mit en son giron,
Roses & lys épanche à l'enuiron
De sa perruque, & l'endort en sa robe:
Puis doucement de son fils se dérobe,
S'en-vole en Cypre, où son temple en tous temps
Voit ses autels chargez d'un beau printemps:

A tant Amour du sommeil se secoïe,
Ses blonds cheueux arrangea sur la ioïe,
Vne double aile à son dos attacha,
Du prochain Myrte en sautant décrocha
Son plain carquois, il empoigne en la dextre,
L'arc: & des dieux & des hommes le maistre
Puis s'élancant hors la porte des cieux
En-demené fretillard & ioieux
Se rue en l'air: le ciel l'onde & la terre
Luy font honneur: Zephire qui desserre
Sa douce alaine odorante à l'entour

Tout amoureux va conuoiant Amour
Ce petit Dieu, qui trompe la ceruelle
Des plus ruzex, prit semblance nouvelle
Se herissant en la forme d'un Tan,
(Fier animal) qui au retour de l'an
Quand le printemps rameine ses delices
Parmy les prez fait courir les Ienisses:

Aux yeux de tous fut inuisible: puis
S'alla cacher deffous le Sueil de l'huis,
Ioignant la porte où le prince Dicee
Superbe auoit sa demeure dressée.

Tandis Francus branlant dedans la main
Vn iaucloir à la pointe d'airain
Ayant au col sa targue à mainte houpe
Vers le chasteau mena sa ieune troupe.

Venus la belle, au departir des bords
Songneuse d'eux enmantela leurs corps
D'une nueuse & obscure couronne,
Pour n'estre veuz ny conneuz de personne,

Quand au palais Francion arriua.
Loing de leurs corps l'air espais se creua,
Et leur figure est propre reuenue
Comme astres clers déuestus d'une nue.

Ce iour Francus à merueille estoit beau,
Son ieune corps sembloit un renouveau
Lequele tend sa robe bien pourprée
Dessus les fleurs d'une gemmeuse pré,
La grace estoit à l'entour de ses yeux
De front, de taille, égal aux demi-dieux.

Deuant la porte en assez long espace
Large, quarrée, estoit une grand place
Où la ieunesse aux armes s'esbatoit
Piquoit cheuaux voltigeoit ou lutoit
Courroit sautoit, ou gardoit la barriere,
Iusques au ciel en voloit la poussiere.

En ce pendant que d'œil prompt & ardent
Francus alloit le palais regardant
Festes, festons, gillochis, & oualles,
Dicea-vestu de dignitez roialles
Accompagné de deux cens iouuenceaux
D'age pareils, aux mentons damoiseaux,
Au doux regard, d'une courtoise sorte
Vint caresser Francus oultre la porte,
Le bien-veignant, & d'un visage humain
Le tient l'embrasse, & luy serre la main.

Près de ce Prince en robes solennelles,
Estoit sa femme & ses filles pucelles,
Qui, fil, aiguille, & ouvrages legiers,
Auoient laissé pour voir les estrangers:
Comme un Avril estoient belles ces dames,
En cent façons les amoureuses flames
Qui de leurs yeux à passades sortoient
Peuples & Rois d'un regard surmontoient.

Tandis le Dieu qui petit se dérobe
Finet trompeur se cacha sous la robe
De Francion, & décochant deux traits
L'un plain d'Amour de graces & d'attraits,
Qui doucement gagne la fantasie,
Et l'autre plain d'ardante ialousie
Tirez des yeux de Francus leur lancea,
Et la raison ensemble renuersa,
Troublant le sang, & remplissant les veines,
Foye & poumons de soupirs & de peines,

Puis en riant & sautelant, de là
Ce faux garson dans le Ciel s'enuola.

Dessous le cueur de ces deux damoiselles
Fumoit la plaie à mornes étinceles,
Les consommant & fondant peu à peu
Comme vne cire à la chaleur du feu:
De toute chose ont perdu souuenance,
Perdu scauoir parole & contenance,
Car leur Esprit de merueille éblouy
Bien loin du corps s'estoit éuanouy.

De ces deux seurs l'une auoit nom Hyante,
L'autre Clymene: Hyante estoit scauante
En l'art Magic, mais amour le plus fort
Qui n'a soucy de charmes ny de fort
De toutes deux auoit l'ame eschauffée
Qui ia pendoit au haut de son trosée:

Elles bruloient à petit feu couuert
Comme vne esloupe, ou comme vn rameau verd
Qu'une artizane au point du iour allume:
Tout en vn coup il entre-brule & fume
D'un feu caché qui luit obscurément:

Ainsi Amour coulé secretement
Dedans le cueur de ces dames blessées
Les étouffoit de secrettes pensées:
Tantost leur iouie en sautant rougissoit,
Palle tantost, tantost se blanchissoit,
Tantost tremblant de taches estoit pleine
Le seul miroir qui tesmoignoit leur peine,

'A tant Francus entra dans le chasteau,
Son iauelot posa contre vn Rateau
Le long du mur à costé de l'entrée
Où se couchoit mainte lance ferrée.

Pour nettoier son corps las & souillé
Dedans le bain tout nud fest depouille,
Puis comme vn astre entra dedans la salle
Braue d'orgueil & de pompe roiale.

En ce chasteau par bandes fremissoient
Prompts seruiteurs, dont les vns tapissoient
D'ouvrages d'or les superbes murailles,
Longs arguments d'anciennes batailles,
Autres de ranc sur la place apportoient
Tapis ouurez, les autres apprêtoient
Les lits enslez de Couuertes veluës,
Autres dresseoient les viandes esleuës,
Autres chargeoient les hauts buffets dorez
De grands vaisseaux d'histoires honorez.

Sur vne Esquiere en assez longue trace
Des Corybans estoit peinte la race,
Comme Briare en amour furieux
Desesperé de sa nymphe aux beaux yeux
Alloit tout seul par mont & par bocage
Iettant vn cry comme vn lion sauuage
De nuit de iour errant par les buissons,
Changeoit son corps en cent mille façons,
Tant en amour forcenait sa folie
Pour se saisir de sa Cymopolie,

Mais à la fin se changeant en serpent,
A dos rompu sur le ventre rampant,
La tient serrée, & l'ayant embrassée
D'elle conceut les aieux de Dicaë.

Sur un bassin Saturne estoit gravé
En cheueux blancs, de vieillesse agraué,
A la grand faux, qui auoit la machoire
Du sang des siens toute relante & noire:
Sa femme Rhée à l'autre bord estoit
Qui pour son fils un caillon presentoit
A ce vieillard; les appas de son ventre:
Dessous ses pieds se herissoit un ancre
Où Iupiter viuoit emmailloté
Du lait diuin de la Chieure allaitté.

Autour du Bers les anciennes races
Des Corybans bien armez de cuiraces,
Targes, boucliers, se choquans d'un grand son
Rendoient sans bruit la voix de l'enfançon,
Craignant Saturne affamé de nature
Qui ses enfans deuoroit pour pasture.

Quand tout fut prest, ce prince pour myeux voir
Son estranger, courtois le fils assoir
A vis deluy, & fit asseoir ses filles
Aux yeux armez d'amoureuſes ſcintilles,
Puis selon l'ordre & l'age & les honneurs
Qui hault qui bas ſaſſirent les ſeigneurs.

D'un cueur ioieux ceste gaillarde bande
Mit promptement les mains à la viande,

*Et festoiant le Troien estrange
Le conuoient doucement à manger:*

*L'un est pensif, l'un parle, & l'autre coupe,
Maint eschançon emplissant mainte coupe
De vin fumeux, les tables entournoit,
Et iusqu'aux bords les tasses couronnoit.*

*Incontinent que la soif fut ostée,
Et de la fain la fureur surmontée,
Aiant le Roy pour office diuin
A Iupiter versé le dernier vin
A plain hanat, inuoquant sa puissance:
Toute debout se leua l'assistance
Loin de la table enuieuse d'aller
Après souper diuiser & baller.*

*Vn buit se fait: La gaillarde ieunesse
Prenant chacun la main de sa maistresse,
S'offre à danser: maint flambeau qui reluit
Du planchier d'or veiné l'ombre de la nuit.*

*Le vieil Terpin qui de fleurs se couronne
Son dos appuye au flanc d'une coulonne
La Lyre au poin, & ioignant à la voix
Les nerfs frapéz par l'accord de ses doigts
D'un plaisant son les inuite à la danse:
Le pied certain rencontre la cadence!*

*Dieu (disoit il) qui tiens l'arc en la main,
Fils de Venus, hôte du sang humain,
Qui dans les cueurs tes roiaumes habites,
Qui cà qui là de tes ailes petites,*

*Voies par tout iusqu' au fons de la mer,
Faisant fous l'eau les dauphins allumer,
Dont l'afpre trait à feru la poitrine,
Des Dieux là haut, la bas de Proserpine,
Pere germeux de naiffance, & qui fais
Comme il te plaift les guerres & la paix,
Prince inuaincu, nourricier de ce monde
Qui du Chaos la cauerne profonde
Ouuis premier, & paroiffant armé
De traits de feu, Phanete fus nommé:
Double, iumeau, emplumé de viteffe,
Porte-brandon, archer que la ieunefse
Au fang gaillard courtize pour son Roy.*

*O grand Demon, grand maiftre, écoute moy,
Soit que tu fois au milieu de la bande
Des plus grands Dieux où ta fleche commande,
Soit qu'il te plaife habiter ton Paphos,
Soit que ton chef tu laues dans les flots
De la fontaine Erycine, ou que vuide
De tout foucy, de tes vergiers de Gnide
Entre les fleurs habites la verdeur,
Vien allumer noz cueurs de ton ardeur,
De cefte danfe échauffe le courage,*

*Sans toy n'est rien la pointe de noftre age,
Fauueur, honneur, abondance de bien,
Force de corps fans ta grace n'est rien,
Ny la beauté: & mefmes noftre vie
Est vne mort fi de toy n'est fuiuié,*

Ensemble Dieu profitable & nuisant.

Vien doncq icy comme un astre luisant
Donner lumiere à si belle entreprise,
Et ceste feste heureuse fauorise.

Ainsi chantoit Terpin le bon vieillard,
Les Balladins haussans le cry gaillard
Les derniers vers du chantre recouperent
Et de leurs voix les solineaux fraperent.

Seul à l'écart apuyé contre un coin,
Veuf de plaisir, plain d'angoisse & de soin,
A fourcy bas, à poitrine poussee
De longs sanglots, estoit le bon Dicae,
Vn fleuve espais de ses yeux se coula:
Francus l'auise, & ainsi luy parla.

C'est à moy Prince à pleurer & à traire
Tant de sanglots, à qui tout est contraire,
A qui la Mer, l'Air, la Terre, & les Cieux
Sont obstinez ennemis enuieux,
Qui m'ont trompé deffous belle apparence:
„ Il n'est rien pire aux mortels qu'esperance.

Mais toy seigneur si sage & si prudent,
En biens citez & peuples abundant,
Riche d'honneur & de terre fertile,
Riche de femme, & de belle famille,
Ne deurois estre en ce point languoureux,
Ains les soupirs laisser aux malheureux.

Dicae respond, Las si ie n'estois pere
Hoste Troien, ie serois sans misere,

*Vn mien seul fils a causé mon tourment,
Et sil te plait, ie te diray comment.*

*Dedans ceste isle habite de fortune
Vn fier Tyran, la race de Neptune,
Horrible & grand, mais homme en cruauté
Tant soit cruel ne la point surmonté:
Il fait meürdrir tous ceux qu'il prend en guerre,
Ceux que la mer iette contre sa terre,
Dessus l'autel de son pere, & de sang
Honnit le temple: Il attache de rang,
Piteux regard! sur la porte les testes,
Des affomez, miserables conquestes:
Le fer ne peut endommager sa peau
Il rebondit comme fait un marteau
Dessus l'enclume: en vne seule veine
Pres le talon est sa parque & sa peine.*

*Mille estoient morts par sa cruelle main,
Quand moy touché d'un cueur doux & humain
Luy fis scauoir que les bestes sauuages,
Tigres, lions enuenimez de rages,
Qui sans raison viuent parmy les bois
Gros animaux sans pitié ny sans lois,
S'entre-tuoient, & mangeoient leur semblable,
Mais l'homme né d'un esprit raisonnable,
Enfant du ciel, ne doit faire mourir
L'homme son frere, ainçois le secourir.*

*Ce grand Gean oyant ceste nouuelle
Enfla son fiel de colere cruelle,*

Et bouillonnant, écumant, & grondant,
Sans m'advertir de son courroux ardent,
Vint au matin au pied de ma muraille
Me deffier en plain champ de bataille.

En telle peur soudain armer ie fis
Mon ieune Orée, (ainsi a nom mon fils)
L'acompanant de bien peu de gendarmes
Mieux equipez de courage que d'armes.

Ce iouuenceau à qui le blond coton
En se frizant sort encor du menton,
Fort & hardy fit auancer sa trope,
Et le premier assaillit le Cyclope
Le grand Phouère, (helas on nomme ainsi
Ce fier Tyran aux plaies endurcy)
Mais pour neant ce ieune enfant sefforce,
Car du Gean l'invincible force
Le prit captif au beau milieu des siens,
Puis en serrant de vergongneux liens
Ses gens & luy, d'un baston les emmeine
Comme un pasteur ses moutons en la plaine.

Depuis le temps ce malheureux cruel
De iour en iour a tué sur l'autel
L'un des captifs pour offrande funeste,
Ils sont tous morts: ha ie meurs! & ne reste
Sinon mon fils, qui sentira demain
La pesanteur de sa cruelle main.

Ainsi disoit versant sous sa paupière
De tiesdes pleurs une large riuiere,

A gros sanglots entre-rompant sa voix:

*Lors que Francus le tige de noz Roys
Meu de pitié le console & le slate,
Et luy respond: l'aurois vne ame ingrate,
Né d'un rocher, & d'un tigre conceu,
Si mesurant le bien que iay receu
De toy Seigneur à ma douleur extrême
Pour te sauuer ie ne t'offrois moy-mesme,
Mon sang ma vie, & ce glaive tranchant
Assez pointu pour punir un méchant:
Fay moy sans plus apprestier sur la place
Armes cheuaux, ains que demain se passe
Il connoistra qu'un Pere valeureux
A son malheur m'engendra vigoureux,
Pour ne souffrir regner vne malice
Sans que mon bras vengeur ne la punisse.*

*A tant Francus à son parler mit fin,
Puis l'eschançon aiant versé du vin
A longs filets en l'honneur de Mercure
Estant la nuit & profonde & obscure
Ia les Trions commençans à pencher,
Chacun se leue, & sen alla coucher.*

*Incontinent que l'Aube iour-apporte
Du grand Olympe eut débarré la porte,
Et le Soleil par les heures pressé
Eut son Baudrier en biez retroussé,
De rais fourchuz orné sa teste blonde,
Haut en son char donnant lumiere au monde,*

Ce fier Tyran à la muraille alla:

Vn cheualier au combat appella

Tyran superbe & de fiere arrogance,

Le cor en bouche, en la dextre la lance

Ferme en l'arrest, sur le dos le harnois,

L'espée au flanc, au costé le pauois,

Sur le rongnon la dague, & sur la teste

Vn morrion brillant comme tempeste

Que Iupiter élance au mois d'esté

Sur le sommet d'une iniuste cité

Vne grand' queue à la cime atachée

Du morrion ondoioit épanchée

Dessus le dos, qui autant se rouloit

A flots rompus que le chef s'ébranloit.

Pour son destrier pressoit la forte eschine

D'une cauale: elle auoit la poitrine

Blanche & le front, le reste de la peau

Hors le pied gauche estoit de poil moreau.

Detel harnois cest horrible aduersaire

Estoit vestu, sans qu'il en eust affaire,

Car il portoit le fer tant seulement

Non pour s'armer, mais bien pour ornement

Et pour ietter vne horreur en la face

Du cheualier qui viendroit sur la place.

Il se moquoit en fronçant le sourcy

Du bon Dicae & luy disoit ainsi.

Pour champion ta sottise m'apreste

Viel radouté la frygienne teste.

M

D'un Iouenceau qui scauroit mieux ramer,
Comme vn forsat, que furieux s'armer.

Pour le loier d'une telle entreprise
Tu as ta fille à ce Troyen promise,
Pauvre chetif: ce fer dont il mourra,
Pour son douere vn tombeau luy don'ra

Encor dit-on que ce banny se vante
Que le destin les gaulles luy presente,
Voire & qu'il erre où le ciel le conduit,
Le pauvre sot des oracles seduit,
Qui ne scait pas que sus les choses nées
Ne peuuent rien les vaines destinées:

Crete est sa gaulle, & mes braues fureurs
Seront le but de ses longues erreurs:

En moy ne soit la mort renouuellée
De mon ayeul le superbe Talée,
Qu'une Medée en sauuant des dangers,
Je ne scay quels Pyrates estrangers
Enforcela d'un magique murmure,
Ce n'est pas moy qui des charmes a cure,
Ne qui me laisse aux paroles piper,
Le fer tranchant ne me scauroit couper,
Ny Iupiter tuer de son tonnerre
S'il regne au ciel ie regne en ceste terre.

De tels propos comme il falloir brauant,
A larges pas Francus vint au deuant:
Je suis celuy que ton orgueil m'éprise
Jeune Troyen auteur de l'entreprise,

Qui te veux faire auant le soir sentir
A ton malheur que peut vn repentir,
Va-ten brauer de tes paroles fieres
Vieillards enfans & pauvres filandieres,
Qui tout le iour tirans le suzeau plain
Gaignent la vie au labeur de leur main.

Aproche toy tu-as trouué partie
Qui scait comment les vanteurs on chastie,
Quoy que tu sois au combat dangereux
Si seras tu Phouère bienheureux
D'aller victime au fleuve Acherontide
Tué des mains d'un si ieune Hectoride.

Il dit ainsi: Le Gean d'autrepart
Ruant sur luy vn terrible regard.
D'un œil qu'à peine en biez il abaisse
De ce Troyen contemploit la ieunesse,
Ne le voyant de corps massif ny fort,
De fier visage, ou d'un horrible port,
De front seuer aux ioustes bien à craindre,
Ains d'un poil blond qui commençoit à poindre,
De gresle taille, & d'œil serain & beau,
Fresche la main, & bien fresche la peau,
Et d'un regard qui les graces surmonte,
Il eut le front tout allumé de honte,
Retint la bride, & le tençoit ainsi.

Ieune garson, on ne combat icy
Pour remporter à sa mere la gloire
D'un verd laurier: Le prix de la victoire,

N'est vn cheual aux armes bien appris,
Le sang vaincu du vainqueur est le prix
Et la ceruelle à mes pieds épandue,
Les os semez, & la teste pendue
Sur mon portail qui me sert de Trofè
De tiede sang à toute heure échaufé

Si de la Mort il s'est pris vne enuie
Comme ennuyé des malheurs de ta vie,
Tu es trompé de te laisser mourir,
Cheuaux perdus se peuuent raquerir,
Vne maison nous peut estre rendue,
Mais quand la vie est vne fois perdue
Enseuelie en vn tombeau reclus,
C'est fait, les Sœurs ne la resillent plus:
Or' sil te plaist d'une braue écriture,
Et d'un beau tiltre orner ta sepulture,
Vien au combat, grand honneur tu auras,
Quand par la main de Phouère mourras.

A tant mit fin à sa menasse fiere
Ne sachant point que c'estoit la derniere:
Pauvre chetif! le cours de son destin
En ce lieu-mesme auoit borné sa fin.

Tandis Francus qui le combat desire,
Songneux, des l'aube auoit de sa nauire
La fait venir le harnois que portoit
Troile à Troye, alors qu'il combattoit
Contre les Grecs, imitant la vaillance
Du bon Hector & non pas la puissance

Que pour present Helenin luy donna
 Le iour qu'au vent sa voile abandonna,
 Et le pria de garder telle armeure,
 Contre la mort assurance tresseure:
 Quand le Troyen au combat animé
 De teste en pied fut richement armé
 Le bon Dicæ en secret le conseille,
 Et loin à part luy sacoute en l'oreille.

Si de fortune hoste troyen les cieux
 De ce meschant te font victorieux,
 Et qu'à tes pieds tu l'abates à terre,
 Trencher luy tost la veine qui luy serre
 Le mol talon : de telle place fort
 Non d'autre lieu la cause de sa Mort.

Tandis là haut Iupiter qui ordonne
 Les faiëts humains la victoire te donne,
 Ia dans le ciel est fillé par Clothon
 Qui de vous deux doit aller chez Pluton:

Ces Champions enflammez de colere,
 Icy Francus, de l'autre part Phouère,
 Plus que deuant en armes fiers & grands
 Donnans l'esprit aux cheuaux par les flancs,
 D'un masle cœur l'un sur l'autre coucherent:
 Et leurs escus rudement embrocherent,
 Du coup donné le riuage trembla,
 Le mont fremit, le fleuve se troubla:
 En mille esclaves les pointes asserées
 Furent toucher les estoilles dorées.

Dedans les mains leur resloit le tronçon,
Qu'eulx bien fermez & roides en larçon,
De recourir encôres fauïserent,
Et leur Pauois par le milieu briserent:

A iour ouuert le Pauois se cassa:
Ainsi que glas le tronçon se froïssa,
Et d'un sel heurt leurs échines courberent
Que les destriers sur la croupe tomberent,
Tant d'un grand coup ils s'allerent choquant:
Puis iusq' au sang leurs cheuaux repiquant,
Haussant la bride, en fin les releuerent,
Et de la main leurs Coustelas trouuerent
Bien aiguïsez, qui de larçon pendoient,
Et de leur trempe un harnois pourfendoient.

Dessous le fer siffiant comme tempeste
Ores leur ioüe, ores sonnoit leur teste,
Ore la temple: un coup qui l'autre suit
Greslé menu faisoit un pareil bruit
Que les Beliers qui sur les fleuues congrent
Des paux aigus, quand les ouuriers besongnent
Pour faire un pont, ou pour le racourter,
Coup dessus coup le Belier fait entrer
Le bois piqué: Dessous le choq qui tonne
Le creux riuage & le fleuue en resonne,

Eux tournoians & se suiuaus de pres
Versans des coups plus que la nege espais
Qui neomboient soit de pointe ou de taille,
Sans donner ample ouuerture à la maille,

La dénoüant, rompant, & décrochant:

Acier ne fer à leur glaiue trenchant

Ne peut durer ny boucle ny couraye,

Tant de leur main est horrible la playe.

Du bon Troien le cheual fut adroit

Qui sans fraieur tournoit en tout endroit,

Et la cauale en crainte estoit frapée

Oyant l'horreur du siffiant de l'espée.

Pource Francus en parant éuitoit

Comme il vouloit la touche qu'il doutoit,

Et le grand corps ne trouuoit l'auantage

De le fraper comme il auoit courage.

L'un ressembloit à ce flot courroucé

D'écume blanche & de vent herissé,

Qui d'un grand branle en menassant se vire

Impetueux sur le bord du nauire.

L'autre sembloit au bon Pilote expert

Qui plus d'esprit que de force se sert,

Ores la proue, ores la poupe il tourne,

Et vigilant en un lieu ne sejourne,

Ains adioustant la vigilance à l'art

D'un œil prudent éuite le hazard

Ce fier Gean qui passoit d'une brasse

Tant il fut grand, de Francion la face

D'un pesant choq contre luy s'aprocha,

Et le pressant l'espaule luy toucha,

L'esgratignant de legere blessure:

Et n'eust esté la trempe de l'armure,

Qui de l'acier la force rebouchoit,
Bien loin du col l'espaule luy trenchoit:
Du mesme coup en releuant la dextre
Bien haute en l'air tant qu'elle pouuoit estre,
Se roidissant sur les estriers, frappa
Le sin armet du Troyen qu'il couppa
Deux doigts auant, & l'étonna de sorte
Que le dur corps d'une enclume bien forte
Seroit legier au pris de ce coup là,
Qui des arçons chancelé l'ébranla:
Car il fut tel, que la grand coutelace
Frapant la trampe alla dessus la place
En maint éclat de flammes allumé,
Laisant le poin du Tyran desarmé.

Francus troublé de pamaison extrême
Perdit la force en se perdant soimême,
Perdit raison contenance & couleur,
Grinssant les dents de rage & de douleur:
Dedans le tais luy tourne la ceruelle,
Deuant ses yeux erre mainte chandelle,
Meint tintouin aux oreilles luy bruit,
Son chef balance affublé d'une nuit,
Et ce pendant son cheual le promeine
Comme il luy plaît au trauers de la plaine.

Sans respirer sans sentir & sans voix,
D'ouuertes mains fit signe par trois fois
D'aller à terre, & si l'aspre tempeste
De ce meurdrier eust suiuy sa conqveste

*Iamais Francus aux gaulles n'eut pris bord,
Mais le Gean le tenoit comme mort.*

*Vne paleur qui s'enfante de craincte,
Des regardans auoit la face peinte,
Et le sang froid qui au cueur s'assembla
Fit que Dicae en soupirant trembla.*

*Mais tout ainsi qu'on voit deux colombelles
Fremir de peur sous les griffes cruelles
De l'esperuier, qui n'agueres auoient
Laisse leur nid, & legeres deuoient
S'en retourner au colombier pour paistre
Leurs chers enfans qui ne sont que de naistre,*

*Ainsi trembloient dans l'estomac les cœurs
A longs souspirs des deux royales Sœurs,
Qu'amour ardoit d'une viue flammeche,
Et dans leur sang auoit mouillé sa fleche.*

*Tandis Francus en armes eut loisir
De se refaire, & la place choisir
Pour se venger, où le fer le plus rare
Entre-serroit la gorge du Barbare.*

*Trois quatre fois son cheual repiqua,
Et d'un grand heurt son ennemy choqua,
Bandé de nerfs de muscles & de veines;
Puis en serrant fortement à mains plaines
Son coutelas, la pointe en retourna
Et du pomeau coup sur coup luy donna
Contre la gorge, où la boucle ferrée
Du Gorgin lâchement fut serrée*

Et my-pasme sur l'arçon l'abatit:
Auec le sang l'écumeluy sortit
Loin de la gueulle à gros flots ondoiante:
Francus le prend, le presse & le torment,
Et tellement le courage luy vient
Que d'une main & de l'autre le tient
Pousse & repousse, & d'un tel neud le serre
Que des arçons tous deux tombent à terre,
Comme grand pins: Le harnois fait un bruit
Dessus leur dos: La colere les suit!

Mais aussi tost que la terre presserent
Plus que deuant au combat s'élancerent
Comme lions de puissance indontez,
Le fer tranchant sacquent de leurs costez
Qui se cachoit d'une alumelle fine
Du long la cuisse en leur gaine iuoirine.

Entre l'ardeur, la haine, & les efforts,
Vne fureur leur rechauffa le corps,
Icy la rage, icy la chaude bonie
Des deux guerriers le courage surmonte,
Perd la raison, si bien qu'à toutes mains,
A vuides coups, à coups fermes & plains,
De pointe taille & de trauers ruerent,
Et leur harnois en cent lieux declouerent,
Si que le camp estoit par tout semé
Du fer tombé de leur corps desarmé.

Icy la Hausse, icy tombe la reue,
La Maille icy: Ces cheualiers sans treue

Fumant, suant, soufflant, & haletant,
Playe sur playe ils se vont combatant
Pié contre pié sans point changer de place:
L'un de son corps se fie en la grand masse,
Ferme en son poix, & l'autre plus gaillard
Dispost se fie au secours de son art,
Mais à la fin ils reprennent alaine
Demy-matez de sueur & de peine:
Puis tout soudain comme deux Toreaux font
Rentrent de piez & de bras & de front
L'un contre l'autre: Vne horreur, une rage,
Vn fier despit flamboye en leur visage:
Tantost petits, tantost ils se font grands,
Tantost courbez, tantost à demy flancz,
Dessus la iambe ores gauche ore dextre
Contre-ausioient où le coup pouuoit estre
Mieux assené, mais point ne se trompoient,
Car tout d'un coup ils paroient & frapient.

Francus luy iette en l'œil droit une pointe,
L'autre appuiant sur sa dague bien ioincte
L'espee en croix, loin de l'œil repoussa
La playe au vent, & le bràs luy blessa:

Le sang coula de cest enfant de Troie
Vermeil ainsy qu'est une rouge soie
Que la pucelle arrange avecques l'or
Dessus la gaze ornement d'un tresor.
Ou tel que fut de la playe Adonine
Le sang fardeur de la roze pourprine,

Mais pour cela ne perdit la Vertu:
Armé de cueur & de glaiue pointu,
Le suit le tient l'importune & l'aproche,
Comme les flots qui frappent vne roche.

Luy qui le corps de naissance auoit dur
Plus que metal ou le marbre d'un mur,
Comme ruzé, par longue preuoyance
Gardoit sa veine afin qu'on ne l'offence.

Francus qui vit que c'estoit temps perdu
D'auoir sur luy tant de coups despendu,
Ainsi qu'une Aigle en roideur qui se laisse
Caler à bas, ouurant la nue espesse
Dessus un Cygne arresté sur le bord:
Ainsi doublant effort dessus effort,
Sur le grand corps se lance de rudesse,
Adioustant l'art avecques la prouesse,
Soubs luy se rue, & de pres l'attacha,

La gauche main à son col accrocha,
Et de la dextre encontrebas le tire:
Il le tourmente, il le tourne, il le vire,
Le choque heurte, & d'un bras bien tendu
Le tient en l'air longuement suspendu:
Puis du genou les iambes luy trauerse,
Et le fit cheoir tout plat à la renuerse:
Le dos imprime en tombant de son long
La poudre mole: Ainsi tombe le tronc
D'un grand Sapin bronché d'une montagne
Qui de son corps imprime la campagne.

De bras de teste & d'ongles bien crochus
Cent fois essaie à se remettre sus,
Se debatant, mais en vain il s'efforce,
Car du Troyen la vigoureuse force
Tient le genou, comme victorieux
Sur l'estomac, le poignard sur les yeux.

Trois quatre fois de toute sa puissance
L'auoit frappé, quand il eut souuenance
Que le trespas de ce cruel selon
Estoit enclos aux veines du talon.
Pource il se tourne, & promptement assene
L'endroit certain où tressailloit la veine,
Du fer poignant coup sur coup la chercha,
Et veine & vie ensemble luy trencha.

Le sang qui sort d'une viue secousse
Bien loin du corps rendit la terre rousse
A longs filetz: ainsi que d'un conduit
S'eschape l'eau qui iallissant se suit,
Et d'une longue & saillante rousée
Baigne la place à l'entour arrosée:

Ainsi le sang bouillonnant s'en alla,
Avec le chaud son ame s'enuola
Palle d'horreur & de despit suinie
De perdre ainsi la ieunesse & la vie:

Ce corpstout froid & affreux se roidit,
Comme un gladdon l'estomac luy froidit,
Et de ses yeux l'une & l'autre prunelle
Ferma son iour d'une nuit éternelle,


N'estant plus rien d'un tel Tyran, sinon
Un corps bronché difamé de renom.


A tant Dicte d'une face ioieuse
Vint saluer la main victorieuse,
Baisa Francus le couronna de fleurs:
Tu as (disoit) effacé mes douleurs
Vray heritier de la gloire hectoree,
Tuant Phouëre & sauuant mon Orée:
Le bon Demon qui de nous à soucy
Pour mon support t'a bien conduit icy,
Noble Troyen de prouesse l'exemple,
En corps mortel digne d'auoir un temple,
Et comme Hercule adoré des humains,
Tant a d'honneur la force de tes mains.

Comme il chantoit cest hymne de victoire
Voicy la nuit à la grand' robe noire
Qui vint aux yeux le sommeil épancher,
Le souper faict chacun alla coucher.

FIN DV SECOND LIVRE

DE LA FRANCIADE.








LE

TROISIEME LIVRE DE LA FRANCIADÉ.



*L'*OBSCVRE nuit qui d'un
 sommeil enserre
 Les Dieux au ciel, les hom-
 mes en la terre,
 Laisant couler froidement
 sur les yeux
 Vne eau puisée au fleuve sty-
 gieux,
 L'une sur l'autre attachoit
 les paupieres,

Charme trompeur des peines journalieres.

Mais le dormir qui tient les yeux fillez
 N'auoit glissant ses presens escoulez
 Dessus le chef des deux Sœurs esueillées,
 De trop de soing amoureux trauaillées:

Adonc Hyante à sa sœur parle ainſy:

Mais d'où me vient, chere sœur, ce ſoucy
Que ma Raiſon à perdu ſa puiſſance?
Que mon penſer d'un autre prend naiſſance
Sans me reſoudre & qu'un nouuel eſmoy
Me rauiſt toute & chaffe hors de moy!

Je ne tien plus de mon cœur que l'eſcorce,
Dedans ſy loge une puiſſante force
Que ie ne puis ny penſer ny nommer,
Si ce n'eſtoit le mal qu'on dit aimer.

Je ſonge aſſés pour les cauſes aprendre
De mon trauail & ne les puis comprendre:
Bref ie n'ay peu ny boire ny manger,
Depuis le iour que i'ay veu l'eſtranger
Touiuors pendue en ſa blonde ieuneſſe
D'œil ou d'eſprit: Maugré moy ie confeſſe
N'auoir iamais ſenty telle douleur
Qui me fait perdre & ſommeil & couleur.

Depuis un iour ie ſuis toute eſperduë
Me conſommant comme nege fonduë,
Ah ie me meurs! mon mal pourtant me plaiſt
Et ne puis dire en quelle part il eſt:
Sans ſ'arreſter mon Eſprit eſt volage:
De ce Troyen touiuors le beau viſage,
L'honneur la grace en l'ame me reuient.
Touiuors touiuors & touiuors me ſouuient
De ſon combat, & de ſa main guerriere
Qui l'accompagne en ſa barbe premiere.

Pere des Dieux quelle aymable vertu!
 Quel port il a! comme il s'est combattu
 Pour le secours de nostre frere Oræ,
 Il est vraiment de la race Hectorée:
 Sa main sa force & son cœur genereux
 Montrent assez qu'il est du sang des Preux.

Si j'estois libre & si j'aüois puissance
 De viure à moy, je ferois alliance
 Par mariage à ce ieune Troyen.
 Plus tost le feu du grand Saturnien
 Tombé menu sur mon chef me foudroye,
 Plus tost la terre en se creuant m'enuoye
 Soubs les enfers ma demeure choisir
 Que mon honneur soit trompé d'un plaisir,
 Et que peu sage ainsi ie me marie
 Sans le congé de ceux qui m'ont nourrie.

Atant se teut: Le cœur luy est failly:
 Comme ruisseaux les larmes ont failly
 De ses beaux yeux, presages de sa peine,
 Quand d'autre part luy respondit Clymene,
 Qui moins n'ardoit de segrette langueur
 Pour le Troyen qui luy bruloit le cœur.

Mais plus que l'autre elle estoit auisée,
 Qui ne vouloit une amour diuisée,
 Ains vouloit seule en toute affection.
 Dame, iouir du cœur de Francion:
 Pource en mentant par un grand artifice
 Luy conseilla, qu'aimer estoit un vice,

*Ainsi son mal par fraude elle cacha,
Et l'inconstance à sa sœur reprocha.*

*Où sont, ma sœur, ces responces hautaines
Que tu rendois à tant de Capitaines,
Princes & Rois? que pour ses gouverneurs
Crete nourrist en pompes & honneurs?
Qui travaillez d'une amoureuse flame
Tous à l'envy te cherchoient pour leur femme?
Quoy? seulement d'un courage endurcy
Ne desdaignois ces maris: mais aussi
Tu mespriſois les hommes dont l'audace
Est trop cruelle encontre nostre race.*

*Quoy? disois-tu? comme un superbe roy
L'homme contraint les femmes à sa loy,
Non seulement les estime inutiles
A gouverner les sceptres & les villes,
Mais loing d'honneurs & loing de commander
Les fait ourdir, les laines escarder,
Coudre filer: & de paroles braues
En son foyer les tance comme esclaves.*

*Qu'heureuse fut Lemmos au temps passé,
Où le pouuoir des hommes fut cassé
Par la finesse & prouesse des femmes,
Si que les noms des hommes estoient blames.*

*A labourer les terres ils seruoient
Sans autre charge, & les dames auoient
Le magistrat, & seules la Police
Administroient le sceptre & la iustice.*

Où sont ces mots? ou est ce cœur si haut?
A ton besoing le courage te faut
Qui maintenant à la première veüe
D'un estranger as l'ame toute esmeüe
Et veux ton nom sans raison diffamer
Pour un Pirate, un Corsere de mer
Qui va cherchant par les ondes sa proye
Soubs faux-semblant de refaire une Troye:
Et par amour espiant la saison
De desbaucher les filles de maison,
Au premier vent loing d'amis les emmeine
Pour les laisser sur quelque froide areine:
Car estant soul de son premier plaisir,
Et ne voulant que changer & choisir
Les abandonne, & sans tenir promesse
Marche fuitif où l'orage le presse.

De tel malheur l'exemple encore vit
En ce país, d'Ariadne qui suiuit
Maugré Minos, le pariure Thexée
Tant elle fut à prendre bien aizée.

Mais aussi tost ce Pirate meschant.
De son serment & d'elle se sachant,
La quitta seule au matin endormie
Apast des loups, au rinage de Die.

Pource ma sœur, d'un cœur gaillard & prompt
L'honneste honte atache sur le front,
Et sans toy laisse errer à l'aventure
Des estrangers la teste si pariure.

Ainsi disoit diſſimulant, afin
De la tromper : mais amour le plus fin
Qui ne ſe trompe, & qui paſſoit en elle
De nerfs en nerfs, de mouëlle en mouëlle
La faiſoit caute, & ſon mal nompareil
Qui ne reçoit ny raiſon ny conſeil.

Atant du iour la lumière ſacrée
Dedans la chambre eſtoit par tout entrée,
Quand ces deux ſœurs, ainſois ces beaux printemps
Sortent du liét : ils demeurent long-temps
A leur peigner atiffer, & à faire
Par le mirouer vng viſage pour plaire:
En cent facons ils tordent leurs cheueux
Ondez creſpez entrefrizez de nœuds,
Et d'un long art mille beautez ſattachent:
Puis teſte & col d'un Guimple elles ſe cachent,
Qui bien plié iuſqu'aux pieds leur pendoit.

Vne blancheur vermeille ſeſpandoit
Par leur viſage: En ce poinct habillées
D'un pied ſuperbe au temple ſont allées
Comme à l'oracle, afin de ſcauoir mieux
Priant au ciel, la volonté des Dieux:

Où ſils vouloient d'une main fauorable
Guarir leur playe autrement incurable,
Où ſils vouloyent deſdaigner ſans ſecours
Leurs paſſions diuerſes en amours,
Et ſans eſpoir entretenir leurs flames.

De toutes pars vne ſuite de Dames

Les entouroient : Elles marchoient d'un train,
Ainsi que fait Diane au large sein
A qui la trouffe & le bel arc ensemble
Chargent l'espaule: autour d'elle s'assemble
Vn grand monceau de Nymphes, qui en rond
Tournent le Bal : Elle de tout le front,
Haute de col, aparoist sur la troupe
Qui va dansant dessus la belle croupe
Du mont Taigette, où sur l'esmail d'un pré
Du fleuve Eurote à son frere sacré.

Or ces deux sœurs malades & peu sages,
Pres des autels, au deuant des images
Des puissants Dieux, tristes se promenoient:
Ores les yeux fichez elles tenoient
Sur la victime, & courbes & beantes
Prenoient conseil des antrailles tramblantes,
Ou les Geziens decoupez regardoient,
Et l'aduenir aux Deuins demandoient.

La belle Hyante auoit en sa main blanche
Vn vase plein de vin, qu'elle respanche
Au beau milieu des cornes & du front
De la victime: Et Clymene qui tond
Le poil sacré de la beste, le iette
Dedans le feu: Comme ce poil craquette
Ce disoit elle, & brusle tout en soy,
Ainsi Francus puisse brusler de moy.
Mais pourneant ces deux sœurs abusées
Estoient au temple en leurs vœux amusées:

Les Dieux malings leurs oreilles fermoient:
Les vents en vain la prieres semoient
De ces deux Sœurs qui n'estoient plus qu'un songe.

Amour les mord les rélime & leurs ronge
Cœur poumons foye, & n'ont autre pouuoir
En leur malheur qu'esperer sans espoir.

Tandis Francus que le soucy resucille
S'estoit leué deuant l'Aube vermeille:

De la grand' peau d'un Ours il s'habilla
Un iavelot en sa dextre esbranla
Au large fer (Vandois d'où vint la race
Des Vandosmois le suiuoit à la trace)

Luy se laissant en larmes consommer
S'alla planter sur le bord de la mer:
Iettant ses yeux sur les eaux Tethiennes
Seul regardoit si les barques Troyennès
Venoient à bord: & voyant le Vaisseau
Qui le portoit, à demy deffous l'eau
Presque couuert de salaize & de bourbe:
Les yeux au ciel sur le rinage courbe
Poussant du cœur meints sanglots en auant
Parloit ainsi aux ondes & au vent.

Heureux trois fois ceux que la bonne Terre
Loing de la vie en long repos enferre:
Si comme nous ne voyent le soleil,
Ne hument l'air: ils n'ont aussi pareil
A nous le soing, qui pressant nous martyre
D'autant facheux que toniours il desire.

Ce mechant soing qui compagnon me suit
Me fait chercher la gaulle qui me fuit,
Terre estrangere, & qui ne veut m'attendre,
Que du seul nom i'ay prise, sans la prendre.

Ie suis (ie croy) la mandisson des Cieux
Qui sans demeure erre de lieux en lieux,
De flot en flot, de naufrage en naufrage
Ayant le vent & la mer en partage
Comme vn Plongeon, qui en toute saison
A seulement les vagues pour maison,
Des flots salez il prend sa nourriture,
Puis vn sablon luy sert de sepulture.
Ainsi la mer me porte sans effait
Et mon voyage est tousiours imparfait.

Bonté des Dieux, & toy Destin qui meines
A ton plaisir toutes choses humaines
Auray-ie poinct en repos, le moyen
De rebastir vn mur Dardanien?

Voirray-ie point vne Troyenne plaine,
Voirray-ie point ceste gauloise Seine
Qui m'est promise en lieu des larges tours
De Simois & Xanthe, dont les cours
Arouzoient Troye, & d'une onde poussée
Rompoient le sein de la mer renuersée.

Donne Apollon maistréffe Deité
De ceux qui vont bastir vne cité
Vn bon Augure, afin que tu m'ottroyes
Des murs certains apres si longues voyes.

*Si ie ne puis les gaules conquerir,
Sans plus errer puisse-ie icy mourir
D'un trait de feu vestu d'une tempeste:*

*Aux Dieux marins victime soit ma teste
Pour sacrifice agreable à la mort
D'un pen de sable entombé sur ce bord.*

*Il dist ainsi, quand des ondes humides
Sortit le chef des cinquante Phorcydes,
Et tout le Chœur de Glauque & Melicert,
Et Palémon à l'habillement verd,
Le vieil Triton à la perruque bleue
Homme d'en haut, & poisson par la queue,
Tenant és mains pour sceptres leurs Tridens,
Poussent la nef de Francus au dedans
Du prochain port: la Nauire poussée
Ayant la prouë & la poupe froissée
Rouloit à peine: ainsi que le serpent
Qui sur le ventre à peine va rampant
Par le chemin, quand d'un coup de housine
Quelcun luy rompt l'entre-deux de l'eschine.
Plis de sus plis en cent ondes retors
Sifle, retrainne, & retourne son corps,
Se lechant son venin il remâche
Et renouër ensemble se retâche:
Mais pourneant: car son dos est perclus.
Ainsi trainoit le bateau de Francus.*

*Hors du troupeau bien loing s'est esparcée
Leucothoë la fille de Protée,*

A qui Phœbus pour la favoriser
 Donna iadis l'art de prophetiser:
 Ses longs cheueux erroient par la marine,
 Son chef estoit plus haut que la poitrine
 Tiré sur l'eau, quand se iouant ainsi
 Francus appelle ayant de luy soucy.

Enfant royal qui dois donner naissance
 A tant de rois : la seule patience
 „ Rompt la fortune, & mal ne peut souffrir
 „ Qui ne soit doux quand on le veut souffrir.
 Sois courageux : Toute rude aduventure
 „ Par temps se fait douce quand on l'endure:
 Pour endurer Hercule se fit Dieu.

Tu planteras ta muraille au milieu
 Des bras de Seine, où la Gaule fertille
 Te doit donner vne isle pour ta ville,
 Gaule abondante en peuples redoutez,
 Peuples guerriers aux armes indontez,
 Que telle terre & plantureuse & belle
 Riche nourrist d'une grasse mammelle.

Or puis qu'Amour te veut favoriser
 Son beau secours tu ne dois mespriser,
 Ne t'en va doncq sans courtizer Hyante
 Fille du Roy, qu'Hecate la puissante
 A fait prestresse en son temple sacré.
 Ce Dieu qui fait toute chose à son gré
 Victorieux luy recele au courage
 Vn poignant trait tiré de ton visage.

Par sa magie elle peut attirer
La Lune en bas, le ciel faire virer
A contre-cours, & des fleuves les courfes
Encontre-mont rebrousser à leurs sources.

D'un clair midy elle fait une nuit,
Deffous ses pieds la terre fait un bruit
Quand il luy plaist, & sa force commande
A Proserpine, & à toute la bande
De ces esprits iadis hostes des mors
Qui plains d'oubly reuont en nouueaux corps:

Elle qui est de ton amour gagnée,
Te fera voir ta future lignée,
Et tous les rois qui sortiront de toy,
Forts à la guerre, & prudens à la loy:
Qui d'un long ordre & de longue puissance
Tiendront un iour le beau sceptre de France.

Mais cependant que tu pleures en vain
Rongeant ton cueur atristé dans ton sein
Sur cette riue escumeuse & deserte:
Ah! malheureux tu as fait une perte
D'un cher amy qui touiours te suiuiot.

Son esperance en la tienne uiuoit
Seur compaignon de ta dure fortune:
Las! il est mort: Iunon par sa rancune
A fait de terre un sanglier grand & fort
Naiître à son dam pour luy donner la mort.

Au poinct du iour comme il alloit en questie
Il a de front rencontré ceste bestie

Au dos rebours, aux yeux fiers & ardens
 Qui receloit la foudre entre ses dens:
 D'un coup meurdrir la nauré dedans l'aine
 Et froid & mort renuerse sur la plaine.

Va viftement & le fais enterrer,
 Et son esprit ne laisse poinct errer
 Dessus le corps long temps sans sepulture,
 Qu'il ne te soit vn malheureux augure.
 Dessous ta main le monde il eust soubmis
 Si le Destin enuieux eust permis
 Qu'il eust en gaule ordonné ton armée:
 „ L'homme n'est rien qu'une vaine fumée!

Atant la Nymphé en parlant deu ala
 Son chef soubz l'eau: L'onde que ça qui là
 Flot dessus flot en se ridant grommelle
 D'un long tortis l'engloutit deffous elle:

Tandis Dicé que le soing tient rauy,
 De Francion les pas auoit suivy:
 Deux grands leuriers yssus de bonne race,
 (Fidelle guet) le suiuioint à la trace:
 En abordant Francus plein de soucy
 Luy prist la dextre & le salue ainsi.

Prince Troyen, dont la vertu premiere
 Du pere tien efface la lumiere:
 Quand mon pais en deux ie partiroy
 Et d'une part honoré ie t'aurois,
 Encor beaucoup ie serois redenable
 A ta vertu qui n'a point de semblable,

Qui as tiré mon enfant du danger,
Qui seul as peu du monstre me vanger,
Monstre cruel, qui moquoit la iustice,
Moquoit les Dieux & l'humaine police,
Et m'abontant de toute indignité
De son harnois estonnoit ma Cité.

Ie t'offrirois en lieu de ta prouesse
Vn grand amas de pompeuse richesse,
Bagues, lingots, coupes d'or, & vaisseaux,
Mais tu ne veux, ô fleur des iouuenceaux
Ta vertu vendre à si frefle despence,
Le seul honneur te plaît pour recompense.

Le seul honneur en l'antique saison
Assist Hercule & Thesée & Iason
Au rang des Dieux, & ie t'oze promettre
Que ta prouesse encores te doit mettre
Dessus la nuë, aupres de tes Ayeux
Que la vertu enrosle entre les Dieux.

Pource, estrangier, la richesse me sprise,
Ne rouille point ton cœur de conuoitise,
Et comme prince aux armes bien appris
De tes labeurs louange soit le prix.

Entre les biens les plus grands de ma ville
Mon seul thresor, j'ay vne chere fille
Qui de beauté ne fait place à venus,
De qui les ans accomplis sont venus
Qu'elle doit estre en fleur d'age menée
Dessous la loy du nopcier Hymenée.

S'elle te plaist, nous ioindrons en sa main
 La tienne, afin que des le lendemain
 Tu sois espoux d'une si chaste fille,
 Et de vous deux s'esleue une famille
 Grande en honneurs, de ceste terre Rois
 D'où tes Ayeux sont yssus autrefois:
 Car si on croit à nostre vieille Annalle,
 Crete, de Teucre est la terre natalle.
 Ainsi Dicée en le tentant luy dit
 Quand Francion luy contre-respondit.

Prince Cretois qui à bon droit te vantes
 Estre sorty de ces vieux Corybantes
 Qui sous le glaive & la loy qu'ils tenoient
 D'heureuse paix leurs peuples maintenoient:
 En peu de mots pour si haute entreprise
 Je respondray: l'auray toujours esprise
 D'un souuenir l'ame qui vit en moy
 Pour les bienfaits que iay receu de toy,
 Qui pauvre & nud tourmenté du naufrage
 Ne m'as permis seulement ton riuage,
 Mais en forceant de fortune le cours
 M'as présenté ta fille & ton secours.

Or si i'auois puissance sur ma vie,
 Si du destin elle n'estoit rauie,
 Et si i'estois porté de mon plaisir
 Je ne voudrois ton royaume choisir
 Pour demeurer, Ains alaigre de ioye
 I'irois chercher encor ma vieille Troye,

Et me plairoit entre les vieux tombeaux
De mes ayeux, bastir des murs nouveaux
Et d'habiter la cendre de mes peres:
Mais les destins soient mauuais ou prosperes
Contre mon gré me traissent, & me font
Enfoncer l'œil & abaisser le front:
Ie souffre tout ne pouuant autre chose
Contre le ciel qui des hommes dispose.

Ce fier destin la gaule me promet,
Qui seulement marier me permet
En Allemagne & non en autre place:

Du sang Troyen meslé parmy la race
Du sang Germain, des Rois doiuent sortir
Qu'on me promet le monde assuietir,
Ayant borné par le gleue leur gloire
Du rond du ciel, la mer de leur victoire.

Donne sans plus à ce prince troyen
Des charpentiers du bois & le moyen
De rebastir vne flote nouuelle
Pour retanter la fortune cruelle,
Et le malheur par qui tout est donté,
Qui maugré moy force ma volonté.

Il dist ainsi: Dicée qui prend garde
A son maintien tout estonné regarde
D'yeux & d'esprit ce Troyen qui parloit,
Et pour son gendre en son cueur le vouloit
En cependant son ieune fils Orée
Pour celebrer la victoire honorée

Et pour aux Dieux saquiter de ses vœux,
 Dedans un parc auoit choisi cent beufs
 Au large front, agreables offrandes,
 Blancs, grands, & forts: victimes les plus grandes:
 Et pres la ville en un boccage saint
 Manoir des Dieux religieux & craint,
 Les amena (on dit qu'en ceste place
 Minos parloit à Iupin face à face,
 Quand il prenoit les loix de ce grand Dieu)
 Il mit de rang les cent beufs au millieu
 Du vert boccage, & de gazons il dresse
 Un saint autel à Victoire deesse.

De tous costez errant en diuers lieux,
 Il amusoit son esprit & ses yeux
 A regarder s'il verroit d'auenture
 Quelque grand arbre esueillé de verdure.

Non gueres loing sur le Tertre prochain
 Vit un vieil chesne espaix au large sein
 Aux larges bras, qui ses branches fueillues
 D'un chef superbe enuoyoit iusqu'aux nuës.

De ses rameaux tout le chesne esbrancha,
 Puis sur la cyme en trophée attacha
 Du mort Gean les armes despouillées,
 Cuissors sanglants, Greues de sang mouillées,
 Maille, Plastron, Gantelets & Brassars,
 Le ianelot le poignard & les dars
 La large espée, & l'effroyable cresse
 Du morrion gardien de la tesse.

Deuant l'autel les beufs il assomma,
Le sang qui sort à gros bouillonssuma
Soubs le couteau meurtrier de la poitrine:
L'un la peau crüe arrache de l'eschine,
L'un les estrippe & l'autre peu à peu
Pour les rôtir allumoit un grand feu:
Dedans le ciel en voloit la fumée!

Quand par le feu l'humeur fut consumée:
D'ordre en son rang un chacun s'aprocha
Et pour manger sur l'herbe se coucha:
Le vin se verse, & l'escumeuse coupe
De main en main erre parmy la troupe,
Que de bon cœur sinuitant receuoient,
Et la moustache en la tasse lauoient.

De la Cité les dames bien coiffées,
Aux doux regards, aux gorges atiffées
De beaux ioyaux, au riche corps vestu
D'un or broché en la soye batu
Menoient le bal: Terpin qui les deuance
Tout le premier acordoit la cadence,
Chantant cés Hymne, & mariant sa voix
Au luit poussé du trambler de ses doigts.

Royne du monde inuincible victoire,
Dont les habits sont pourfillz de gloire,
D'honneur de pompe, & dont le front guerrier
Est honoré de palme & de laurier:

Royne qui sœur de Fortune se nommes,
Qui tousiours pends douteuse sur les hommes,

Et le conseil casses du bataillant,
Qui seule fais d'un couhard un vaillant,
Et d'un vaillant un couhard, quand ta face
Cache en noz cueurs ou le chaut ou la glace:

Tu es douteuse incertaine & sans foy,
Tu fais, defais, comme il te plaist, un Roy,
Puis le refais, & les Citez tenuës
Sous Tyrannie esleues dans les Nuës.

Tantost l'esper tantost la peur te suit:
Tout l'univers se comble de ton bruit.
Quand le Renom aux aïles emplumées
Seme par tout l'effroy de tes armées.

Aucunefois tu flates les humains,
Aucunefois tu coules de leurs mains
Un songe vain faute de te poursuiure,
Et le veincu veinqueur tu laisses viure:
Et le veinqueur qui te pense souuent
Tenir chez luy ne tien rien que du vent.

Pour compaignon tu meines l'arrogance,
Et ne scay qu'elle impudante esperance
Qui pour gaigner aucunefois le bien
De ton voisin te fait perdre le tien:

Le sang, la mort la cholere. acharnée,
Et des soldars la licence esfrenée
Et le mesprix des grands Dieux immortels
Suiuent tes pas: & toutefois tu-és
Mere des Roys, des Sceptres, & des villes,
Tu fais germer les campagnes fertilles,

*Et foisonner les coutaux de raisins,
Honneur des tiens crainte de tes voisins.*

*Deuant ton Char que la crainte enuironne
Marche Enyon & la fiere Bellonne,
Et la Ieunesse au sang bouillant & chaut,
Et le Peril à qui la raison faut.*

*Sans ton secours Mars ne pourroit rien faire,
Des fiers Titans tu fus seule aduersaire,
Lors que ta mere un harnois te donna:
Pource lupin d'honneur la couronna,
Et ne voulut par promesse assurée
Que deormais son eau fust pariurée:*

*Escoute moy vieille race des Dieux:
Du bon Francus les faits laborieux
Atache au ciel en lettres immortelles:*

*En sa faueur romp le vol de tes éfles,
Et sans partir, sois en toute saison,
De ce Troyen hostesse en la maison.
Il dit ainsi: La gaillardeassemblée
A iusqu'au ciel la chanson redoublée.*

*C'estoit aux Mois que le bel an tourné
Auoit par tout le printemps ramené
Son ieune enfant: quand la terre tresbelle
Comme un serpent sa robe renouuelle,
Et quand Amour pousse de toutes pars
L'arc en la main, ses flames & ses dars:
Quand les forests les plaines & les fleuves
Tertres & bois vestus de robes neuues*

*Enorguillis de cent mille couleurs
Pompent leur sein d'un riche émail de fleurs:
Mais quoy que l'an & le printemps ensemble
Fussent tresbeaux, leur ieunesse ne semble
(Bien que fleurie en mille nouveautez)
Ny au maintien aux graces ny beautez
Du iouenceau Francion, ny à celles
Qui donnoient lustre aux royales pucelles.
Comme trois lis à l'enuy florissoient,
En leurs regards les traits d'amour croissoient,
Et sur leur front au vif estoient descrites
Venus, Pithon, & toutes les Charites.*

*Ce Francion auoit un beau menton
Crespu de soye, & pareil au coton
Prime & douillet, dont le fruitier Autonne
La peau des coings blondement enuironne:
Sa taille estoit d'un prince genereux;
Grande, heroique, & pareille à ces preux
Iason, Thezée, & à ceux qui semée
Ont en tous lieux leur viue renommée:
Sa large espaule, & sa greue, & sa main,
Et le relief honneste de son sein
Estoiert si beaux, si bien faits de nature,
Qu'on ne pourroit les tracer en peinture.*

*De ces deux sœurs, par un art nompareil
Les beaux cheveux surmontoient le Soleil
Enlassez d'or: semblable estoit leur iouë
Au teint vermeil de la roze qui nouë*

Dessus du lait, & sortoit de leurs ris
Le ne scay quel enchanteur des esprits.

De ronds tetins messagers de ieunesse
S'enfloit leur sein: une gaillarde presse
D'amours, d'atraits, de graces, & de ieux,
Vne embuscade auoient en leurs cheueux:
Le doux parler en leurs bouches habite,
Et l'homme auroit le courage d'un Scythe
Et seroit né des Tygres & des Ours
Si les voyant ne salumoit d'amours.

A tant Vesper de flames habillée
S'estoit au ciel la premiere esueillée,
Menant le bal des Astres radieux
Qui cà qui là sautent parmy les cieux.

Finis les vœux qu'on rendoit à victoire,
Voicy Venu à la paupiere noire
Mere d'amour, qui vint sur la mi-nuit
De ces deux sœurs enuironner le liët.
Elle se change en la vieille prestresse
Qui sous Hyante auoit de la Deesse
Autels & temple en venerable soing,
Qui touiours pronte entendoit de bien loing
L'abboy des chiens annonçant sa venue:
Ou quand d'enfer, ou quand d'outre la Nuë
Elle à trois fronts effroyable arriuoit
Fiere en son temple où la nuit la suiuoit.

En se couchant sur le cheuet d'Hyante
Luy dist ainsi: D'un chesne d'Erymanthe

Ou d'un rocher le rempart de la mer,
Oze-tu bien sa poitrine enfermer?
As-tu sucé des louues la mammelle?
As-tu le cœur d'une tygre cruelle,
Qui n'as le cœur passible d'amitié?
Qui du Troyen n'as ny soing ny pitié
Qui meurt pour toy? qui à laissé sa terre,
Non comme il dit pour les gaules conquerre,
Mais tout rauy du bruit de sa beauté,
A de la mer veincu la cruauté
Pour voir ta face, & sil estoit possible
Se ioindre à toy d'un lien inuincible.
Et toussefois fiere de son ennuy
Tu vois sa playe & te moques de luy.

Disant ainsi, de sa belle Ceinture
Du liêt d'Hyante encerna la closture:
Ceste Ceinture estrangement pouuoit,
Que la Nature en se iouant auoit
De sa main propre à filets d'or tissué,
Et d'elle en don Venus l'auoit receüe
Quand le boiteux Lemnien tant oza
Que pour sa femme au ciel il l'espouza,
Dont est sorty tout l'estre de ce monde,
Tout ce qui noué au plus profond de l'onde:
Ceux qui d'une asle en l'air se font un train:
Tout ce qui paist la terre au large sein,
Tout animal cazanier & sauuage,
Est enfanté de ce grand mariage.

*En la tiffure estoient portraits au vif
Deux Cupidons: l'un auoit vn arc d'If
Au trait mouffu, qui tire aux fantaisies
Crainctes soupçons rancueurs & ialousies,
L'autre de palme auoit l'arc decoré,
Son trait estoit à la pointe doré,
Poignant glissant, dont il cache dans l'ame
Et verse au sang vne gentille flame
Qui nous chatouille, & nous fait desirer
Que nostre genre entier puisse durer.*

*Là fut leunesse en longs cheueux portraite,
Forte puissante au gros cœur, la retraite
Des chaux desirs: leunesse qui toujours
Pour compagnie amène les amours:*

*Comme vn enfant pendoit à sa mammelle
Le Ieu trompeur, la Fraude, & la Cautelle,
Les Ris, les Pleurs, les Guerres & la Paix,
Treues, discords, & accords imparfaits,
Et le Denis qui deçoit noz courages,
Voire l'esprit des hommes les plus sages.*

*Quand la Ceinture eut versé sa vertu
Dessus le liêt: le feu qui n'auoit-eu
Puissance entiere au cœur des damoiselles
Se renforcea de larges étincelles,
De nerfs en nerfs d'os en os prist vigueur,
Puis tout soudain se fit roy de leur cœur.*

*Comme le feu caché sous les fougères,
Qu'aux mois d'huyver les peureuses bergeres*

D'un deuantteau vont & reuont soufflant
Fueille sur fueille, & largement enflant
Poumons & gorge, à toute peine enantent:

D'un petit traq mille flames s'augmentent
En longue pointe : à la fin un grand feu
En se suiuant s'alonge peu à peu,
Brule les champs, & d'une torte voye
Iusques au ciel une fumée enuoye
Trouble d'esclairs : le feu victorieux
Regne au sommet des chesnes les plus vieux!

Ainsi d'Amour les flames allumées
De peu à peu dedans l'esprit semées
De ces deux sœurs par un traq deuoyé,
Un grand brazier au cueur ont enuoyé.

Incontinent que la belle iournée
Chassant la nuit au ciel fut retournée,
Le bon Troyen larmoyant sans confort
Fit aprestier les obseques du mort
Qui d'un sanglier auoit l'haine tranchée,
Et que la Nymphe au creux de l'eau cachée
Auoit enioinct promptement enterrer,
Et son esprit ne laisser point errer
Dessus le corps priué de sepulture,
Qu'il ne seruist d'un malheureux augure.

L'humain esprit qui le corps à laissé
N'est plus heureux si Styx il n'a passé:
L'honneur du corps dont la vie est cassée
Est le sepulchre & la terre amassée,

Sur le tombeau qui finist les douleurs,
Et des amis les regrets & les pleurs.

Premierement on ex plane une place
Large en quarré, de deux cens pas d'espace
Où au milieu on assemble un Bucher,
Puis sur la cyme un lit pour le coucher.

Par les forests d'une penible traite
Va haut & bas meinte large charrete,
Qui gemissant sous le faix, aportoit
Le bois coupé que le fer abatoit:
Auecq les coings le chesne bon à fendre
Trebuche icy: On laisse là descendre
Auecq grand bruit de la cyme des monts
Ormeaux toffus, Trambles aux lages fronts.
Contre le Till la mordante congnée
Coup dessus coup resonne embesongnée:
Et plat à terre on laisse deualer
Les gras Foteaux faciles à bruler.
Le Sapin tombe & le Pin plus vtile
Pour voir la mer: Puis on dresse une Pile
Bois dessus bois nourrissons des forests.

Tous les cotex sont parez de Cyprés,
Le bas de pin, & de chesne le feste:
Dedans le ciel le Bucher à la teste!
D'une autre part ses plus loyaux amis
Sur les charbons des chaudrons auoient mis:
La flame esparse autour du ventre large
Fait bouillir l'eau: les vns prenent la charge

D'oindre & lauer le corps froid, triste dueil.

Autres apres le couchent au cercueil,
Et soupirant ils arroüzoient leurs armes,
Le corps, la biere & la terre de larmes.

Le bon Francus pleurant & sanglotant
De son amy la teste alloit portant,
Melancholique & triste de pensées:
Les vns portoient des torches renuersées,
Autres chantoient les faits du demi Dieu.

Mais aussi tost qu'ils arriuent au lieu
Où il faillloit que la flame soudaine
Le deuorast: une tristesse humaine,
Vn long soupir entre-baigné de pleurs,
Vn triste cry presage des malheurs
Venant d'une ame en longs soupirs attaincte
Dedans le ciel enuoya sa complainte.

Dessus couché au plus haut du sommet
De ceste Pile en larmoyant on met
Le corps tout froid, office pitoyable.

Tout ce quil eut en sa vie agreable
Y fut ietté, autant qu'en permettoit
Le bien troyen que lexil agitoit.

Francus qui tient une torche fumeuse
Boute le feu: La flammieche gommeuse
D'un pié tortu rampant à petit saut
En se suiuant senuole iusqu'au haut:
Le bois craquete, & la Pile alumée
Tombe sous elle en cendres consommée

Le vent soufflant du soir iusqu'au matin.

Incontinent le vieil Prestre Mysslin

Qui du corps mort soingneux auoit la garde,

Laue la braize & la cendre boiuarde,

Choisit les os & les mist dans le sein

(Sacré tombeau) d'un vaze fait d'airain:

Puis arroza par grand ceremonie

D'une sainte eau trois fois la compagnie:

Les derniers mots de l'obsequie acheua,

Atant se teut, & le peuple sen va.

Francus qui veut soubz les ombres descendre

Tond ses cheveux & les mist sur la cendre:

Cher compaignon pren de moy ce present

Tesmoin du dueil que mon courage sent

Pour le regret d'une si chere perte:

Disant ainsi, la Cruche il a couuerte

De ses cheveux qu'il auoit autrefois

Promis en vœux au grand fleuve gaulois.

Nous n'irons plus comme nous souliions faire

Tous deux seulet en un lieu solitaire

Loing de la troupe ensemble deuifer,

D'un dur sommeil il te faut reposer:

La Mort te tient de silence suiuiue,

Et maugré moy ie traine ceste vie,

Qui m'estoit douce alors que ie pouuois

Voir ton visage, & entendre ta vois,

Soulagement de ma fortune extrefme.

Cher compaignon, ainçois second moy mesme,

Je te suply ne te faches de quoy
 Plus grands presens tu n'as receu de moy
 Qui suis bany sans foye & sans terre,
 Qui pour partage ay la mer & la guerre.

Mais si le ciel qui predict mon bonheur
 Me fait vn iour de ce peuple seigneur
 Que Seine embrasse en son giron fertile,
 Je batiray de ton nom vne ville,
 Et courriray d'un Tombeau solennel
 Tes os couchez en repos eternel.

A tant se teut : Les larmes resspandus
 Dessus la face en roulant descendus,
 L'une sur l'autre à gouttes se hastoient,
 Et les soupirs l'estomac luy batoient
 Blasfant la mort d'une plainte profonde,
 Qui rien de bon ne laisse viure au monde.

Ce triste office à l'ennuy regardoient
 Les ieunes Sœurs, qui leurs beaux yeux dardoient
 Sur le Troyen, dont les larmes ietées
 Auoient beaucoup les graces augmentées:
 En le voyant ensemble bon & fort
 Plus que deuant Amour gangna le fort
 De leur raison, d'une fleche laschée
 Dessous le cueur profondement cachée:
 Mais plus Clymene au foye elle touchoit
 D'autant que plus sa flame elle cachoit.

De toute chose elle pert la memoire,
 Se pert soy mesme : vne tristesse noire

Bien loing du corps desroba son esprit
Qui de pensers seulement se nourrit.

D'un feu segret fait escouler ses peines
Aux nerfs, aux os, aux muscles, & aux veines,
Et dans le foye, où la playe se fait
Grande en douleur, quand amour de son trait
Blesse quelcun : & bres depuis la plante
Jusqu'à la nucque, vn soucy la tourmente,
Point frappe, bat : Elle qui sent parmy
Ses propres os loger son ennemy,
Pense & repense & discourt en sa teste:
Son penser vole & iamaïs ne s'arreste
Decà delà virant & tournoyant
Comme l'esclair du soleil flamboyant
Sortant de l'eau naguères resspandue
Dans vn chaudron à la pansé estandue:
Ce prout esclair, ores bas ores haut
Par la maison sautelle de meint saut
Et bond sur bond aux foliueaux ondoye
Pirouetant d'une incertaine voye,
Et fait courir ses longs rayons espars
De place en place errant de toutes pars.
Ainsi discourt sans arrest de pensée
De trop d'amour la Pucelle offensée:
Sur vn penser vn autre redoubla,
Mais cetuy-cy le meilleur luy sembla:
Ce fut de prendre vne chambre segrete
Et loing à part pleurer toute seulesse.

Dessus vn coffre, a bouche se coucha,
Puis quand sous l'eau le soleil se cacha
Se iette au liét, où le sommeil qui presse,
Fit pour vn temps à son mal prendre cesse,
Mais pourncant, Car le somne trompeur
Entre-meslant l'esperance en la peur
Vint l'effroyer, comme il a de coutume
D'effroyer ceux de qui la playe fume
Dessous le cueur, quand vn extreme ennuy
Commande au corps & regne tout en luy.

Elle songeoit pleine d'amour extremesme,
Entre-dormant, que Francus de soymesme
Estloit venu en Crete pour ozer
Prier son pere afin de l'espouzer,
Et que la dextre en la dextre ayant mise
De l'estranger, la luy auoit promise:
Que par courroux desdit il s'en estoit,
Que le Troyen pour elle combattoit
A toute force, & que tout bouillant d'ire
Il l'atrainoit en sa creuse nauire
Bien loing de Crete en la profonde mer,
Et que son pere ardent faisoit armer
Mille vaisseaux afin de la poursuire,
Et le larron ne laisser ainsi viure:
Que le riuage estoit remply de feux,
Torches, brandons, & de peuples esmeux
Faisant grand bruit, & ce bruit la resueille.
Or comme Amour traitrement la conseille,

Deuant le iour hors du lit se leua,
 Et de sa chambre à taton elle va
 Touchant les murs d'une main incertaine,
 Et r'amassa son esprit à grand peine
 Que le sommeil du corps luy destacha:
 Puis de rechef au lit se recoucha
 D'amour de peur & de rage frappée,
 Où de rechef le songe l'a trompée.

Touiours au cueur Francus luy reuenoit
 Et le maintien qu'en parlant il tenoit,
 Quel geste il eut quel port & quelle face,
 Et quelle fut la douceur de sa grace,
 Quelle sa robe, & quel fut son parler,
 Ses doux regards sa taille & son aller:
 Son menton cresp & sa perruque blonde:
 Elle pensoit qu'il ny eust prince au monde
 Pareil à luy: touiours sa douce voix,
 Ses doux propos, & ses deuis courtois
 Comme pasmée & pleine de merueille,
 Coup dessus coup luy refrapoiert l'oreille.

Aucunefois elle songeoit errer
 Par les desers, & seule s'égarer
 Entre rochers, riuieres, & bocages
 Sans compagnie entre bestes sauuages,
 Et que Francus amoureux estranger
 Le fer au poing la sauuoit du danger.

Aucunefois apres l'auoir vangée
 L'offroit luy mesme afin d'estre mangée,

Puis hors des dents des lions la sauoit,
 Et son secours luy nuisoit & seruoit:
 Tout en sursaut elle s'est resueillée
 Nuds pieds, sans robe, afreuse, escheuelée,
 Et s'acoudant dessus le coin d'un banc
 Mille souffirs repoussa de son flanc:

Pauvreté moy ! en quel effroy m'ont mise
 Ces songes las ! qui toute nuit m'ont prise,
 L'en tremble toute & le cueur m'en debat,
 Crainte & Amour me font un grand combat.

Certe s ie suis toute autre deuenüe
 Que ie n'estois: ie crain que la venue
 De ce Troyen ne m'apporte malheur
 Comme en songeant il m'apporte douleur:
 Toujours i'ay pense ! heureuse & plus qu'heureuse
 Si forcenant ie n'estois amoureuse,
 Et si iamais pour euit la mort,
 Le fils d'Heclor n'eust touché nostre bord.

Comme au Printemps on voit une lenisse
 Qui n'a le col courbé sous le service
 Du premier ioug courir parmy les champs
 A qui le Tan aux aiguillons tranchans
 Pique le flanc & la pousse en furie.

Ny les ruisseaux hostes de la prairie,
 Herbes ny fleurs, ny oposé rocher
 Ne la scauroient engarder de moucher
 De toutes part vagabonde & courante:
 Ainssi Clymene en son esprit errante

Court & recourt, & n'est iamais oſlé
Le poingnant trait qui naure son coſlé.

Que doibs-ie faire, ou iray-ie? dit elle,
Pour me garir perſonne ne m'apelle!
Ie meurs ſans ayde, & ſi ie ne veux pas
Que ſœur ny frere entende mon trespas:
Faut-il qu'en pleurs ie diſtille ma vie?
Que de ma ſœur ainſi ie me deſſie
Qui ſeule eſtoit mon conſeil autrefois
Qui m'aimoit toute & que toute j'aimois?
Helas il faut que mon mal ie luy conte!
Et quoy Clymene auras-tu point de honte
De confeſſer qu'Amour ſoit ton veinqueur
Que tu voulois luy arracher du cœur
Quand l'autre iour par un grand artifice
Tu luy prouuois qu'aymer eſtoit un vice?
Non, ceſt tout un, des parens la pitié
Va ſurmontant amour de la moitié,
Et ſi elle eſt de Francus amoureuſe
Me fera lieu me voyant langoureuſe.

Pauvre abuzée! hé ne ſçais-tu pas bien
Que les parens deſrobent notre bien?
Et que pour eux entier ils le deſirent
Ioyeux au cœur quand les autres ſoupirent?
Ce n'eſt qu'un ſang que ma ſœur & que moy,
Elle prendra pitié de mon eſmoy!

Foy ny pitié ne regnent plus en terre,
Et le parent au parent fait la guerre!

Las! que feray-ie! il vaut mieux la tanter:

Le secours vient en voyant lamenter:

Il ny a Louue aux forests tant soit fiere

Qui ne soit douce aux pleurs d'une priere:

Helas on dit en prouerbe souuent,

Priere & pleurs se perdent comme vent,

Ouy, si lon prie une ame inexorable,

Mais ma sœur est & douce & pitoyable:

Au pis aller ie ne scaurois sentir

En lessayant que honte & repentir.

En la façon quelle estoit habillée

Nuds pieds, sans robe, afreuse, escheuclée,

Delibera contre le mal d'amours

De voir sa sœur & demander secours.

Elle courut comme son pié la porte,

Mais aussy tost quelle fut à la porte,

Se recula, comme le Pelerin

Qui de fortune à trouué par chemin

Vn long serpent tymbrié d'une grand creste

Qui le menasse, & s'enste de la teste,

Et fait mourir les herbes du toucher:

Il se recule & n'en oze aprocher.

Ainsi tourna la Pucelle en arriere:

Desur la langue elle auoit la priere,

La larme à lœil, le soucy sur le front,

Dedans l'esprit vn pensement profond

Et meint sanglot se creuoit en sa bouche,

Quand trop d'amour qui la touche & retouche,

Qui compaignon ses pas alloit suivant
Fit auancer ses iambes en auant
Et de rechef la honte les recule,
L'honneur la gele & le desir la brule.

Trois fois amour la voulut faire entrer,
Honte trois fois ses pieds vint rencontrer,
Trois fois reuint & trois fois s'en retourne:
Son pied douteux qui maintenant seiourne
Maintenant va comme amour le seduit
Porté d'ardeur de rechef la conduit,
Et la vergongne encores la repousse.

Ce Dieu qui bat d'une forte secousse
Son cueur branlé, si bien la deborda
Que dans la chambre à la fin la guida
En gemissant : Comme une fiancée
Qui des long temps à lié sa pensée
Au iouuenceau, qui deuoit l'espouzer
Que la mort fait en terre reposer:
Elle de dueil & d'amour enflamée.
Lamente seule en sa chambre enfermée
Segretement, de peur que ses regrets
Ne soient ouïs des voisins indiscrets
Qui de broquards piqueroient la pauurete,
Elle en esprit son fiengé regrete
D'un pleur muet à bouche close, ainssy
Pleuroit Clymene & cachoit son soucy.

Pour raconter sa douleur qui n'a treue
Ores au bout de sa langue s'esleue

La voix poussée, & aux leures luy pend,
Ores tombée aux pommons redescend
Sans nul effect: car le son qui ne touche
Qu'un peu les dents ne desserroit sa bouche:
Ainsi qu'on voit les fantosmes de nuit
Parler à nous & ne faire aucun bruit.

Or comme Amour en fureur l'importune,
Sans declarer à sa sœur sa fortune
Seule en sa chambre en haste s'en reua,
Où de longs pleurs sa poitrine lava.
A ses soupirs la bride elle destache,
Rompt ses habits, ses cheueux elle arrache
Egratignée, & d'un esprit transsy
Pensoit douteuse & repensoit cecy.

Que doibf-ie faire? hélas en quelle peine
Me tient Amour! ha chetive Clymene,
Tu vis sans vie, & folle tu n'as soing
(Cruelle à toy) de toymesme au besoing.

Las puis qu'Amour ta part ne favorize
Par la fureur conduis ton entreprize:
„ Quand la fortune en se iouant nous pert
„ Pour la raison souuent la fureur sert.

Doibf-ie prier un homme qui peut estre
Ne scait mon mal? si ie le fay paresire
Il trahiroit mon amour sans guerdon.
Il est yssu du Roy laõmedon
Sans foy, pariure, & qui prendroit à gloire
D'auoir, trompeur, d'une femme victoire.

Dois ie me plaindre & ma sœur retenter?
Cela feroit son ardeur augmenter:
Car ie scay bien (Amour m'a fait scauante)
Que Francion est amoureux d'Hyante,
Et que ma sœur ce Troyen ayme mieux
Que ses poumons son foye ny ses yeux,
Ie n'en scay rien, seulement ie m'en doute:
„ L'amant douteux toute parolle escoute.

Dois-ie par fraude & par dol controuuer
Qu'àu fond du cuer ma sœur laisse conuer
Vn feu peu chaste, & le dire à mon frere?
En le disant il me seroit contraire:
Pour vn soupçon ne voudroit vn discord
Contre celuy qui l'a sauué de mort.

Ie souffre trop sans donner connoissance
De mon trauail: La seule patience
„ Est le remede: vn feu souuentefois
„ Meurt de son gré quand il n'a plus de bois:
Pensers & pleurs aprestent la matiere
A mon brazier: Il faut que toute entiere
En liberté ie me redonne à moy:
Vn amoureux sur luy n'a point de loy!
Plus fil à fil ses liens il desferre
Et plus Amour à la chesne l'enferre.

A tous venans dirai-ie mon malheur?
Dire son mal allège la douleur.
Non: ny mon sang, mon honneur, ny ma race
Ne veulent point que fable ie me face,

Et que chacun d'un cœur dissimulant
Flate mon mal, & puis en s'en allant
Me deshonore, & tanssant sa famille
Par mon malheur face sage sa fille.

Doncq que feray-ie? iray-ie en autre part
Comme banye? Amour qui tient le dard
Dedans mon cœur en si profonde playe
Ne permet point qu'autre pays i'essaye:
Puis pour passer meint fleuve & meint rocher
Je ne scaurois de mon flanc arracher
Ce trait qui met la tristesse en mes veines,
Mon cœur en feu, & mes yeux en fontaines:
Pour le meilleur, Clymene, il faut mourir
Et par la mort ton amour secourir.

Comme en son cœur elle pensoit la sorte
De se tuer, ou d'une sangle forte
Pendre son col au bout d'un soliveau,
Ou se iecter à chef baissé sous l'eau,
Et s'estoufer au plus profond des ondes,
Ou s'en aller par les forests profondes,
Par les desers de rochers enfermez
Seruir de proye aux lions affamez:
Vne poison luy sembla la meilleure
Pour destacher son ame tout à l'heure
Loing de son corps, & du corps le soucy.

D'un pesant pas & d'un pesant sourcy
Cruellement de passion outrée
Elle est pleurante au cabinet entrée

Ou tout le bien que plus cher elle auoit,
D'un soing de femme en garde reseruoit:
Sur ses genoux elle mist vne Quesse
Puis mist la clef en la serrure espesse,
La clef tourna, la serrure souurit.

Là, choisissant entre mille, elle prit
Vne poison, qu'on dit que Promethée
A de son sang autrefois enfantée,
Quand le vautour tout herissé de fain
A coups de bec luy dechiroit le sein:

Le sang coula dessus la terre mere:
Le soleil chaut qui toute choze esclaire,
Luy donna force, accroissance, & vigueur:
Elle à de tige vn coude de longueur,
Rouge la fleur, la fucille vn peu noirastre,
Que la Sorciere & la fausse Maraistre
Scauent cueillir de leurs ongles tranchans
Dizant dessus des mots qui sont mechans,
Voire & qui font quand la Lune decline
Hors des enfers retourner Proserpine.

Quand elle vit telle forte poison,
Elle entra toute en longue pamoison,
Rouant les yeux, & horriblant la face,
Et de ses pieds trepigna sur la place:
Vn spasme auoit tous ses nerfs estandus,
Elle cria: ses cris sont entendus
De sa nourrice à qui des son enfance
Elle portoit honneur & reuerence.

Or de fortune elle estoit pres de l'huis.

Clymene auoit raconté ses ennuis
Un iour deuant à la vieille chenuë,
Qui se doutant d'une mesauenuë
Toujours en peur de sa fille uinoit
Et pas à pas soingneuse la suiuoit.

D'un coup de pié la porte elle a poussée,
Puis en voyant la Pucelle pressée
Des traits de mort, d'un parler redouté
Son desespoir en mieux a rebouté
Disant ainsi : ô pucelle bien née
En quel malheur tourne ta destinée
Par ton conseil ? le Destin ne peut rien

„ Sur l'homme auteur de son mal & son bien:
„ Nous sommes seuls maîtres de noz fortunes,
„ Comme il nous plaist el' sont blanches ou brunes,
„ Et le grand Dieu bon pere des humains
„ Le franc arbitre a mis entre noz mains,
„ Sans nous lier aux estoilles celestes
„ Dont les vertus ne nous sont manifestes,
„ Ny au destin qui ne peut nous borner:
„ Bien que le ciel il face retourner,
„ Et les faisons en leur temps il rameine,
„ Il ne peut rien sur la prudence humaine
„ Sinon d'autant qu'elle luy donne lieu:
„ Nostre vouloir en nous est nostre Dieu:

Je ne dy pas que le sort n'ait puissance
Sur tout cela qui prend icy naissance,

T

Mais on le peut corriger par conseil,
Et à la playe apozer l'apareil:
Chacun y sert à soy mesme de guide.

Amour ressemble au scorpion homicide
Qui blesse l'homme, à la playe qu'il faict
Luy mesmes est le remede parfait:

Doncq ne crain point ton malheur faire entendre
A ce Troyen, qui ton cueur met en cendre,
Il est trop beau pour n'estre point espris,
Il est nepueu de l'amoureux Pâris
Iuge courtois, qui vuidant la querelle,
Donna la pomme à Venus la plus belle:
Tous ses ayeux grands princes genereux
Furent iadis des beautés amoureux,
Troé, Dardan, l'eschançon Ganymede.

Contre l'amour on trouue assez remede
Quand la raison se veut euertuer,
Et non ainsi laschement se tuer:
Bagues, ioyaux & maisons bien ouurtes
Auecq argent sont toujours recourées
Quand on les perd: rien n'est icy perdu
Qui ne puisse estre à son maistré rendu:
„ Mais par argent ne s'achepte la vie
„ Quand une fois du corps elle est rauie,
„ C'est un thresor qui n'a point de pareil.
„ Garde donc bien les rayons du soleil:

„ Si tu pensois quand la tombe nous serre
„ Qu'on cultiuast les vignes souz la terre,
„ Qu'on labourast les champs, que les saisons
„ De leurs presens remplissent les maisons,
„ Tu es trompée : une nuit eternelle
Regne par tout & tout enferme en elle.

Le Ieu, l'Amour ne viuent plus là bas,
Cen'est qu'horreur, que tombeaux, que trespas,
Faute de iour, frayeurs silences sombres,
Et vains Esprits qui ne volent qu'en ombres:
Tu es Clymene encore en ton printemps,
Tu n'as d'amour senty les passetemps
Ny les plaisirs du chaste mariage:
Garde toy donc pour un meilleur usage.
Tente Francus & fay luy par escrit
Scauoir le mal qui ronge ton Esprit.

De tels propos sa fille elle admoneste:
Pronte au conseil la pucelle fut prestee:
Trois fois la plume elle prist en ses dois
Et de la main luy tomba par trois fois:
Mais à la fin son mal tellement ose
Qu'en la forceant ceste lettre compose,
Ainsi voulut le dessus ordonner.

Salut à toy qui me le peux donner.
L'auugle Archer m'a tellement blessée
De ton amour le cueur & la pensée,

*Que ie mourray si guarir tu ne veux
D'un pront secours le mal dont ie me deulx.*

*Amour m'a fait en ce papier i'escrive
Ce que l'honneur me defendoit de dire,
Et i'ay ma bouche, ouuerte mille fois,
Mais la vergongne à retenu ma vois.*

*A cét escrit vueilles doncques permettre
Ta blanche main: l'ennemy list la lettre
De l'ennemy, la mienne vient d'aymer
Qui de pitié te deuroit enflamer.
Si tu i'enquiers en quoy le temps ie passe,
Songer refuser repenser en ta grace,
Et me perdant i'engager mon desir,
Est seulement le tout de mon plaisir.*

*Soit que le iour de l'orient retourne,
Soit qu'à midy dessus nous il seiourne,
Soit que la mer le reçoie à coucher
Ie pense en toy: Et si n'ay rien plus cher
Que de me paistre en ta vaine figure.
Ainsi pour toy cent passions i'endure
Et sans pouuoir ny veiller ny dormir
Seule en mon liét ie ne fais que gemir.*

*Que ne me fit Diane la pucelle
Mourir le iour d'une fleche cruelle
Que ie te vy: le temps vescu depuis
N'est qu'une mort viuue de mes ennuis:
Comment viuroy-ie? ah! mon ame affolée
Laisant mon corps en la tienne est volée:*

*Je suis perdue & ne me puis trouuer:
Iay beau les sorts des sorciers esprouuer,
Rien ne me sert ny herbe ny racine,
Tu es mon mal, tu es ma medecine,
Tu es mon tout, & de toy seul ie pends,
Ie meurs pour toy & si ne m'en repens.*

*Aye pitié d'une fille amoureuse:
Des voluptez cest la plus doucereuse
Que de cueillir une premiere fleur,
Non un bouton qui n'a plus de couleur.*

*Tu me diras que ie suis indiscrete
Comme nourrie en ceste Isle de Crete
Où Iupiter de tant d'amours espris
Le premier laiët de sa nourrice a pris,
Et que ie suis d'Ariadne parente
Fille à Minos, qui d'amour violente
Oza son pere & son país changer
Pour un Thezée, un pariure estrange.
Certes ce n'est ma terre ny ma race
Qui me contraint, cest seulement ta face,
Et ta ieunesse & ton œil nonpareil.*

*Malheureux est qui ne voit le soleil
Quand il esclaire, & son œil tourne arriere
Pour ne iouir d'une telle lumiere:
Oste ton front, oste moy tes beaux yeux,
Oste ta taille egalle aux demi-Dieux,
Ton entretien, ton maintien, ta parole,
Et qui plus est ta vertu qui m'affolle,*

Tu esteindras de mon cuer le flambeau:
Mais te voyant si vertueux & beau,
Ie t'aimeray d'ardeur insatiable,
Et si ie faux tu en es punissable:

Ie ne crains point comme les dames font
De m'appeller femme d'un vagabond
Pauvre fuitif qui n'a maison ny troye:
Il ne m'en chaut, las! pourueu que ie soye
A ton seruice, & tu daignes m'aymer:
Soit qu'il te plaise espouze me nommer,
Soit ton esclau, & deusse-ie amusee
Tourner ton fil autour d'une fusée.

Labours presens & futurs ie reçoys
Pourueu, Troyen, que ie puisse estre à toy:
Ie ne craindray tes perilleux voyages,
Terres, ny mers, tempestes ny orages,
Ou si iay peur, j'auray peur seulement
De toy mon tout, & non de mon tourment:
Si ie peris, au moins en ta presence
Ie periray: ou ta cruelle absence
(Si tu ne veux pour tienne m'aquerir)
Cent fois le iour me tu'ra sans mourir.

De tel vers fut son epistre acheuée,
Puis la scella d'une Agathe engrautee:
La mit au sein de la nourrisse: & lors
Vne sueur ruissela de son corps,
Auec la lestre encor luy bailla l'ame
Pour luy porter, & my-morte se pasme.

Tandis Cybele auoit changé de peau
Et transformé son vieil corps en un beau
Prenant la face, & la voix, & la taille
De Turnien (qui depuis la muraille
Bastit de Tours, & la ville fonda)
Lors de tels mots Francion aborda.

Iusques à quant, fils d'Hector, sans rien faire,
Nous tiendras-tu sur ce bord solitaire,
Acagnardés en paresseux seiour,
A boire, à rive, à demener l'amour?
A perdre en vain noz iours par les bocages
Suiuant les cerfs & les bestes sauvages?
Que ne fais-tu sans le temps consommer,
Ce que t'a dit la Nymphé de la mer?
Courtize Hyante, afin qu'elle te face
Voir tous les Rois qui viendront de ta race:
Puis donne voile, & sans plus s'allecher,
Va t'en ailleurs ta fortune chercher.
Ce Turnien auoit la face belle,
Les yeux, le front, compagnon tresfidelle
De Francion que seul il escoutoit,
Et ses segrets sans autres luy contoit.

Il estoit fils de la nymphe Aristine,
Qu'Hector auoit sous sa masle poitrine
Pressée au bord du fleuve Simois:
Ses chers parens en furent resiouïs
Enorguillis de voir leur fille pleine
Du fruit yssu d'un si grand capitaine.

Elle accoucha dessus le bord herbeux
Du fleuve mesme en regardant ses bœufs
Qui bien cornus païssoient par le riuage:
D'un prince tel il auoit son lignage.

Ceste Déesse en s'enuolant de là
Bien loing du peuple à l'escart s'en alla
Voir la maison toute rance & moysie
Où croupissoit la vieille Ialousie.

C'estoit vn antre à l'entour tapissé
D'un gros halier d'espines herissé.
Le clair ruisseau ny la viue fontaine
Ny gazouilloient luitants contre l'arene:
Mais d'un marest vne vapeur sortoit
Qui parmy l'air puante se portoit.
Iamais clarté n'y flamboit alumée,
Et toutefois ce n'estoit que fumée:
Elle estoit lousche & auoit le regard
Parlant à vous tourné d'une autre part.

De fiel estoit sa poitrine empoulée,
Son col plombé, sa dent toute rouillée,
De froid venin sa langue noircissoit,
Comme saffran son teint se iaunissoit,
Bouffie, enflée, inconstante, & farouche,
A qui le ris ne pendoit à la bouche.

Iamais ses yeux ne prenoient le sommeil
Soit au coucher ou leuer du soleil,
Veillant sans fin, touiours pensive & bleśme,
Et se rongeoit de sa lime elle mesme

Se tourmentant de travail & d'ennuy
Quand le bonheur fauorisoit autrui.

Deuant sa porte estoit Melancholie
Froide deesse, & la chaude Folie,
Le Desespoir, la Rage, & le Trespas:
Elle prenoit à terre ses repas
De serpens tous herissez d'escailles,
Nourrissement de ses noires entrailles:
D'un mauuais œil Cybele regarda,
Lors la Deesse ainsi luy commanda.

Vieille debout : marche en Crete, & te haste:
Pren tes serpens, & de Clymene gaste
Par ta poison les veines & le cœur:
Dans l'estomac iette luy la rancœur,
Le desespoir, la fureur, & la rage
Mesle son sang & trouble son courage.
Tu le peux faire, & ie veux qu'il soit fait.
A tant s'enuole & laisse l'autre infait.

Quand l'alouzie eut la parole onye
De la Deesse, elle en fut resiouye:
Puis en frizant de serpens ses cheueux,
Et sapuyant d'un baston espineux
Alla trouuer en Crete la pucelle
Que le sommeil couuoit deffous son aile,
Et dont le cuer qui de dueil se fendoit
Entre-dormant nouuelles attendoit.

Incontinent ceste vieille maline
De la pucelle assiegea la poitrine,

D'un froid venin ses leüres elle enfla,
 Et la poison haletant luy soufla
 Aux yeux au cueur: & en lame renuerse
 Vn long serpent qui en glissant luy perse
 Faye & poumons: & puis en denouant
 Ses cheueux torts, elle alla secouant
 Mille lesars au sein de la pauurete
 Qui la suçoient d'une langue segrette,
 Et coup sur coup les membres luy mordoient,
 Et dans ses os le venin respandoient:
 Comme cecy sacheuoit: la nourrice
 Espiant l'heure & la saison propice
 A Francion la lettre presenta,
 Et de parolle en vain le retanta.

Francus la prit & apres l'auoir leüe
 De honte espris besse en terre la veüe,
 Il trembla tout: une froide sueur
 Laua son corps: vn batement de cueur
 Fit esbranler sa poitrine estonnée,
 Puis de tels mots responce il à donnée.

Vieille deloge, ou par le fer tranchant
 Ie puniray vn acte si mechant,
 Ou ie feray chastier par le pere
 Vn fait si plain d'horrible vitupere.

Ie ne suis pas en cette isle venu
 Pour tromper ceux à qui ie suis tenu:
 Le beau Pâris pour Helene rauie
 De mille nauys vit sa faute suiuiue,

Tuer son pere, Ilion ambrazer,
Et iusqu'au fond Jes murailles razer.
Ie crain des Dieux la vengeance homicide,
Et Iupiter hostelier, qui preside
Au cueur d'un roy qui benin veut loger
Sans le connoistre un fuitif estranger.
Si l'hoste faut, d'une tempeste haute
Ou d'un orage il sent punir sa faute:
Touiuors du mal le payement est contant.

Or si i'estois de nature inconstant
Pront au plaisir où Venus nous apelle
I'aimerois mieux sa sœur Hyante qu'elle,
„ Elle est modeste, & plus que la beauté
„ L'homme en la femme aime l'honnesteté.

Il dit ainsi : une froide gelée
S'est par les os de la vieille escoulée
Tremblant de peur : à la fin elle va
D'un pié si prompt que Clymene trouua
Encore au liét du sommeil assommée:

Reueille toy ma fille mieux aimée,
Ce beau Troyen d'un autre amour piqué
Et de ta lettre & de toy s'est moqué.

Toute en sursaut oyant telle parolle
Se reueilla : son esprit qui s'en volle
Vers l'estranger emporté du penser
Luy fit ainsi ses plaintes commencer.

Doncques ma lettre à seruy de risée!
Ha pauvre moy ! i'estois mal auisée

Folle d'amour ! d'enuoyer vn escrit
A ce bany sans cueur & sans esprit
Qui n'a sceu prendre aux cheueux la fortune !
Cest vn niais que la mer importune
Comme il merite, & qui sottement pert
Le bien qu'amour luy a de grace offert,
Nozant cueillir pour crainte de l'espine
Le beau bouton de la rose pourprine.

Puis il se vante, O le braue empereur !
Que de la gaulle il sera conquerueur
Qui n'a sceu veindre vne fille veincue !
I'ay de sa honte & l'ame toute esmeue
Et tout le cueur : il n'est du sang des preux,
Mais d'un pasteur ou d'un piqueur de beufs.

Son front, ses yeux, son parler, & sa grace
Son port royal qui les autres surpasse,
Sont ô Venus indignes de son corps,
Laid par dedans & beau par le dehors :

Ame couarde en vn beau corps logée,
Que ciel que terre & que la mer agée
Vont bourrelant : Car vraisemblable il est
Que ta simpleesse à Iupiter desplait.

Du beau Paris, dont tu mens ta lignée,
La beauté fut d'amour acompagnée :
Helene à luy de bon cueur se rendit
Et par combats dix ans la deffendit
Plein de sueur de guerres & de peines,
Cueur genereux, qui valoit cent Heleines.

Mais tu ne vaux, ieune escumeur de mer
Que pour courir & non pour bien aymer:

Puisse arriuer que ma sœur soit trompée,
Et sans espoir en ses larmes trappée
Soit delaissée au front de quelque bord
Et qu'elle pleure aux vagues sans confort.

Quand ce bany par honnestes cautelle
Aura tiré le plaisir qu'il veut d'elle,
D'un cueur pariure oubliera sa beauté
Car l'œil fenestre en vain ne m'est fausé.

Si le Destin les gaules luy ordonne
Qu'en ma faueur cent guerres il luy donne
Ains que bastir les rempars de Paris,
Voye à ses yeux ses alliez peris,
Qu'il soit chassé, & que de terre en terre
En supliant secours il aille querre:
Puis par les siens surpris en trahison
Soit membre à membre occis en sa maison.

Disant ainsi: de son chef elle arrache
Vn gros touffeau de cheueux qu'elle attache
Contre son liét signe de chasteté,
Et que son corps n'auoit encor esté
Honny d'amour: puis sa chambre elle baize.
A Dieu maison: que j'estois à mon aize
Ains que ce traître & fuitif inconnu
A nostre bord, naufrage fust venu.

Incontinent la fureur & la rage
De ialousie emplirent son courage,

Et tellement la douleur la ferut
Que par les champs hurlante elle courut.

C'estoit le iour que les folles Euantes
Criant Bacchus seules alloient erantes
(Ayant les corps enuironnez de peaux)
Par les forests, aux festes des coupeaux,
Par les desers, par les taillis sauuages,
Et sur le bord des sablonneux riuages:
L'air respondoit sous le bruit enrouë
D'Euan, d'Iach, de Bassar, d'Euor:
Ce puissant Dieu qui blesse les penstes
De trop de vin, les auoit insensées:
En ses liens captiues les auoit,
Et la fureur de raison leur seruoit.

Ceste pucelle à qui l'erreur commande
S'alla ietter au milieu de la bande
Escheuelée, & d'un bras forcené
Branloit un dard de pampre enuironné.
Qui la premiere (en me suiuant) dit elle,
De ce sanglier respandra la ceruelle,
Et d'un espieu la premiere en son flanc
Fera la playe? & syüra de son sang?
Marchon, conron, suiüon comme tempeste
Les pas fourchus de ceste noire beste
Monstre hydeux, qui s'enfuit deuant nous,
Armon noz mains & l'assommon de coups.

Son faux Démon auoit pour couuerture
Pris d'un sanglier la menteuse nature

Et figurant Francus de bord en bord
De bois en bois l'amenoit à la mort.

Loing du troupeau s'eslança la premiere
Branlant au poing une fourche guerriere:
Luy vagabond sans qu'on le peust toucher
Gagna courant le feste d'un rocher,
Qui sous ses pieds tenoit la mer suieüe:

Là ce Damon à corps perdu se iecte
Dedans le goufre: elle qui s'auancea
Pour le tuer comme luy s'eslança:
La mer en bruit: trois fois sous l'eau profonde
Son corps alla, trois fois reuint sur l'onde,
Trois fois le flot la reuint abyssmer.

Elle mouroit sans les Dieux de la mer
Qui souleuant la ialousie tombée
Luy ont du corps la parque desrobée,
Et luy perdant sa figure & son nom
L'ont enrollée à la troupe d'Inon,
Et du vieil Glauque à la double naissance.

Dessus la mer luy ont donné puissance
Faire boufer les vages & le vent
Miere Deïsse, & qui a bien souuent
Contre Francus poussé sa frenesie
Fardant sous l'onde encor sa ialousie.

La passion cause de noz trespass
Quand le corps meurt en l'esprit ne meurt pas

*Le remors vit, & du mort l'alegeance
Par ombre ou songe est de prendre vengeance.
Il hait l'aucteur de son malheur passé,
Et l'offenseur est toujours offensé.*

FIN DV TROISIEME LIVRE

DE LA FRANCIADE.



LE

QVATRIEME LIVRE DE LA FRANCIADE.



*V*AND la nouvelle au
Pere fut venuë,
D'ardeur & d'ire une bouil-
lante nuë
Pressa son cuer qui menu
sanglotoit:
De coups plombez l'estomac
se batoit
Pensant songeant & di-
scourant la sorte

Comme sa fille en la mer estoit morte:
Il soupiroit, & d'un boubier fangeux
Deshonoroit sa barbe & ses cheueux.
Prise de dueil sa raison se foruoye:
Son fils Orée aux oracles enuoye

Auquel (cherchant d'un cuer deuotieux
Trois iours entiers la volonté des Dieux
Par meinte offrande en viſtine inmolée)
Telle voix fut du Trepie reuelée.
Si le Roy veut ſe ſoulager d'ennuy
, Ne loge plus d'arondelles chez luy.
Telle parolle en doute reſponduë
Fut aiſement de ce prince entenduë.

Ceſt qu'il deuoit par prudente raiſon
Les eſtrangers chaffer de ſa maiſon,
Hommes ſans foy, pariures, & ſans ame,
Et du treſpas de ſa fille les blaſme.

En nul païs la foy n'a plus de lieu
Diſoit ce prince, & lupin le grand dieu
N'a plus de ſoing de l'humaine malice
Et le peché ne craint plus la iuſtice.

Ceſt eſtranger pauvre chetif & nu
Vn viſ naufrage à ma riue venu,
Couuert d'eſcume & de bourbe & de ſable,
Ah! que i'ay fait compagnon de ma table,
Que i'ay voulu pour mon gendre choiſir
Et luy quiter ma terre à ſon plaifir,
Moque mon ſceptre? & maſqué de ſeintife
Ma vieille barbe & mes cheueux meſpriſe,
Et ſoubs couleur d'un deſlin ne veut point
Par foy promiſe aux femmes eſtre ioint,
Second Pâris, Pirate qui conſomme
Ses ans ſur l'eau: Toutefois ce preudhomme

*Fin artisan de cauteleux moyens
Comme heritier du malheur des troyens
En toute terre à l'impourueu se ruë,
Seduit des rois les filles & les tuë:
Puis en faisant ses galeres ramer
Baille le meurdre aux vagues de la mer,
Met voile au vent : le vent qui luy ressemble
Pousse sa voile & sa foy tout ensemble:
Et tu le vois, lupin aux rouges bras,
Tu le vois bien, & ne le punis pas!*

*Or' pour souler par vengeance mon ire,
Je le veux pendre au mast de son nauire
Couuert de soufre & de salpestre ardent,
Afin qu'en l'air il se voye en pendant
Vestu de flame, & sente consommée
Sa triste vie éteinte de fumée:
Ou bien du corps ses boyaux arracher
Et membre à membre en morceaux les trancher:
Puis les icter sans droit de sepulture
Parmy les champs, des mâins la pasture.*

*Que dis-ie? ou suis-ie? en quelle folle erreur
Perdant raison me pousse la fureur?
„ Il ne faut pas qu'un prince debonnaire
„ Du premier coup s'enflame de colere:
„ Il ne doit croire aux flateurs de leger,
„ Le commun bruit est toujours mensonger.
„ Il doit attendre & sagement connoistre
„ La verité que le temps fait paroistre:*

„ l'atandray doncq : un royne doit sentir
„ D'un faux courroux un iuste repentir.
Tandis Francus qui la saison espie
Aborde Hyante, & de tels mots la prie.

Vierge sans per, dont la grace & les yeux
Pouroient tenter les hommes & les dieux,
Qui sous tes pieds presses serue ma teste,
Qui de mon cueur remportes pour conqueste
L'orgueil premier, qui n'auoit point eslé
D'un autre amour que du tien surmonté.

Si la pitié si l'humble courtoisie
Peut des humains gangner la fantaisie
Soit de mes pleurs ton courage adoucy,
Garis ma playe & me prens à mercy.

Qu'and ie touché ton isle de ma dextre,
Ie ne vins pas, ô deslin, afin d'estre
Comme ie suis, miserable amoureux,
Ains pour chasser le peril dangereux
Qui menassoit ma teste du naufrage:
Mourir deuoi-ie au plus fort de l'orage
Puisque sur terre, amour m'est plus amer
Que la tempeste au milieu de la mer?

Contre l'amour inuincible aduersaire
I'ay resisté, mais en vain, car l'ulcere
S'en-aigrissoit plus ie voulois celer
Le mal qu'il faut par force reueler,
„ L'homme seroit heureux en toute chose
„ S'il ne cachoit au fond de l'ame enclosé

„ La passion que nous engendre Amour
 „ Qui de la vie embrunist le beau iour,
 „ Et verse au cueur par mauuaise coutume
 „ Bien peu de miel & beaucoup d'amertume
 Et toute fois la raison & les yeux
 Nous font aymer ! s'il est ainsi, ô Dieux
 Que l'amour soit aux veines espanuë
 Par la raison, vous l'auex cher venduë.

Heureux trois fois, voire quatre un rocher
 Qui sans tendons, sans muscles & sans chair
 Vit insensible, & qui n'a l'ame atteinte
 D'amour de haine, ou de soing ou de crainte:
 Je voudrois estre en quelque riue ainsi!
 Je viurois dur sans peine & sans soucy,
 Ou maintenant par trop de connoissance
 Je sens mon mal, & si ie n'ay puissance
 De deliurer mon esprit astigé
 Que tes beaux yeux retiennent engagé.

Il dist ainsi : meinte larme roulée
 Onde sur onde en son sein est coulée:
 Hyante alors soupirant d'autre part
 Contre-respond : Troyen il est trop tard
 Pour deuïser, & la nuit sommeilleuse
 De noz propos est ce semble enuieuse,
 Chacun nous voit & iette l'œil sur nous:
 „ Du fait d'autruy le vulgaire est ialoux:
 Allon dormir, la nuit nous le conseille,
 Si le matin des l'Aurore vermeille

Te plait venir au bocage sacré
Où mes ayeux au beau milieu d'un pré
Ont fait bastir d'Hecate le grand temple,
Plus priuément en imitant l'exemple
Des amoureux, tu me diras ton soing
Et i'en prendray la Déesse à tesmoing.

Ainsi disant, main en main se presserent
Et tous honteux à regret se laisserent
Mais le soucy ne laissa sans gemir
Les deux Amans toute la nuit dormir.

Quand le Soleil perruqué de lumiere
Eut de Thetis sa vieille nourrisiere
En se leuant abandonné les eaux,
Et fait grimper contre-mont ses cheuaux,
Et que l'Aurore à la main safranée
Eut annoncé la clarté retournée,
Le soing d'amour qui poingnant trauailla
La belle Hyante, au matin l'esueilla,
Et pour aller au lieu de la promesse
Se reuestit d'un habit de princesse:

En cent façons son chef elle peigna,
D'eau de senteurs son visage bagna,
Prist un collet ouuert à rare voye
Entre brodé de fils d'or & de soye,
Rare subtil à long plis bien tissus:

Puis un beau Guimple afulla par dessus
Prime, dougé, fillé de main scauante
Qui la couuroit du chef iusqu'à la plante,

A chaque oreille un ruby luy pendoit:
Vn diamant en table descendoit
De sur son front, dont la viue étincelle
Tenoit sa grace & sa face plus belle.

Son col d'ivoire honora d'un carquan
Fait en serpent, ouvrage de vulcan:
D'or & d'email merueille elaborée!
Qu'il fit iadis pour la déesse Rhée
Et Rhée à Nede en present le bailla
De ce serpent tout le dos escailla
D'aspres replis : si bien que la facture
De l'artisan surmontoit la nature
De Nede apres un Corybante leut,
Puis à Dicé en partage il escheut,
Qui pour garder tel bien à sa famille
L'auoit donné dès long temps à sa fille.

Hyante adonq fit son Coche ateler:
Tous les chemins faisoit étinceler
Soubs ses ioyaux: & lors douze pucelles
Qu'on luy choisit en beauté les plus belles
Qui dès enfance au logis la suiuioint,
Et de son corps songneuse garde auoient,
D'un pié leger dedans l'estable allerent,
Hastent leurs mains, & le Coche atelerent.

A chaque rouë ils entent le moyeu,
Douze rayons font passer au milieu,
Iusqu'à la gente, & autour de la gente
Mettent d'airain vne bande pesante,

La garde-rouë, où des cloux argentex
A grosse teste en ordre estoient plantex.
Au limon d'or couple à couple ils attachent
Quatre iumens souple-iarrets, qui marchent
D'un pas venteux, & font deffous leurs pieds
Voler menu les sablons deliez.

Elle en son Char monte seule & se guide,
Vne main tient le foët, l'autre la bride.
Chassant toujours ses iumens en auant
Qui de leur gré voloient plus tost que vent.
Aux deux costez des rouës bien tournantes
Tenant le Coche, estoient quatre Seruantes
Qui leur vasquine au genou retrouffoient,
Et de courrir apres ne se lassoient.

Quand les iumens au temple l'ont renduë,
Soudain à bas du char est descenduë,
Osta leur bride : elles non guiere loing
En hanissant vont paistre le saint-foin,
Le thin, le trefle: & de manger fachées
Se sont sur l'herbe au frais de l'eau couchées.

Le temple estoit d'un taillis couronné,
Et le taillis de prets enuironné,
Où l'amoureuse apres le sacrifice
Qu'elle deuoit, controuue vne malice,
Ce fut s'asseoir, & faire d'un grand tour
Comme elle asseoir ses filles à l'entour.

Il n'est pas temps, cher troupeau, que i'honori
De retourner à la maison encore,

Sur l'herbe tendre il vaut mieux seiourner,
Au frais du iour nous pourrons retourner,
Chanton, danson, que chacune commence,
Et la premiere à l'ouurage s'auance.

Mais ny les fleurs ny autres passetemps
Ne luy plaisoient: ses beaux yeux inconstans
Touiuors au guet s'escartoient en arriere
Sur les chemins, pour voir si la poussiere
Desous Francus s'iroit point esleuant;
A chaque bruit, à chaque flair de vent
Elle trambloit, & sans estre assurée
D'yeux & d'esprit erroit toute esgarée.

De bon matin Francus qui s'esueilla,
De ses habits en Troyen s'habilla:
Prist son Turban enflé d'espaisses bandes,
De son habit les manches estoient grandes,
Et cét habit aux talons descendoit,
Sa Cimeterre au fourreau luy pendoit
D'une ceinture à la boucle esmaillée,
Qu'Hector auoit à son frere baillée
Par amitié, car sur tous il l'aimoit
Et sa vaillance & son art eslimoit.

Or' Helenin qui auoit par grand cure
Nourry Francus, luy donna la ceinture
Quand il partit se souuenant d'Hector:
A la ceinture il aioingnit encor
Vn beau poignart à houpes bien perlées
Qu'en se iouant Helene auoit filées.

*Iamais enfant, iamais neveu des Dieux
N'eut le maintien, la bouche, ny les yeux
Si beaux qu'auoit Francus cette iournée:
Telle beauté du ciel luy fut donnée,
Les yeux pour plaire, & la voix pour scauoir
En deuissant sa maitresse esmouuoir.*

*A son costé menoit pour compagnie
Le vieil Amblois dont l'ame estoit garnie
De prophetie, & outre il auoit soing
De conseiller ses amis au besoing.*

*Pres le chemin au milieu de la plaine
Vn orme estoit dont la cyme estoit pleine
De meinte branche, où les Oyseaux au soir
Prenoient leur perche, & se souloient assoir.
Là de fortune importun aux oreilles
Ia soit sous l'ombre un troupeau de corneilles.
L'une se hausse, & comme en se ioüant
Coup dessus coup ses esles secoüant,
Et herissant le noir de son plumage
En voix humaine eschangea son langage.*

*Ah! où vas-tu vieil Prophete insensé
Qui par ton art en l'esprit n'as pensé
Bien que tu sois prudent en toute chose
Que la pucelle aura la bouche close,
Despite au cueur reuesche & rechigné,
Si elle voit l'amant accompagné:
Maudit deuin, tourne le pas arriere,
Laisse le seul user de sa priere,*

Et leur deuis, compagnon, ne deffens:
 Tu ne sçais pas cela que les enfans
 N'ignorent point & va, iamaïs Cytherée
 De sa faueur n'a ton ame inspirée:
 Le vieil Amblois qui telle voix ouït
 Dedans le cueur soudain s'en resioiit,
 Et connut bien la corneille esuantée
 Auoir d'un Dieu la parolle empruntée,
 Pource en tournant sur le trac de ses pas
 Dist à Francus: Prince amoureux tu n'as
 Besoing de guidé: un Dieu qui te suporte
 En lieu de moy te sert d'heureuse escorte:
 De tes souhaits ton cueur sera content,
 Sans nul refus la pucelle l'atend
 Obeissante, & preste à te complaire,
 Par doux propos commence ton affaire:
 „ Sois doux en tout: le desdain genereux
 „ D'une fille aime un courtois amoureux.
 Francus luisant de beautés & de grace
 Luy aparut d'une coline basse
 Beau comme Amour: les rayons de ses yeux
 Etoient pareils à cet astre des cieux
 Qui bien nourry de l'humeur marinier
 Iette de nuit vne espesse lumiere,
 Et de rayons redoutables & crains
 Verse la soif & la sieure aux humains
 Et de son front efface chaque estoille.
 Elle qui tint dessus la face un voile

Par le trauers du cresspe l'aperceur:
Adonc vn trait en l'ame elle receut,
Son cuer luy bat au fond de la poitrine
Ses pieds tenus comme d'une racine
Ne remuoient ny decà ny delà.

Dessus sa iouë une rougeur alla
Chaude de honte: une froide gelée
Sur ses genous lentement est coulée,
Et ne scay quelle ombrageuse obscurté
De ses beaux yeux offusqua la clarté,
Et tout le corps comme fucille luy tramble:

Ils sont long temps sans deuiser ensemble
Tous deux muets, l'un deuant l'autre assis:
Ainsi qu'on voit deux Pins qui vis à vis
D'un beau ruisseau sont plantez au riuage
Ne remuer ny cyme ny fueillage
Cois & sans bruit en atendant le vent.

Mais quand il soufle & les pousse en auant,
L'un pres de l'autre en murmurant se iettent
Cyme sur cyme & ensemble caquettent:
Ainsi deuoient babiller à leur tour
Les deux amans deffous le vent d'amour.

Francus venu, la compagnie atainte
De honte & peur, se recula de crainte,
Et se cachant sous le boucage ombreux
Sans nul tesmoing les laisserent tous deux.

L'amant vit bien dès la premiere orillade
Que l'amoureuse au cuer estoit malade:

Que son esprit cherchoit de senuoler:
Pource il la flate & commence à parler.

Chasse la crainte & la rougeur qui monte
Dessus ton front, tu ne doibs auoir honte
De parler seule à moy seul estranger,
Le ne vien pas, vierge, pour t'outrager,
Mais pour t'aymer: & mon humble courage
Ne semble point à ceux du premier age
Fiers estrangers, Hercules & Iason
Qui rauissoient les filles de maison,
Telle insolence au cuer n'est point entrée
D'un qui n'a lieu ny terre, ny contrée,
A qui le ciel sa clarté vaniant.

Je suis hélas! estranger, & priant
Le grand Iupin à telles gens preside
Et sous sa main les conserue & les guide,
Pere commun les deffend contre tous:
Pource mon tout i'embrasse tes genous
Imitant Dieu sois vierge secourable
A moy fuitif priant & miserable.

Iadis Ariadne en ce pais icy
Prise d'amour prist Thesee à mercy.
Victorieux sans danger le renuoye
Par un filet qui conduisoit sa voye,
„ Vn gentil cuer ayde touiours autruy.

Pour tel bienfait elle encore aujourduy
Reluit au ciel, & ses yeux manifestes
Roulent de nuit par les voutes caelestes.

Je ne requiers richesses ny thresors,
Ny grand empire enflé de larges bors:
Je veux sans plus que ta bonté me face
Voir ces grans Rois qui naïstront de ma race,
Et par sur tous vn CHARLES DE VALOIS
Qui tout le monde enuoirà soubz ses loix.

Pour vn tel Roy toute peine m'est douce,
Le vent m'est doux : la mer qui se courrouce,
Foudres, esclairs ne m'offenssent, portueu
Que de moy naisse vn si puissant neueu,
Montre le moy : tu en as la puissance,
Le bas enfer te rend obeïssance
Tant ton scauoir est diuin & parfait,
Hecate en vain prestresse ne te fait
Garder son temple & commet ses mysteres:
Herbes & fleurs, & plantes solitaires
Craignent ta main : les murmurantes voix
Les poinets couplez, les mots redis trois fois
Te font seruice, & la fureur deuine
Du delien eschaufe ta poitrine:
Prophete ensemble & ensemble qui peux
Tirer d'enfer les esprits quand tu veux.

Je batiray pour telle recompense
Meins temple fait de royalle despenſe
En ton honneur, & si ie puis iamais
Aborder Seine, icy ie te promets
Par ton Hecate & par ses triples testes,
Que tous les ans en solennelles festes

A iours certains ie te feray des ieux,
Où sur la lyre à iamais noz neuueux
Par vers chantez diront ta renommée,
Et si il te plaist espouse estre nommée
D'un fugitif, ie te donne la foy
De n'espouser autre femme que toy.
Tu me diras, douteuse d'esperance
Qu'un estranger erre sans assurance,
Et que la voile au premier vent qui vient
L'emporte ensemble & sa foy qui ne tient
Ny iurement ny conuenance aucune,
Et que tout fuit au vouloir de Neptune:
Ie le scay bien, mais las ! ie ne suis tel:
Tesmoing en soit le soleil immortel
Qui de ses yeux toute chose regarde
Si mon serment enuers toy ie ne garde.
Iamais son iour ne me soit departy
Et vis puisse- ie en terre estre englouty.
Tu me diras, comme princesse fiere,
Que ie ne puis assigner ton douere
Que sur la mer, mes erreurs & le vent,
Sur un deslin qui me va deceuant,
Qui me promet, & iamais ne me baille
Qu'un long soucy qui toujours me trauaille.
Ie le scay bien : mais cest beaucoup encor
De te donner pour ton beau pere Hector,
Paris pour oncle, & Priam pour grand pere,
Qui peut iadis, quand fortune prospere

Le careffoit, l'orient surmonter:
Entre les tiens cest beaucoup de conter
Teucre, Assarac, & l'ancienne race
Du viel Dardan qui au ciel a sa place.
Ie te suply par ta ieune beauté,
Par ton beau port qui sent sa royauté,
Par ton Orée, & par la vieille testle
Du pere tien accordes ma requeste.

Tu le feras, ie le iuge à tes yeux
Qui sont si beaux, si doux & gracieux:
Puis une dame en vertus admirable
Comme tu-es, vit toujours pitoyable.

Ainsi disoit Francus en la louant:
D'aïse flaté son cueur s'aloit iouant,
„ Folle d'esprit: toute femme douée
„ De grand beauté desire estre louée.

Comme un printemps Francus luy paroissoit,
Mais rien au cueur si fort ne la pressoit
Que le saint nom du promis mariage,
S'en souuenant elle ardoit d'auantage,
Et consommoit sa vigueur peu à peu
Comme la cire à la chaleur du feu.

Elle vouloit tant le plaisir l'affolle
Tout à la fois desgorger sa parolle,
Et ne pouuoit sa langue desmesler
Tant tout d'un coup elle vouloit parler,
Aucunefois comme un homme qui erre
D'esprit troublé, deuant ses pieds à terre

Fichoit les yeux demiclos & honteux,
 Aucunefois de larmettes moiteux
 Les rehaussoit rabaissoit tout ensemble,
 Et d'un soub-riis qui de douceur ressemble
 Au plus doux miel, porté par le sourcy,
 Sans dire mot tesmoignoit son soucy,
 Mais à la fin en telle peine extrefme
 Honte la fit consulter en soy mesme.

Vn mal au mien ne se trouue pareil,
 En mon malheur i'ay perdu le conseil:
 Vn nouveau feu par force me consume,
 „ Rien n'est si fort que la douleur qu'on nomme
 „ Le mal d'aymer : Je me trauaille en vain
 Et si ne puis l'arracher de mon sein.

D'un puissant trait ma raison est forcée:
 Oste du cœur la flame commencée
 Si tu le peux, & constante defens
 Que les braziers ne s'alument plus grans!
 Je guarirois si ie le pouuois faire!
 Vn Dieu plus fort me repousse au contraire!
 Du Ciel me vient ce desastre fatal,
 „ Je voy le bien & ie choisis le mal!

Le traistre amour me conseille vne chose,
 Et la raison vne autre me propose:
 Je ne scaurois me resoudre: & ne puis
 Me commander, tant douteuse ie suis!

Pour mon mary vn bany dois-ie suivre?
 Et par les vens par les tempestes viure?

Comme un Plongeon porté du flot amer
Qui prend sa vie & sa mort en la mer.

Non, ceste terre où i'ay mon parentage,
Me peut donner un riche mariage,
Et sans me perdre au gré de mon plaisir
Je peux en Crete un autre espoux choisir,
Riche de biens de race noble, & forte.

Ah ! ie me trompe, & mon Isle ne porte
Des fils d'Hector, & quand elle en auroit
Nul egaler sa vertu ne pourroit
Ny sa beauté ny sa ieunesse tendre
Armes d'amour qui prise me font rendre.

Vaut-il pas mieux franche me deslier
De tant d'amour que mon pere oublier
Pour un fuitis ? qui n'a point de demeure,
De foy, de loy ? mourir puisse-ie à l'heure
Qu'en destachant de honte le bandeau
Je presseray de mes pieds son bateau,
Sans auoir soing des vergongneux diffames
Que mes parens les filles & les femmes
Me ietteroient : Hyante pour n'auoir
Ny iugement ny raison ny scauoir,
Brute, lasciue, amoureuse, incensée
A ses amis & sa terre laissée
Pour un bany qui traistre la deçoit !
Desia mon cueur son malheur aperçoit.
Par les Citez ira ma Renommée
De bouche en bouche en vergongne semée.

Je n'oscray par les danses baler.
Honte & despit retiendront mon parler,
Et par les lieux où sera l'assemblée
Des iouuenceaux, j'auray l'ame troublée,
Fable de tous, des tables le propos:
Et lors la terre engloutisse mes os!

Fuyez amours, delices, mignardises,
Regards, atraits dont les filles sont prises,
Venez honneur pour me seruir d'escu,
Venez Vertu dont Amour est vaincu.
Que dis-je hélas! il n'a pas la nature
D'homme meschant, & si la coniecture
Ne me deçoit en voyant sa beauté
Il n'a le cueur remply de cruauté:
Dedans son ame un rocher il ne porte
Et ce penser mon travail reconforte:
Au pis aller cest un plaisant malheur
De secourir quelcun en sa douleur.

Ainsi pensoit d'amour toute affolée:
Francus vit bien qu'elle estoit esbranlée,
Pource en touchant son menton de rechef
Et ses genoux, l'adiura par le chef
De Proserpine amie familiere
De ses segrets, d'accorder sa priere.

Hyante songe à part soy longuement
Comme un qui refuse & qui n'a sentiment,
Puis en sursaut de son destin pressée
Se reueilla d'une longue pensée:

Loing de son front la honte s'en alla,
Et prenant cuer ainsi elle parla
Chaude d'amour qui au sang luy commande,

Non seulement ie feray ta demande
Amy Troyen, & cognoistras par moy
Ces puissans Rois qui sortiront de toy.
Mais qui plus est, si tu auois enuie
D'auoir mon sang, mes poumons & ma vie,
Mon estomac en deux ie t'ouurirois
Et pour presens ie te les offrirois.

Or' il te faut pour chose necessaire
Scauoir deuant cela que tu dois faire,
Afin, Troyen, que les Espris d'embas
Fantausmes vains, ne t'espouuantent pas,
Et que ton ame en rien ne soit atteinte
En les voyant, de frayeur ny de crainte.
Sorton d'icy afin de te monstrier:
Où les esprits te viendront rencontrer:

Leue les yeux & regarde à main dextre,
Voy ce valon tout desert & champestre,
Là tu viendras apres trois iours au soir
Quand le Soleil en l'eau se laisse choir:

Ie m'en iray par mons & par ualées
Trois iours entiers, par forests reculées,
Riués, rochers, & du peuple bien loing
D'un courbe airain seule i'auray le soing
Couper à ieun les herbes & les plantes,
Et d'inuoker les Deitez puissantes

Pluton, Cerbere, Hecate & tous les Dieux
Qui sont seigneurs des manoirs stygiens.

Trois iours finis, tirant à la vesprée
Dans le valon en la place monstree
L'apparoistray: Sois diligent & caue
A preparer de ta part ce qu'il faut.
Premierement arreste en ta memoire
De ne venir sans meinte brebis noire
Qui soit sterile: ameine à noire peau
Vaches, & porcs, les plus grans du troupeau.
Ta robe soit de couleur noire & venue:
Lave ton corps dans le courant d'un fleuve
Par trois matins, & trois fois en priant
Et l'Occident regarde & l'Orient.
De masle Encens & de soufre qui fume
Puant au nez, tout le corps te parfume.
Ayes le chef de Pauot couronné,
Et tout le corps de Veruene entourné:
Masche du sel & pour quelque lumiere
Qui s'obscurcisse espaisse de fumiere,
Ny pour les feux de salpestre fumeux
Ny pour l'abboy des mâtins escumeux,
Ny pour le cry des Idoles menuës
Qui sortiront comme petites nuës
Ne sois peureux, & sans trembler d'effroy
Ne tourne point les yeux derriere toy.
Car si craintif tu retournes la face
Tout est perdu: Au milieu de la place

Fay vne fosse assez large, où dedans
 Le sang versé des victimes respans
 Tiede à bouillons, & tout ensemble mesle
 Du vin du lait & du miel pesle-mesle.

Quand tu verras que les esprits voudront
 Boire le sang, & qu'espaix se tiendront
 Pres de la fosse au sang toute trempée
 Hors du fourreau tire ta large espée
 Les menaceant, & ne souffre hardy
 Boire un esprit si ie ne te le dy.

Adonc ayant l'ame toute grossie
 De la fureur qui vient de prophetie
 Ie te montray la plus grand part de ceux
 Qui sortiront enfans de tes neveux:
 Ie te diray quelque part de leurs gestes
 Et non pas tout: les puissances celestes
 Ne veulent pas que nostre humaine voix
 Les faits humains chante tout à la fois.

Or ie sçay bien qu'apres t'auoir monstrée
 Ta race hélas! tu fuiras ma contrée
 Comme Thesée abandonnant ta foy.

A tout le moins Francus souuienne toy
 De ton Hyante & de ta foy promise:
 Or quand mon pere au tombeau m'auroit mise
 Maugré la mort, maugré toute rigueur
 J'auray toujours un Francus dans le cuer,
 Et tes beautez dont prise tu me lies:
 Et si l'auient ingrat que tu m'oublies,

Ce iour puiſſé ie vn oyſeau deuenir
Pour de mon nom te faire ſouuenir
Volant ſur toy: & peut eſtre qu'à l'heure
Aurois pitié de moy pauvre qui pleure
Pour ton depart qu'arreſter ie ne puis:
Car ton deſtin eſt plus que ie ne ſuis.

Ainſi diſant, preſſez ſ'entr'acolerent.
Puis au logis par deux chemins allerent:
Elle en ſon char monte ſans y monter,
Son foible eſprit ſe laiſſoit emporter
Après Francus & toute froide & bleſme
En ſon logis retourna ſans ſoymeſme.

Au iour promis Francus ne faillit pas:
Il a choiſy du troupeau le plus gras
Et le plus grand, trois leniſſes veſtues
De noire peau, aux cornes bien tortues,
Au large front, à l'œil grand & ardent,
Et dont la queuë auoit le bout pendant
Juſqu'à la terre, & ſans coups les ameine:
Puis trois Brebis groſſes de noire laine,
A langue blanche, à qui l'œil treſſailloit
Offrande entiere où rien ne deſſailloit,
Que le Belier n'auoit iamais connuës,
Grailles brebis bien noires & pelues:

Priſt vn ſuſil & frayant de meins coups
Dru & menu l'acier ſur les cailloux
En ſu ſortir mille & mille flammèches
Les nourriſſant entre des fueilles ſeches:

Puis en soufflant & soufflant peu à peu,
De ce Genieure allume un petit feu
Qui deuint grand, nourry par la pasture
Des bois qui sont gommeux de leur nature.

De noir Pauot & d'Encens parfuma
L'air d'alentour: de l'Ache il alluma,
De la Cygue, & faisoit de leurs braises
Sortir un flair dont les Dmons sont aises,
Car ils ne vont ny mangeant ny beuuant:
Il sont nourris de vapeur & de vent.

Soubs le valon s'esleuoit un bocage
Branche sur branche espaissey de fueillage
Dont les cheueux par le fer non tondus
S'entr'ombrageoient l'un sur l'autre espandus:

Persez n'estoient ny de l'aube premiere
Ny du midy: une chiche lumiere
D'un iour blasart au dedans palissoit
Et d'ombre triste afreux se herissoit,
Plein de silence & d'horreur & de crainte.

Arbre n'estoit où ne pendist emprainte
L'image saint d'Hecate au triple front
Qui regne au ciel, en terre, & au profond.

Pres le bocage vne Fosse tauée
A grande gueule en abyssme creuée
Beoit au ciel ouuerte d'un grand tour,
Qui corrompoit la lumiere du iour
D'une vapeur noire grasse & puante,
Que nul oyseau de son asle volante

N'eust sceu passer, tant le ciel ombrageux
S'espaisissoit de flammes & de feux,
Et de vapeurs pesle-mesle alu mées
A gros bouillons ondoyans de fumées.

De là maints cris, maints traisnemens de fer,
Et maint feu sort: vray soupirail d'Enfer.
Pres cét abisme en horreur débordée
Creusa la place en haut d'une coudée
De toutes pars l'eslargissant en rond:
Puis la victime atira par le front
Les yeux tournez vers l'Occident, & pouffe
Les noirs toreaux sur le bord de la fousse
De la main gauche, & le poil qui estoit
Droit au milieu des cornes il iettoit
Dedans le rond de la place, & respanche
Du miel, du vin, de la farine blanche
Auecq du lait, & brouillant tout cela
Du Mandragore au ius froid il mesla.

Lors en tirant de sa gaisne iuoirine
Vn grand couteau le cache en la poitrine
De la victime & le cueur luy chercha.
Dessus sa playe à terre elle broncha
En trepignant, le sang rouge il amasse
Dedans le creux d'une profonde tasse:
Puis le renuerse en la fosse à trois fois
L'espee au poing: priant à haute voix
La royne Hecate & toutes les familles
Du noir Enfer qui de la Nuit sont filles:

Le froid Abyfme, & l'ardent Phlegeton,
Stryx & Cocyt, Proferpine & Pluton
L'Horreur, l'Enfer, les Ombres, le Silence,
Et le Chaos qui fait fa demeure
Deffous la terre en la profonde Nuit,
Voifin d'Erebe où le foleil ne luit.

Il achetoit, quand vn effroy luy ferre
Tout l'estomac: vn tremblement de terre
Se creuaceant fous les pieds fe foudit:
Vn long abboy des mâtins s'entendit
Par le bocage, & Hyantè est venuë
Comme vn eſprit affublè d'une nuë.

Voicy, diſoit, la Déeſſe venir:
Ie ſens Hecate horrible me tenir
Cueur ſang & foye, & ſa forte puiſſance
Tout le cerueau me frape & me tourmente.

Tant plus ie veux alenter ſon ardeur,
Plus d'aiguillons elle me lance au cueur
Me tranſportant, ſi bien que ie n'ay veine
Ny nerf ſur moy ny ame qui ſoit ſaine.
Car mon eſprit qui le Dæmon recoit
Rien que fureur & horreur ne conçoit.

A tant retint ſa parolle eſuollée
Donnant repos à ſon ame eſbranlée,
Puis coup ſur coup le Dæmon luy reprit
Le ſang le cueur la ceruelle & l'eſprit:
Plus que deuant une rage l'alume:
Elle aparut plus grand que de couſtume,

De teste en pié le corps luy frissonnoit,
Rien de mortel sa langue ne sonnoit,
Le vent par l'air ses cheveux luy enmeine,
Son estomac s'esuantoit d'une haleine
Courte & pantoise, & ses yeux qui trembloient
Deux grands flambeaux allumez ressembloient.
Lors en rouant ses yeux à demy-morte
Deuers Francus luy dist en telle sorte.

Prince Troyen inuaincu de trauaux,
Qui sur la mer as souffert mille maux
Et qui en dois par longue & longue guerre
Souffrir encor de plus grands sur la terre:
En Gaule iras, mais tu ne voudrois pas
T'estre allé: mille & mille trespas
Mille peris plus aigus que tempeste
Desia tous prests te pendent sur la teste.

Comme ton pere en defendant son fors
Conneut Tydide & Achille le fort
Fils inueincu d'immortelle Déesse,
Conneut Ajax, & l'Achaïque presse:
Tu dois un iour cognoistre à ton malheur
Mille ennemis d'invincible valeur,
Si que la riue & la course de Seine
De Troyens morts auront l'eschine pleine,
D'armes d'escus, de cheuaux renuersez
Et de bouclers d'outre en outre persez:

Mais par sur tous garde toy que le fleuve
D'Aine en ses eaux durement ne t'abreuue,

Et que Remus sous ombre de vouloir
Te marier, ne te face doloir.

„ La gloire humaine en fin est perissante:

„ La mort saisist toute chose naissante.

Pren cueur au reste avecque la vertu

Tu vaincras tout par le glaive pointu:

Tou parvenu vers la froide partie
Où la Hongrie est ioincte à la Scythie,

Tu bastiras pres le bord Istrien

Seiour des tiens, le mur Sycambrien

Que tes enfans en longue & longue race

Tiendront apres pour leur royale place.

Le bon Hymen ayant soucy de toy

Te doit conioindre à la fille du roy

Qui regira sous sa dextre garnie

D'un iuste fer, les champs de Pannonie.

Le grand Soleil qui voit tout de ses yeux

Ne voit iamais princes si glorieux

Que tes enfans tous chargez de trophées

Ayant de Mars les ames eschaufées.

Par meinte guerre & meinte donteront

Huns, Gots, Alains, & au chef porteront

Mille lauriers, en signe de conqueste

Qu'à leur voisins auront froissé la teste.

La deux mille ans commenceront leur tour

Quand ta Sycambre & les lieux d'alentour

Seront laissez de ta race germaine

Conduite en sort par un grand capitaine,

Qui sous l'obscur des ombres de la nuit
 Verra dormant un Fantausme en son lit:
 „ De Dieu certain cà bas viennent les songes
 „ Et Dieu n'est pas artizan de mensonges.

Ce fut un corps ayant trois chefs diuers,
 L'un de Chouan aux yeux ardens & pers,
 L'autre d'un Aigle, & l'autre eut la figure
 D'un grand Lyon à la machoire dure:
 Puis tous ces trois en un se rassembloient
 Et ces trois un, face d'homme sembloient
 Qui murmurant se vouloit faire entendre
 Mais Marcomir ne le pouuoit comprendre:

Voulant scauoir du songe tout esmeu
 Que portendoit ce grand Fantausme veu,
 Alla trouuer une vieille prophete
 Qui fut du songe infallible interprète:

C'est qu'il failloit par le conseil des Dieux
 Laisser Sicambre & chercher autres lieux,
 Et s'en aller vers le Rhin où la Gaule
 Du roy Brutus n'entre-uoit que l'espaule,
 Et rechercher ses anciens amis
 Qui dès long temps leurs siege y auoient mis
 Seigneurs du Rhin, où sa corne bessonne
 D'un large cours dedans la mer s'entonne.

Donc amassant son Peuple & le rangeant
 Sous trois cents Ducs, hautain ira chargeant
 Le cueur des siens de guerrieres menaces
 Et tout le corps de fer & de cuiraces.

Et Mars en eux sera si bien entré
Qu'il laisseront leurs maisons de bon gré
Prenant congé des vieux Dieux de la terre:
Loing deuant eux courra la triste Guerre:
Vuides de gens les champs abandonnez
Dessous leurs pieds trambleront estonnez,
Des grands ruisseaux les courses azurées
N'estancheront leurs gorges alterées
Presque espuisez iusqu'aux profond des eaux
Ou soit par eux, ou soit par leurs cheuaux,
Peuple inuaincu en toute sorte d'armes
(Vaillans pietons, cheualeureux gensdarmes)
Fier, courageux, aux batailles ardent,
Qui d'Orient iusques à l'Occident
Victorieux espandra ses armées:

Les champs de Tyr, les terres Idumées
Le cognoistront, & toy Fleuve qui fuïs
Dedans la mer desgorgé par sept huis:
Et d'Apollon la roche inaccessible
Connoistra bien leur puissance inuincible.
Voire tous Rois se verront surmonter
Si les Gaulois ne sont de leurs costez.

Or à la fin de troupe plus espaisse
Que n'est la nege ou la gresle que presse
Le vent d'hyuer qui bond à bond se suit
Et sur le toict des maisons fait un bruit.
Et plus espais que sueilles d'un bocage
Du Rhin venteux gangneront le riuage:

Puis surmontant par l'effort du harnois
Phrysons, Gueldrois, Zelandois, Holandois
Verront la Meuse, & par forte puissance
De leurs voisins prendront obeïssance,
De toutes pars aimez & redoutez
Comme guerriers aux armes indontez.
Terreur des rois, & des fortes murailles.

Sous Marcomire auront longues batailles
Contre la Gaule intraitable: & ie veux
De ce grand Duc te montrer les neuveux,
Et les enfans yssus de ta lignée
Par qui la Gaule un iour sera gangnée,
Et qui tiendront (sang Troyen & Germain)
Le Sceptre entier laissé de main en main.

A tant la vierge un petit se repose
Et Francion luy demande autre chose.

Vierge l'honneur des dames & de moy
Toute diuine, heureux germe de roy,
Ie te suply prophete veritable
Sage en conseil, dy moy si l'est croyable
Que les esprits qui sont sortis de hors
De leurs vieux corps r'entrent en nouveaux corps?

Quelle fureur? quelle maudite enuie
Les tient ainsi de retourner en vie?
Et d'où leur vient ce furieux amour
Que de reuoir encore un coup le iour?
Se reuestant de muscles & de veines
Pour resouffrir tant de nouvelles peines?

Et quand doit l'homme esperer un repos
 Si despoillé de chair de nerfs & d'os,
 Mesme au tombeau le repos il ne treuve
 Et d'une peau en recherche une neuue?

Donques la mort n'est la fin de noz maux,
 Puisqu'en mourant de traux en traux
 Nous reuiuons pour mourir à toute heure
 Errans sans fin sans repos ny demeure.
 A tant se teut : Elle qui l'entendist
 D'un haut discours luy contre-respondist.

Seigneur Troyen, tout ce qui vit au monde
 Est composé de la terre & de l'onde,
 D'air & de feu, (membres de l'univers)
 Et bien qu'ils soient quatre Elemens diuers
 Ils sont entre-eux liez de telle sorte
 Que l'un à l'autre enchesné se raporte,
 Et sempruntant d'un accord se refont,¹
 Et changeant d'un en l'autre s'en reuont,

Or' tout ainsi que les hommes sans ame
 (Ame surion de la diuine flame)
 Ne pourroient viure, ains mourroient sans auoir
 Vn esprit uif qui le corps fait mouoir,
 Et chaut & pront par les membres a place:
 Ainsi la grande uniuerselle mace
 Verroit par mort ses membres discordans
 S'elle n'auoit un esprit au dedans
 Infus par tout qui l'agite & remue
 Et dont sa course en vie est maintenue

Esprit

*Esprit actif meslé par ce grand Tout
Qui n'a milieu commencement ny bout.*

*Des Elemens corruptible matiere
Et du grand Dieu dont l'essence est entiere
Incorruptible immortelle, & qui fait
Viure par luy tout ce monde parfait
Vient nostre genre: & les poissons qui nouënt
Et les oyseaux qui parmy l'air se iouent,
Les habitans des bocages ombreux
Et les serpens qui viuent en leur creux
Voire du Ciel les diuerses puissances,
Tous ces Demons & ces Intelligences
Vont de ces deux comme nous se formant,
De Dieu l'esprit, le corps de l'Element.*

*De là nous vient la Tristesse & la Crainte,
De là la Loye en noz cueurs est emprainte,
L'Amour, la Haine, & les Ambitions:
De là se font toutes noz Passions.*

*Or de noz corps la qualité diuerse
Empesche & nuist que nostre ame n'exerce
Sa viue force enclose en la maison
De terre, ainçois en la morne prison
Des membres froids qui la chargent & pressent
Et vers le Ciel retourner ne la laissent,
Tant le fardeau terrestre & orieux
Ne ne luy permet qu'elle reuole aux Cieux.*

*Elle d'en-haut nostre hostesse venue
Est par contrainte en noz corps detenuë.*

Où n'employant sa premiere vigueur
Par habitude & par trait de longueur
Consent au corps, & faut qu'en despit d'elle
S'estant infuse en la chair corporelle
Elle se souille, & honnisse aux pechez
Dont les humains ont les corps entachchez.

Or quand la mort aux hommes familiere
Disipe au vent nostre douce lumiere,
L'ame pourtant apres le froid trespas
Laisant son corps, son taq ne laisse pas
Ny sa souillure: elle emporte l'ordure
Emprainte en soy qui longuement luy dure:
Pource aux Enfers comme un songe leger
Elle deuale, afin de se purger
Et nettoyer sa macule imprimée
Qu'elle receut en son corps enfermée.

L'une un Caillou pousse à mont d'un rocher,
L'autre sa soif ne scauroit estancher,
Et l'autre au vent dedans l'air est pendue,
Sur une rouë est vne autre estandue,
L'autre en un crible espulse en vain de l'eau,
Et l'autre sent les grifes d'un oyseau,
L'autre dessous un arbre qui chancelle
Tramble d'effroy qu'il ne tombe sur elle.

En l'air, en l'eau, par le feu, dans le vent
Vont expiant & purgeant & lauuant
Les vieux delicts de leurs fautes commises
A l'examen Radamant'li soumises

En ces tourmens ardens & violens
L'une est mille ans, & l'autre deux mil ans,
L'autre trois mil, & ne sont soulagées
Quelles ne soient parfaitement purgées,
Et que la tache adhérente ne soit
Nette en souffrant le mal qu'elle recoit.

Quand un long temps de siècles & d'années
L'une sur l'autre à courses retournées
Ont nettoyé leurs taches, & ont fait
L'esprit divin estre pur & parfait,
Et que le feu de tresimple nature
Ne tient plus rien de la terrestre ordure,
Pur tout ainsi comme il estoit alors
Premierement qu'entrer en nostre corps:

Adonq Mercure à la verge d'Ivoire
Les contraignant, au fleuve les fait boire
Fleuve qui fait toute chose oublier:
Car autrement ne se voudroient lier
En nouveaux corps s'ils ayoient souvenance
Des maux passez dont ils font penitence:

Ainsi qu'aigineaux en troupes amassez
Par le baston de Mercure poussez
Les ames vont sur la riue guidées
Boire le fleuve à friandes ondées:
Puis à l'instant perdent tout souvenir.

Lors un desir les prend de reuenir,
Et de reuoir leur liaizon premiere,
Et du soleil la celeste lumiere.

A tant se teut: Francion tout soudain
Prend de rechef vn cousteau dans la main,
Et d'une truye infertille & brehaigne
Ouure la gorge: en tombant elle seigne
Dessus la terre, où le sang renuersé
Tiede fuma sur le creux du fossé,
Priant Mercure, & les Sœurs Eumenides
Le vieil Caron, vouloir seruir de guides
A ces esprits qui deuoient quelquefois
Venir aux corps des monarques Francois.

Comme il disoit, entre souffres & flames
Voicy venir de l'abisme les ames.
Vn tourbillon par ondes tout fumeux,
Vn feu de poix raisineux & gommeux
Alloit deuant, qui de puante haleine
Offensoit l'air lest aillis & la plaine
Auec grand son, comme un tonnerre bruit
Brisant la nuë espaisse d'une nuit.

Adonc Francus ayant l'ame frapée
De froide peur, au poing saqua l'espee
Les souffrant boire, & se tirant à part
Sur un tertreau qui pendoit à l'escart
Pour mieux pouuoir leur visages connoistre,
Scauoir leurs noms, leurs habits, & leur estre
Les contemploit, & de frayeur transsy
Apelle Hyante & luy demande ainsi.

Quel est celuy de royale aparance
Qui d'un grand pas tous les autres deuance,

Et d'Oliuier se couronne le front?
 Elle respond: cest le Roy PHARAMONT
 Qui des Gaulois abaissant un peu l'ire
 Et le desir conceu sous Marcomire
 D'assuietir les terres & les rois
 Adoucira son peuple par les loix,
 Et leur fierté Sicambroise & Scythique
 Amolira par la douceur Salique,
 Pour retirer du chaud amour de Mars
 Le cueur selon de ses braues souldars.

Quel est ce Prince appuyé d'une hache
 Qui tout son front ombrage d'un panache
 Au front seure, aux yeux gros & ardens,
 A longue barbe, aux longs cheueux pendans,
 Qui rien q'horreur ne monstre en son visage?
 C'est CLARDION qui l'otieux courage
 Des vieux Gaulois aux armes referra
 Et leur paresse en guerre eschauffera,
 D'ardeur nouuelle animant leurs poitrines
 A conquerir les prouinces voisines.

Luy tout ardent du feu de guerroyer
 Enfant de Mars, doit un iour foudroyer
 L'orgueil romain: puis d'une vertu viue
 Du Rhin cornu outrepasser la riuie
 Et la forest Charbonniere perser:
 A forte main doit un iour renuerser
 Les Turingeois, & la muraille ancienne
 De Mont, Cambray, & de Valentienne.

Et de Tournay, & doit rougir les bors
 De Somme tiede au carnage des mors:
 Doibt bien auant en Gaule faire entrée,
 Nulle puissance en armes rencontrée
 Son masle cœur supporter ne pourra:
 Comme vne foudre en Bourgongne courra,
 Vaincra Tholoze. & les Gots d'Aquitaine
 Comme Sapins estandra sur la plaine.

Puis en donnant exemple à ses neueux
 De liberté, portera longs cheueux
 S'eslonissant pour remerque immortelle
 Que cheuelu toute Gaule l'apelle.

Quel est celuy qui marche le premier
 Apres ces deux, au visage guerrier,
 Qui tient la face aux astres esleuée?
 C'est le vaillant & iuste Meronée
 Aspre ennemy des Huns, qui descendront
 Plus dru que gresle, & par force prendront
 Pillant, ardent de flames alumées,
 (Mars tout sanglant conduira leurs armées)
 Treues, Coulongne, & mille fors chasteaux
 Que vostre Rhin abreuve de ses eaux,
 Et ru'ront Mets à l'egal de la terre,
 Cruelle engeance indontable à la guerre:

La mer ne iette aux bors tant de sablons
 Que de soldats hydeux en cheueux blons
 S'amasseront trope venant sur trope
 Pour mettre à sac l'occidentale Europe

*Soubs Atila cruel prince inhumain,
Extreme fleau de l'empire romain.*

*Contre un tel peuple espoinconné de rage,
Tout acharné de meurdre & de carnage,
Craint comme foudre à trois pointes tortu,
Ce Merouée oposant sa vertu
Pres de Chalons retranchera l'audace
Avec le ser:menu dessus la place
L'un dessus l'autre adentez tomberont,
Le ventre creux des matins ils auront
Pour leur servir de digne sepulture,
Nuds sur le champ gras de leur pourriture.*

*Luyle premier suivy de ses Troyens
Regangnera les bords Parisiens,
Sens, Orleans, & la coste de Loire,
Puis de ton nom Francus ayant memoire
Le nom de Gaule en France changera:
Ton sang versé par armes vangerà
Et nul des tiens chargé de tant de proye
Ne doit pousser si haut le nom de Troye,
Vaillant monarque, iuuincible, inuaincu,
Victorieux; autour de son escu
Frayeur horreur des guerres eschaufées
Naistront Lauriers & Palmes & Trophées
Et le premier sera voir aux Francois
Que vaut l'honneur acquis par le harnois
Puis il mourra: Car toute chose née
Est en naissant pour mourir ordonnée*

De son grand nom les vieux Sicambriens
Seront long temps nommez Meroueens,
Et ses vertus auront tant de louanges
Qu'aymé des siens, redouté des estranges
Après sa mort, d'inuiolable loy
Nul tant soit preux n'aura l'honneur de roy
Portant au chef la couronne esleüe
S'il n'est yssu de la gent Merouée.

L'autre qui vient baissant un peu les yeux
Ensemble triste & ensemble ioyeux
Est-il des miens dy le moy ie te prie?
C'est CHILDERIC roy de meschante vie
Ord de luxure, infect de volupté,
Au cœur paillard de vices surmonté,
Prince prodigue, execrable en despences,
Qui pour fournir à ses folles boubances
De ses suiets rongera tous les os,
Boira le sang, haussera les impos
Tailles tribus & de si orde iniure
Faite aux françois nourrira sa luxure.

Il rauira des pucelles la fleur,
Honte aux parens, des peres la douleur,
Et sera plein de telle nonchalance
Que deniant aux peuples audience
Consommara pourneant le soleil
Sans voir iamais ny palais ny conseil.

Pource la France à l'enuy coniurée
Contre sa vie ainsi desmesurée

Le chassera de son throsne royal:
Fuirá banny vers son amy loyal
Roy d'Austrasie, où suiuant son usage
Sans reuerer le saint droit d'hóstelage
Et Iupiter protecteur d'amitié,
Opiniatre en toute mauuaitié,

(Dieux destournez vn aële si infame
Du cueur des Rois) luy honnira sa femme
Pour le loyer de l'auoir bien receu:
„ L'homme de bien est volentiers deceu.

De Childeric esliront en la place
Vn Duc Gillon d'Italienne race
Qui regira les romains à Soissons
Pire que l'autre en cent mille façons.

Le bon françois qui son prince desire
Plaignant le roy chassé de son empire
R'appellera Childeric son seigneur:
Luy se voyant en son premier honneur
Amendera par vergongne ses fautes.
Lors plein de force & d'entreprinse hautes
Pour effacer de ses pechez le nom,
Braue au combat ne taschera sinon
Que la vertu par les armes suiuié
Perde le bruit de sa premiere vie.
Adonc suiura Gillon son ennemy
Par les rochers les forests, & parmy
Les flots du Rhin: Gillon plein de vergongne
S'ira sauuer dans les murs de Coulongne
Que Childeric à qui le cueur ne fault,

Le fer au poing emportera d'assaut:

Puis sans donner aux romains nulles treues

Fera broncher les murailles de treues

Où ce Gillon vagabon s'enfuira:

Les fiers Saxons en bataille occira

Il tira Paul de nation romaine,

Et d'Orleans tirant jusqu'au domaine

Du riche Aniou, hazardeux aux dangers

Se fera Roy victorieux d'Angers,

Et des Romains les armes estoïees

Au Dieu de Loire apendra pour trophées:

Vois-tu C L O V I S grand honneur des troyens?

Qui le premier abhorra les Payens

Et des Gentils les mentuses escolles

Pour suivre Christ laissera les idolles

Donnant batesme aux françois desuoiez?

Et lors du ciel luy seront enuoyez

Vn Oriflame, estandart pour la crainte

Des ses hayneux, & l'Ampoule tressainte

Huile sacrée, ointure de voz rois.

Son escusson deshonoré de trois

Crapaux boufis pour sa vieille peinture

Prendra des Lis à la blanche teinture.

Present du ciel: Dieu qui le choisira

D'honneur de force & de biens l'emplira!

Ne vois-tu pas comme son front assemble

La grauité & la douceur ensemble

Ayant le bras armé sans estre armé,

Ensemble craint ensemble bien aymé?

Nul ne vaincra ce roy de courroisie,
Mais quand l'espée au poing aura saisie
Nul conquerant tant soit braue de cueur
De ce CLOVIS ne vaincra la fureur.

Il poursuiura d'une ardente colere
Siagre fils de Gillon qui son pere
Deposseda, & son camp assaudra
Si viuement que Soissons il prendra
Perdant du tout la puissance romaine:
Puis dès le Rhin iusqu'aux riuës de Seine,
De Seine à Loire il sera conquereur
Des Rois voisins le foudre & la terreur.
„ La fortune est d'inconstance emplumée.

Luy conduisant une gaillarde armée
Outre le Rhin contre les Alemans
Prompts aux combats aux guerres vehemens,
Sera pressé d'une si grande suite
Que tout honteux de penser en la fuite
Aura recours tant seulement à Dieu:
Lors s'eslanceant furieux au milieu
Des Alemans, de sa francoise espée
Rendra de sang la campagne trempée,
Tura leur roy, & des peuples dontex
Tribus par an luy seront aportez.

Lors enrichi des despoilles conquises
Au nom de Christ bastira des Eglises.
Puis se chargeant (après auoir veincu)
Le dos de fer & le bras de l'escu,

Fera du Goth victime à Proserpine
D'une grand playe enfondrant sa poitrine.

Ainsi Clouis Alarie occira,

L'ame Gotique aux enfers s'en ira!
Puis s'emparant des thresors de ce prince
Prendra Tholose & toute la province
D'Alby, Rouairgue, Auvergne & Limosin,
Et tout le champ de Garonne voisin.

De là pompeux d'une si noble gloire
Des Bourguignons ravira la victoire
Les massacrant d'un courage trop chaut
Pour le forfait de leur roy Gondebaut.

Bref ce Clouis d'invincible puissance
Doit bouter hors son empire d'enfance,
Le faire masle, & le rendre aussi fort
Qu'un grand rocher, la muraille d'un bord

De ses vertus l'acquise renommée
Sera si grande & si haute semée,
Que ses enfans ne seront maintenuz
En leur grandeur, que pour estre venuz
D'un pere tel lequel durant sa vie
Ne veindra pas tant seulement l'enuie
Des rois vassaux à son glaiue pointu,
Mais si au large estandra sa vertu,
Qu'en seuely deffous la terre sombre
Fera trembler les princes de son ombre.

Or pour montrer que telle creature
Se vestira de celeste nature

Mais sur le point qu'ils voudront s'assailir,
Voicy du iour la lumiere faillir,
Neges & vens & tourbillons & gresle
Du ciel creué tomberont peste-mesle
Entre-semez de foudres & d'esclairs:
Hommes cheuaux morrions & bouclairs
Seront frappez coup sur coup du tonnerre.
Ainsi de peur mettront fin à la guerre
Ces deux germain: le bon Dieu l'a permis,
Et de haineux deuenus bons amis
Freres de sang & de cœur sans rancune,
Ramasseront leurs puissance en vne
Fiers aux combas inuaincus cheualliers:
Puis en poussant milliers dessus milliers
D'hommes armés par hautes, destinée
Iront gagner les cymes Pyrenées.
Princes guerriers inuaincus de trauaux.
Les monts d'Espagne au bruit de leurs cheuaux
Retentiront, & couuers de gens d'armes
Les champs luiront sous la splendeur des armes
Lors Almaric roy des gots qui tiendra
Sous luy l'Espagne, ardent les assandra
(Nouveau fuzil de l'ancienne noise)
Mais pour neant: car la vertu françoise
De pieds, de mains & de teste poussant
Ira des gots la force renuersant.
Ce roy voiant sa puissance coupée
Du fer gaulois, scaura que vaut l'espée

N'aymant personne & de personne aimé:
Qui de putains un Serrail diffamé
Fera mener en quelque part qu'il aille
Soit temps de paix ou soit temps de bataille:
En voluptez consommera le iour
Et n'aura Dieu que le ventre & l'amour.

Du peuple sien n'entendra les complaints:
Toutes vertus, toutes coustumes saintes
Des vieux Gaslois suivront deuant ce roy
Grand ennemy des pasteurs de sa loy.

Les escoliers n'auront les benefices,
Les gens de bien les honneurs des offices
Tout se fera par flateurs eshontez,
Et les vertus seront les voluptez.

Iamais d'enhaut la puissance celeste
Ne montra tant son ire manifeste
Et iamais Dieu le grand pere de tous
Ne montra tant aux hommes son courroux
Signes de sang de meurdres & de guerre:
De tous costez un trablement de terre
Horrible peur des hommes agitez
De fond en comble abatra les citez.

Iamais les feux la terre ne creuerent
En plus de lieux: iamais ne s'esleuerent
Plus longs cheueux de cometes aux cieux;
Iamais le vent esprit audacieux
En fracassant & forests & montagnes
Ne fit tel bruit, le balay des campagnes.

Les pains coupez de sang se rougiront,
En plein hyuer les arbres fleuriront,
Et toute fois pour ces menaces hautes
Ce meschant roy n'amendera ses fautes:

Mais tout superbe, en vices endurcy
Contre le Ciel esleuant le sourcy
Au cueur brulé d'infame paillardise
Esloufera contre sa foy promise,
En honnissant le saint lit nuptial,
Sapropre espouse, espoux tresdesloyal.

Ny lit, ny foy, ny la nuit amoureuse
Ne deffendront Galsonde malheureuse,
Qu'en luy pressant le gosier de sa main.
Ne la suffoque, homicide inhumain:
Acte d'un Scythe, & non d'un roy de France,
Lequel deuoit s'oposer en deffense
Pour la sauuer, & luy mesmes souffrir
Plustost cent fois à la mort, que souffrir
De voir sa femme ou captiue ou touchée:
Et toutes fois aupres de luy couchée,
Iointe à son flanc, le baizant en son lit,
Seure en ses bras, l'estranglera de nuit.
Cruel tyran! à qui dessus la teste
L'ire de Dieu pend desia toute presle:
D'un ord trespas son sang le rougira
Et sa putain sa femme vangerà.

Après la mort de sa femme Galsonde,
Doit espouser sa garse Fredegonde,

Qui d'un visage eshonté de regars,
Et de maintiens lubriques & paillars,
Et d'un parler entre l'humble & le graue,
Fera ce roy de maistre son esclau,
L'abestissant si bien à ses desirs,
Qu'il seruira vales de ses plaisirs.
Puis doit apprendre aux despens de sa vie
Que l'homme est fol qui aux putains se fie.

Or elle ayant assoté son mary
Pour mieux iouir de son ribaut Landry
Qui du royaume auoit toute la charge,
Folle d'amour, à deux meurdriers encharge
A son retour de la chasse bien tard
De luy perser la gorge d'un poignard.
Ainsi mourra par les mains de sa femme
Ce Chilperic des princes le diffame.

Elle sans peur ny de Dieu ny de loix,
Toute effrontée, ayant encor les doigts
Rouges du sang de son mary, pour taire
Par un beau fait le meurdre & l'adultere,
Ira guerriere au milieu des combas,
Tiendra son fils de trois mois en ses bras,
Traistre pitié! pendant à sa mammelle
Dont son paillard aura pris la tutelle.

Puis cette royne abominable, ainçois
Cette furie execrable aux françois,
De qui la teste attendoit le suplice,
Comme si Dieu fauorisoit le vice

*Guerre sur guerre & debas sur debas
Fera mourir la France par combas,
Mais à la fin sous les mains de Clotaire
Doit de ses maux recevoir le salaire.*

*Ce gentil Prince entre ses nobles faits
Voyant ses gens en bataille deffais,
Et Dagobert son fils iusqu'à la taye
Pres la ceruelle ataint d'une grand playe
Perdre le sang en longue pamaison:
Reuestira son chauue poil grison
D'un morrion, armes de la ieunesse,
Et tout son corps refroidy de vieillesse
Reschaufiera d'un cuer ieune & gaillard:
Puis en brossant les flancs de son bayard
Chaud de colere & de menace fiere,
Passant à nou le fil d'une riuere
Ira trouuer le roy sur l'autre bord
Qui se moquoit de son fils demy-mort.
Alors ces rois d'un valeureux courage
Front contre front sur le premier riuage
S'acharneront comme loups au combat.
Le bon Clotaire à la renuerse abat
Son ennemy, & la teste coupée
Embroche droite au bout de son espée
Auec grands cris retournant vers les siens,
Acte Gaulois & digne des Troyens
De siecle en siecle à iamais memorable
Tant vaut un pere à son fils pitoyable.*

L'autre qui vient en magnifique arroy
 Qui de maintien represente un grand roy
 Est-il des miens: dyle moy ie te prie?
 Cest D A G O B E R T fleur de cheualerie:
 En sa ieunesse aura le cueur hautain,
 Reuesche en meurs coupera de sa main
 (Aste impiteux) la barbe de son maistre,
 Puis par le temps venant son age à croistre,
 De prince fier deniendra gratioux,
 Tant seulement en deux points vitieux,
 L'un de nourrir par trop de concubines,
 L'autre de faire excessiues rapines
 Sur meinte eglise, afin d'enrichir un
 Moutier à part du reuenue commun:

Au reste accort, de bonnes meurs & sage,
 Qui craindra Dieu, qui punira l'outrage
 Des orphelins, qui viura par conseil,
 Qui n'aura point en armes son pareil,
 Prudent guerrier, qui sera sans contrainte
 L'amour des siens, de ses voisins la crainte:
 Qui chassera les peuples circoncis
 De ses pais, par qui seront occis
 Les Esclauons, qui dessus la campagne
 Estandra mors les peuples d'Alemagne,
 Et les Lombars par guerres destruira,
 Qui les Gascons rudement punira,
 Et qui rendra la nation seruite
 Des Poiteuins, & qui Poitiers leur ville

Saccagera par glaiues & par feux
Et la fera labourer par des beufs
Semant du sel où furent ses murailles.
Qui destruira les Hongres par batailles
Trenchant au fer tant de peuples armez.
Des os des mors les champs seront semez
Et les cheuaux nageront iusqu'au ventre
Souillez de sang: la riuiera qui entre
Dedans la mer, à peine par ses bors
Pourra couler tant elle aura de mors.
Luy tout enflé de gloire militaire
Rendra sous luy Bretagne tributaire
Et leur royaume en Duché changera.
Tout au contraire amy deschargera
(Aux vns hautain, aux autres debonnaire)
Les fiers Saxons surmonter par son pere
De trois cens beufs qu'ils denoient tous les ans.
Puis desliant de ses membres pesans
L'ame legere, apres meinte victoire
Rendra son nom d'eternelle memoire.

L'autre qui suit d'honneur environné
Qui a le front de palme couronné
Qui ia les Turcs menace de la guerre?
Sera CLOVIS lequel ira conquerre
Hierusalem, & les sceptres voisins
D'Egypte iointe aux peuples Sarrazins
Outre la mer bien loing de sa patrie
Tiendra des Iuifs l'heureuse seigneurie

Clotaire est l'un & l'autre est Childery,
 Theodoric l'autre en delices nourry,
 Trois fait-neants, grosses maces de terre
 Ny bons en paix, ny bons en temps de guerre
 La maudisson du peuple despité:
 L'un pour souiller son corps d'oysiveté
 Pour n'aller point au conseil, ny pour faire
 Chose qui soit au prince necessaire,
 Pour ne donner audience à chacun,
 Pour n'auoir soing de soy ny du commun,
 Pour ne voir point ny Palais ny Iustices
 Mais pour rouiller sa vie entre les vices,
 Traistre à son Peuple & à soy de sloyal
 Sans plus monter en son throsne royal
 En le faudrant de son naturel guide
 A Esbrouin en laschera la bride
 Et le fera soit en guerre ou en paix
 Chef du conseil & Maire du Palais.

Cet Esbrouin aura soing des batailles,
 De la finance & d'augmenter les tailles,
 Et de respondre à tous ambassadeurs,
 Et son estat aura tant de grandeurs
 (Comme chargé d'une peine-honorable)
 Qu'il deuindra si craint & redoutable
 En cependant que les Rois amusez
 A boufonner, aux femmes abuzez
 Sans nul conseil, trahys de leur plaissance
 Sont rois de nom, Esbrouin de puissance
 E e

Tout alumé de honte & de courroux
Ce roy peu sage occira de cent coups.

Luy de son prince ayant la dextre teinte,
Pres le roy mort tu'ra la royne ensceinte,
D'un mesme coup (tant son fiel sera grand)
Perdant le pere & la mere & l'enfant
Qui se cachoit dedans le ventre encore:

Seigneur Troyen, le prince ne s'honore
De felonnie, il faut que la fierté
Soit aux lyons, aux rois soit la bonté
Comme mieux nez, & qui ont la nature
Plus près de Dieu que toute creature.

Ce roy doit estre abusé par flatteurs,
Peste des rois courtizans & menteurs,
Qui des plus grands assiegeant les oreilles
Font les discrets & leur content merueilles.

Pource, Francus, si le ciel te fait Roy,
Sage entretiens des vieillars près de toy
Qui te diront leurs raisons sans feintise
En longs cheueux; en longue barbe grise.

Ne vueilles point pour conseillers choisir
Ces ieunes fols qui parlent à plaisir.
Le plus souuent les princes s'abestissent
De deux ou trois que mignons ils choisissent,
Vrais ignorans qui sont les suffisans,
Qui ne seroient entre les artisans
Dignes d'honneur, grosses lames ferrées
Du peuple simple à grand tort honorées,

E c ij

Qui vivent gras des impos & des maux
Que les rois font à leur pauvres vassaux,
Tant la faueur qui les fautes efface
Fait que le sot pour habille homme passe.

Quelle fureur? qu'un roy pere commun
Doive chasser tous les autres pour un
Ou deux ou trois? & blesser par audace
Vn masle cuer issu de noble race
Sans regarder si le flatteur dit vray?

Ce Childeric doit cognoistre à l'essay
Le mal qui vient de croire à flaterie
Perdant d'un coup & vie & seigneurie.

Voy Francion ces autres rois dontez
De vin, d'amour, de toutes voluptez
Qui abestis en un monceau se pressent
Et le regard contre la terre baissent,
Vne grand nuë esparse sur le front
Les obscurcist: regarde comme ils vont
Effeminez, & d'une aleure lente
Montrent au front une ame nonchalante.

Ah! malheureux! ils seront fils des tiens
Germe maudit, troyennes non troyens:
Qui tant s'en fault qu'ils soient en france dignes
D'auoir au chef les couronnes insignes,
Qu'ils ne sont pas, peste du genre humain
Dignes d'auoir l'aiguillon en la main,
Rois sans honneur, sans cuer, sans entreprise
Dont la vertu sera la paillardise.

Leur beau Royaume acquis par le harnois
De tant d'yeux tresinuincibles Roys,
Par la sueur de tant de Capitaines,
Par sang, par fer, par discours, & par peines,
En peu de iours tombé de sa vigueur
Ah fier destin! perdra puissance & cueur.

Ne vois tu pas comme Clouis en pleure?
Tay-toy grand roy, rien çà bas ne demeure
„ En son entier: tant plus le sceptre est haut
„ Et plus il tombe à terre d'un grand saut.

Ces Rois hydeux en longue barbe epaisse,
En longs cheveux ornez presse sur presse
De chesnes d'or & de carquans grauez,
Hauts dans un Char en triomphe esleuez
Vne fois l'an feront voir leur visage:
Puis tout le reste ils seront en seruage
Laisant la bride aux Maires du palais
Dont ils seront esclaves & valets,
Masques de Rois, idoles animées,
Et non pasteurs ny princes des armées,
Qui se verront honnis de voluptez
De leurs vassaux à la fin surmontez.
Apren, Troyen, comme un lasche courage
Perd en un iour son sceptre & son lignage.
„ Il ne faut estre aux affaires retif.
„ La Royauté est un mestier actif.
Voy Chilperic le dernier de la race
De Pharamond, comme il baise la face

Moine razé pour sa lubricité,
Vn fait neant moisy d'oyssiueté,
Qui ia ce semble aux plaisirs s'abandonne.

Cestuy perdra le sceptre & la couronne
Du grand Clouis, & son Maire Pepin
S'en fera roy par ne scay quel deslin,
En transfferant l'ancien diadesnie
De la maison de son maistre à soy mesme:

Bien qu'à grand peine ait quatre pieds de corps,
Bas de stature, & de membres peu forts,
Il aura l'ame active & vigoureuse,
Et de conseil & de prudence heureuse
Il dontera la force des plus grands.

Pource Francus par tel exemple aprens
Que tout royaume augmente en accroissance
Par la vertu & non par la puissance,
„ Et que Dieu seul qui toute chose peut
„ Perd & maintient les sceptres comme il veut.
„ Pour les garder l'homme en vain se traueille,
Car c'est luy seul qui les oste & les baille.

Qui sont ces deux qui vont marchant à part?
Qui de la troupe eslongnez à l'escart
Discourent seuls de grands propos ensemble?
A voir leur port, l'un & l'autre me semble
Sage guerrier, & nul ne s'est monstré
De tant d'honneur ny de gloire illustré.

Celuy, Troyen, qui fait bruire ses armes
Grand capitaine & pasteur de gens d'armes,

Qui ia sa main sur vne lance met,
Qui d'un panache ombrage son armet
Au fier maintien, au superbe courage,
Qui rien que Mars ne monstre en son visage
Sera Martel gouverneur des françois,
Non roy de nom mais le maistre des Rois:

Dedans le ciel fera monter l'empire
Du nom gaulois, & nul deuant son ire
N'oposera ny lance ny escu
Qu'il ne soit pris ou fuit ou vaincu.

Voy quels lauriers merque de sa conquete,
Vont plis sur plis enuironnant sa teste!
Voy son maintien combien il est gaillard
Et de quels yeux il enfonce un regard!

Il occira par bataille cruelle
Des forts Saxons la nation rebelle,
Ceux de Bauiere à mort desconfira:
Les Alemans tributaires fera
Iusqu'au Danube, & la terre Frizonne
Rendra veinqueur, seruite à sa couronne.

Prendra d'assaut, inuaincu chevalier
Nismes, Marseille, Arles, & Montpellier,
Beziers, Narbonne, & toute la Prouence
Fera seruite à son obeissance:
Prendra Bordeaux & Blaye, & tous les Fors
Que la Gironde arrouse de ses bors.

Voicy comme Eude empereur d'Aquitaine
Les Sarrazins peuple innombrable, ameine

Contre Martel, à la guerre conduis
Par Abdirame antique sang des iuifs,
Qui d'Abraham & de Sarra sa femme
Se vantera, ce cruel Abdirame
Cruel de meurs, de visage, & de cuer,
Des puissans Dieux & des hommes moqueur,
Tout acharné de meurdre & de furie,
Enflé d'orgueil, enflé de vanterie,
Doit amasser les siens de toutes pars
Femmes enfans vieux & ieunes soudars,
Valets bauuiers marchans, afin que l'onde
D'un si grand Ost effroyast tout le monde.

Ces Sarrazins au travail obstinez
Oltre-passant les cloistres Pyrenez,
Et file à file espuisant toute Espagne
Se planteront au pié de la campagne
Avec grands cris: tels que les Grues font
Quand queuë à queuë en ordre sen reuont
Hautes au vent, & debachant les nuës.
Se vont assoir en leurs terres connuës
Fuyant l'huyet: un cry tranchant & haut
Se fait en l'air: tout le ciel en tressaut!

La mer ne pousse aux riuës tant d'areines,
De tant de feux les voutes ne sont pleines
Au ciel là haut, que de peuples pressez
Dessous ce roy se verront amassez.
Ils tariront le coulant des fontaines,
Dessous leurs pieds tressauteront les plaines.

Grands comme Pins en hauteur esleuez,
Prendront Bordeaux & les peuples lauez
De la Gironde, & d'ardeur violente
Viendront puiser les eaux de la Charante,
Ne pardonnant à Temples ny Moutiers.
D'auares mains saccageront Poitiers
Razant chasteaux & villes enfermées
Et pres de Tours camperont leurs armées.

Là l'invincible indontable M A R T E L
Ne s'estonnant de voir un nombre tel,
Mais d'autant plus ayant l'ame eschauffée
Qu'il verra grand le gain de son trophée,
Chaud de louange & d'honneur hazardeux
Ira planter son Camp au deuant d'eux
Les menaçant : la déesse Bellonne
Courra deuant, & Mars qui aiguillonne
Le cœur des rois, pour sauuer de meschef
Si vaillant Duc luy pendra sur le chef.

Ce iour M A R T E L aura tant de courage
Qu'aparoissant en hauteur dauantage
Que de costume, on dira qu'un grand Dieu
Vestant son corps aura choisy son lieu.

Luy tout horrible en armes flamboyantes,
Mellant le sifre aux trompettes bruiantes
Et de tabours rompant le ciel voisin
Esueillera le peuple Sarrazin
Qui l'air d'autour emplira de urlées.

Ainsi qu'on voit les torrens aux vallées

Du haut des monts descendre d'un grand bruit.
Flot dessus flot la rauine se suit
A gros bouillons, & maitrizant la plaine
Gaste des beufs & des bouuiers la peine.
Ainsi courra de la fureur guidé
Auec grand bruit ce peuple desbordé.

Mais tout ainsi qu'alors qu'une tempeste
D'un grand rocher vient arracher la teste
Puis la poussant & luy pressant le pas
La fait rouler du haut iusques à bas:
Tour dessus tour, bond dessus bond se roule
Ce gros morceau qui rompt fracasse & soule.
Les bois tronquez, & d'un bruit uiolent
Sans resistance à bas se va boulant.
Mais quand sa cheute en tournant est roulée
Iusqu'au profond de la creuse valée
S'arreste coy: bondissant il ne peut
Courir plus outre, & d'autant plus qu'il veut
Rompre le bord, & plus il se contrrouce,
Plus le rampart le presse & le repousse.
Ainsi leur camp en bandes diuisé
Ayant trouué le peuple baptisé
Bien qu'acharné de meurdre & de turie,
Sera contraint d'arrester sa furie.

Chacun de rang en son ordre se met.
Le pié le pié, l'armet touche l'armet,
La main la main, & la lance la lance,
Contre un cheual l'autre cheual s'eslance

Et le pieton l'autre pieton assaut.
 Icy l'adresse, icy la force vaut:
 Sort & vertu pesse-mesle s'assemblent.
 Dessous les coups les armeures qui tremblent
 Font un grand bruit: Victoire qui pendoit
 Douteuse au ciel les combas regardoit.

Au mois d'esté quand la pauvre famille
 Du laboureur tient en main la faucille,
 Et se courbant abat de son seigneur
 Les espics meurs, des campagnes l'honneur:
 Tant de moisson, tant de blonde iauelle
 L'une sur l'autre espaix ne s'amoncele
 De tous costez esparfes sur les champs,
 Que de corps morts par les glaiues tranchans
 Seront occis de la gent sarazine.

En moins d'un iour hostes de Proserpine
 Iront là bas trois cent mille tuez
 L'un dessus l'autre en carnage ruez.

Mille ans apres les Touranjelles plaines
 Seront de morts & de meurdres si pleines,
 D'os de harnois de vuides morrions,
 Que les bouuiers en trassant leurs sillons
 N'oirront sonner soubz la terre ferné.
 Que de grands os hurtez de la charruë

Tel au combat sera ce grand MARTEL,
 Qui plein de gloire & d'honneur immortel
 Perdra veinqueur par mille beaux trophées
 Des Sarrazins les races estouffées,

Et des Francois le nom victorieux
Par sa prouësse enuoirà iusqu'aux Cieux.

L'autre est PEPIN heritier de son pere
Tant en vertu qu'en fortune prospere,
Qui marira la iustice au harnois,
Et regira les siens par bonnes lois,

Luy bas de corps, de cœur grand capitaine
Par neuf conflits assaillant l'Aquitaine
De Gaïfier occira les soudars:

Il rendra serf le prince des Lombars
Dontant sous luy les forces d'Italie.

Rome qui fut tant de fois assaillie
Sera remise en son premier honneur.

Par luy le Pape en deuendra seigneur
Et des Francois prendra son accroissance:
Tant le bon Zele aura lors de puissance,

Par cent combas par cent mille façons
Renuersera le peuple des Saxons

Peuple guerrier des Francois aduersaire,
Et sous sa main les rendra tributaire.

La loy pendra sur son glaiue pointu -
Craint de chacun tant vaudra sa vertu

De la fortune heureuse acompagnée

Sous luy faudra CLOVIS de la lignée
Si qu'en perdant le sang tresancien

Des rois francois fera naistre le sien,

Donnant lumiere à sa race nouvelle

Par les hauts faits de sa dextre immortelle.

N'espere rien au monde de certain:

„ Ainsi que vent tout coule de la main:

„ Enfant d'Hector tout se change & rechange:

„ Le temps nous fait, le temps mesme nous mange:

„ Princes & rois & leurs races sen vont,

„ De leurs trespas les autres se refont.

„ Chose ne vit d'eternelle durée.

„ La vertu seule au monde est assurée:

FIN DV QUATRIEME LIVRE

DE LA FRANCIADE.

Fautes suruenues à l'impression du premier liure.

Page 9. ligne 21. pour Franconnie, liseZ Franconie.
page 28. lig. 5. liseZ la Gaulle est deuë.
page 32. lig. 2. piquans liseZ poignans.
page 34. lig. 8. aigneaux, liseZ aigneaux.

Fautes du second liura.

page 50. ligne 1. pour ceur liseZ Chœur.
page 54. lig. 1. Puis sous les pieds de lunon.
page 56. lig. 18. Troyents, liseZ Troyens.
page mesme, pour antenne liseZ antenne.
page 58. lig. 10. pour Nordost, liseZ or du sud.
page 65. lig. 23. pour la liseZ leur.
page 73. lig. 5. pour barreaux, liseZ barreaux.
page 76. pour ennui, liseZ ennui.
page 82. lig. 12. pour ancre liseZ antre.
page mesme, lig. 22. pour fili, liseZ fir.
page 83. lig. 14. pour diuifer, liseZ deuifer.

Fautes du troisiésme liure

page 105. lig. 25. pour filleZ, filleZ.
page 108. lig. 21. pour Lemnos, liseZ Lemnos.
page 111. lig. 2. liseZ Les vents en lair les prieres semoient.
page 114. lig. 23. liseZ se relechans.
page 130. lig. 14. pour lages, liseZ larges.
page 153. lig. 7. liseZ De gros serpens tout herisseZ à escaille
page 159. lig. 15. pour ialouse, liseZ ialouse.
page mesme, lig. 23. pour uages liseZ uagnes.

Fautes du quatriésme liure.

page 173. lig. 13. pour baniant, liseZ va niant.
page 184. liseZ De sec Genicure.
page 94. lig. 28. liseZ A l'examen de
page 112. montera, liseZ doit monter.
page 217. ligne 19. liseZ Pourtant















